


Augustinus Hipponensis



RETRACTATIONUM, LIBRI DUO.

**SANCTI AURELII
AUGUSTINI,
HIPPONENSIS EPISCOPI,
OPERA OMNIA,
MULTIS SERMONIBUS INEDITIS AUCTA ET LOCUPLETATA ;
EXTRACTA E COLLECTIONE
SS. ECCLESİÆ PATRUM ;
ACCURANTIBUS
D. A. B. CAILLAU,
CANONICO HONORARIO CENOMANENSI ET CADURCENSI,
PLURIBUSQUE CLERI GALRICANI PRESBYTERIS.
OPUS REGI DICATUM.
TOMUS QUADRAGESIMUS PRIMUS.**



pp. 431-571
RETRACTATIONUM, LIBRI DUO.

PARISIIS,
APUD PARENT-DESBARRES, EDITOREM,
SANCTÆ SEDIS ORDINUM INSIGNIBUS DECORATUM,
VIA VULGO DICTA DE BUSSY, 12 ET 14.
MDCCCXL.

RETRACTATIONUM LIBRI DUO.¹

PROLOGUS

I. Iam diu est ut facere cogito atque dispono quod nunc, adiuvante Domino, aggredior, quia differendum esse non arbitror, ut opuscula mea, sive in libris sive in epistolis sive in tractatibus cum quadam iudiciaria severitate recenseam et, quod me offendit, velut censorio stilo denotem. Neque enim quisquam nisi imprudens, ideo quia mea errata reprehendo, me reprehendere audebit. Sed si dicit non ea debuisse a me dici, quae postea mihi etiam displicerent, verum dicit et mecum facit. Eorum quippe reprehensor est, quorum et ego sum. Neque enim ea reprehendere deberem, si dicere debuisssem.

II. Sed, ut volet, quisque accipiat hoc quod facio ; me tamen apostolicam illam sententiam et in hac re oportuit intueri, ubi ait : *Si nos ipsos iudicaremus, a Domino non iudicaremur*². Illud etiam quod scriptum est : *Ex multiloquio non effugies peccatum*³, terret me plurimum ; non quia multa scripsi vel quia [432] multa etiam quae dictata non sunt, tamen a me dicta conscripta sunt (absit enim ut multiloquium deputem, quando necessaria dicuntur, quantalibet sermonum multitudine ac prolixitate dicantur) ; sed istam sententiam Scripturae sanctae propterea timeo,

¹ Scripti ann. 426 aut 427.

² 1 Cor 11, 31.

³ Prov 10, 19.

quia de tam multis disputationibus meis sine dubio multa colligi possunt, quae si non falsa, at certe videantur sive etiam convincantur non necessaria. Quem vero Christus fidelium suorum non terruit ubi ait: *Omne verbum otiosum quodcumque dixerit homo, reddet pro eo rationem in die iudicii*⁴? Unde et eius apostolus Iacobus: *Sit, inquit, omnis homo velox ad audiendum tardus autem ad loquendum*⁵, et alio loco: *Nolite, inquit, plures magistri fieri, fratres mei, scientes quoniam maius iudicium sumitis. In multis enim offendimus omnes. Si quis in verbo non offendit, hic perfectus est vir*⁶. Ego mihi hanc perfectionem nec nunc arrogo, cum iam sim senex, quanto minus cum iuvenis coepi scribere vel apud populos dicere; tantumque mihi tributum est, ut ubicumque me praesente loqui opus esset ad populum, rarissime tacere atque alios audire permetterer, et esse *velox ad audiendum, tardus autem ad loquendum*. Restat igitur ut me ipse iudicem sub magistro uno⁷, cuius de offensionibus meis iudicium evadere cupio. Magistros autem plures tunc fieri existimo, cum diversa atque inter se adversa sentiunt. Cum vero idipsum dicunt omnes⁸, et verum dicunt, et ab unius veri magistri magisterio non recedunt.

⁴ Matth. 12, 36.

⁵ Iac 1, 19.

⁶ Iac 3, 1-2.

⁷ Cf. Matth. 23, 8.

⁸ Cf. 1 Cor 1, 10.

Offendunt autem non cum illius multa dicunt, sed cum addunt sua⁹. Sic quippe incidunt ex multiloquio etiam in falsiloquium.

III. Scribere autem ista mihi placuit, ut haec emittam in manus hominum, a quibus ea quae iam edidi revocare [433] emendanda non possum. Nec illa sane praetereo quae cathecuminus iam, licet relictæ spe, quam terrenam gerebam, sed adhuc saecularium litterarum inflatus consuetudine scripsi, quia et ipsa exierunt in notitiam describentium atque legentium, et leguntur utiliter, si nonnullis ignoscatur; vel si non ignoscatur, non tamen inhaereatur erratis. Quapropter quicumque ista lecturi sunt, non me imitentur errantem, sed in melius proficientem. Inveniet enim fortasse quomodo scribendo profecerim¹⁰, quisquis opuscula mea ordine quo scripta sunt legerit. Quod ut possit, hoc opere quantum potero curabo, ut eundem ordinem noverit.

⁹ Cf. Io 8, 44.

¹⁰ Cf. *Ep.* 143, 2.

LIBER PRIMUS

In quo retratantur libri, quos scripsit nondum episcopus.

CAPUT I. CONTRA ACADEMICOS LIBRI TRES.

I. Cum ergo reliquissem vel quae adeptus fueram in cupiditatibus huius mundi vel quae adipisci volebam, et me ad christianae vitae otium contulissem, nondum baptizatus *Contra Academicos* vel *De Academicis* primum scripsi, ut argumenta eorum, quae multis ingerunt veri inveniendi desperationem, et prohibent cuiquam rei assentiri, et omnino aliquid, tamquam manifestum certumque sit approbare sapientem, cum eis omnia videantur obscura et incerta, ab animo meo, quia et me movebant, quantis possem rationibus amoverem. Quod miserante atque adiuvante Domino factum est.

II. Sed in eisdem tribus libris meis non mihi placet *toties me appellasse fortunam*¹¹, quamvis non aliquam deam voluerim hoc nomine intellegi, sed fortuitum rerum eventum vel in corporis nostri vel in externis bonis aut malis. Unde et illa verba sunt, quae nulla religio dicere prohibet: forte, forsan, forsitan, fortasse, fortuito, quod tamen totum ad divinam revocandum est providentiam. Hoc etiam ibi non tacui dicens: *Etenim fortasse quae* [435] *vulgo fortuna nominatur, occulto quodam ordine regitur, nihilque aliud in rebus casum vocamus, nisi*

¹¹ *C. Acad.* 1, 1, 1.

*cuius ratio et causa secreta est*¹². Dixi quidem hoc ; verumtamen paenitet me sic illic nominasse fortunam, cum videam homines habere in pessima consuetudine, ubi dici debet : hoc Deus voluit, dicere : hoc voluit fortuna. Quod autem quodam loco dixi : *Ita comparatum est sive pro meritis nostris sive pro necessitate naturae, ut divinum animum mortalibus inhaerentem nequaquam philosophiae portus accipiat* et cetera¹³, aut nihil horum duorum dicendum fuit, quia etiam sic sensus posset esse integer, aut satis erat dicere : *pro meritis nostris*, sicut verum est ex Adam tracta miseria¹⁴, nec addere : *sive pro necessitate naturae*, quando quidem naturae nostrae dura necessitas merito praecedentis iniquitatis exorta est. Itemque illic quod dixi : *Nihil omnino colendum esse, totumque abiciendum quidquid mortalibus oculis cernitur, quidquid ullus sensus attingit*¹⁵, addenda erant verba ut diceretur : *quidquid* mortalis corporis *ullus sensus attingit* ; est enim sensus et mentis. Sed eorum more tunc loquebar, qui sensum nonnisi corporis dicunt et sensibilia nonnisi corporalia. Itaque ubicumque sic locutus sum, parum est ambiguitas evitata, nisi apud eos quorum consuetudo est locutionis huius. Item dixi : *Quid censes aliud esse beate vivere, nisi secundum id, quod in homine optimum*

¹² C. Acad. 1, 1, 3.

¹³ Ibidem.

¹⁴ Cf. Rom 5, 12.

¹⁵ C. Acad. 1, 1, 3.

*est vivere?*¹⁶ et quid dixerim *in homine esse optimum* paulo post explicans : *Quis, inquam, dubitaverit nihil esse aliud hominis optimum quam eam partem animi, cui dominanti obtemperare convenit cetera quaeque in homine sunt?* Haec autem, *ne aliam postules definitionem, mens aut ratio dici potest*¹⁷. Hoc quidem verum est ; nam quantum attinet ad hominis naturam, nihil est in eo [436] melius quam mens et ratio. Sed non secundum ipsam debet vivere, qui beate vult vivere, alioquin secundum hominem vivit, cum *secundum Deum vivendum sit*¹⁸, ut possit ad beatitudinem pervenire ; propter quam consequendam non se ipsa debet esse contenta, sed Deo mens nostra subdenda est. Item respondens ei cum quo disputabatur : *Hic plane, inquam, non erras, quod ut tibi omen sit ad reliqua, libenter optaverim*¹⁹. Hoc licet non serio sed ioco dictum sit, nollem tamen eo verbo uti. *Omen* quippe me legisse non recolo sive in sacris Litteris nostris²⁰, sive in sermone cuiusquam ecclesiastici disputatoris, quamvis abominatio inde sit dicta, quae in divinis Libris assidue reperitur.

III. In secundo autem libro, prorsus inepta est et insulsa illa quasi fabula de philocalia et

¹⁶ *C. Acad.* 1, 2, 5.

¹⁷ *Ibidem.*

¹⁸ Cf. 1 Pt 4, 6.

¹⁹ *C. Acad.* 1, 4, 11.

²⁰ *Omen* tamen legimus 3 Reg. XX, 33. At S. augustinus vel non legerat in versione, qua utebatur ; vel quia sermo ibi est de paganis viris, profani vocabuli usum inde approbandum esse non existimavit.

philosophia, quod *sint germanae et eodem parente procreatae*²¹. Aut enim philocalia quae dicitur nonnisi in nugis est, et ob hoc philosophiae nulla ratione germana ; aut si propterea est hoc nomen honorandum, quia Latine interpretatum amorem significat pulchritudinis, et est vera ac summa sapientiae pulchritudo, eadem ipsa est in rebus incorporalibus atque summis philocalia quae philosophia, neque ullo modo sunt quasi sorores duae. Alio loco de animo cum agerem dixi : *Securior rediturus in caelum*²². Iturus autem quam *rediturus* dixissem securius, propter eos qui putant animos humanos pro meritis peccatorum suorum de caelo lapsos sive deiectos in corpora ista detrudi²³. Sed hoc ego propterea non dubitavi dicere, quia ita dixi *in caelum*, tamquam dicerem : *ad Deum*, qui eius est [437] auctor et conditor, sicut beatus Cyprianus non cunctatus est dicere : *Nam cum corpus e terra spiritum possideamus e caelo, ipsi terra et caelum sumus*²⁴, et in libro *Ecclesiastae* scriptum est : *Spiritus revertatur ad Deum qui dedit illum*²⁵ ; Quod utique sic intellegendum est, ut non resistatur Apostolo dicenti : *Nondum natos nihil egisse boni aut mali*²⁶. Sine controversia ergo

²¹ C. Acad. 2, 3, 7.

²² C. Acad. 2, 9, 22.

²³ Platonicos, ut videre est lib. 23 de Civit. c. 26. — Cf. Plot., Enn. 4, 8, 5; Orig., Princ. 1, 6, 23.

²⁴ Cypr., De Dom. Orat. 16.

²⁵ Eccle 12, 7.

²⁶ Cf. Rom 9, 11.

quaedam originalis regio beatitudinis animi Deus ipse est, qui eum non quidem de se ipso genuit, sed de nulla re alia condidit, sicut condidit corpus e terra. Nam quod attinet ad eius originem, qua fit ut sit in corpore, utrum de illo uno sit qui primum creatus est, quando factus est homo in animam vivam²⁷, an similiter ita fiant singulis singuli, nec tunc sciebam nec adhuc scio.

IV. In libro tertio : *Si quid mihi videatur quaeris*, inquam, *in mente arbitror esse summum hominis bonum*²⁸. Verius dixissem : in Deo ; ipso enim mens fruitur, ut beata sit, tamquam summo bono suo. Nec illud mihi placet quod dixi : *Liquet deierare per omne divinum*²⁹. Item quod dixi de Academicis, *quia noverant verum, cuius simile appellabant veri simile, idque ipsum veri simile appellavi falsum quod approbabant*³⁰, duas ob causas non recte dictum est : vel quod falsum esset quod aliquo modo esset simile alicuius veri, quia in genere suo et hoc verum est, vel quod approbabant ista falsa, quae vocabant veri similia, cum illi nihil approbarent et affirmarent nihil approbare sapientem. Sed quia hoc ipsum veri simile etiam probabile nuncupabant, hinc factum est ut hoc de illis dicerem. Laus quoque ipsa qua Platonem vel Platonicos sive Academicos philosophos tantum

²⁷ Cf. Gen 2, 7.

²⁸ C. Acad. 3, 12, 27.

²⁹ C. Acad. 3, 16, 35 ; De serm. Dom. in m. 1, 17, 51-52.

³⁰ C. Acad. 3, 18, 40.

extuli³¹, quantum impios homines non oportuit, non immerito mihi displicuit, praesertim [438] quorum contra errores magnos defendenda est christiana doctrina. Illud etiam quod in comparatione argumentorum Ciceronis, quibus in libris suis Academicis usus est, meas nugas esse dixi³², quibus illa argumenta certissima ratione refutavi, quamvis iocando dictum sit et magis ironia videatur, non debuit tamen dici.

Hoc opus sic incipit : *O utinam, Romaniane, hominem sibi aptum.*

CAPUT II. DE BEATA VITA, LIBER UNUS.

Librum *De beata vita* non post libros *De Academicis*, sed inter illos ut scriberem contigit. Ex occasione quippe ortus est diei natalis mei, et tridui disputatione completus, sicut satis ipse indicat. In quo libro constitit inter nos, qui simul quaerebamus, non esse beatam vitam nisi perfectam cognitionem Dei. Displicet autem illic quod Manlio Theodoro, ad quem librum ipsum scripsi, quamvis docto et christiano viro, plus tribui quam deberem³³; et quod fortunam etiam illic saepe nominavi³⁴; et quod tempore vitae huius in solo animo sapientis dixi habitare beatam

³¹ Cf. *C. Acad.* 2, 10, 24; 3, 17, 37. 18, 41.

³² *C. Acad.* 3, 20, 45.

³³ *De b. vita* 1, 5.

³⁴ *Ibidem.*

vitam, quomodolibet se habeat corpus eius³⁵, cum perfectam cognitionem Dei, hoc est qua homini maior esse non possit, in futura vita speret Apostolus³⁶, quae sola beata vita dicenda est, ubi et corpus incorruptibile atque immortale³⁷ spiritui suo sine ulla molestia vel reluctance subdetur. Sane istum librum in nostro codice interruptum repperi, et non parum minus habere ; et sic a fratribus quibusdam [439] descriptus est, nec adhuc apud aliquem integrum inveneram, ex quo emendarem, quando haec retractavi.

Hic liber sic incipit : *Si ad philosophiae portum.*

CAPUT III. DE ORDINE, LIBRI DUO.

I. Per idem tempus inter illos qui *De Academicis* scripti sunt, duos etiam libros *De ordine* scripsi, in quibus magna quaestio versatur, utrum omnia bona et mala divinae providentiae ordo contineat. Sed cum rem viderem ad intellegendum difficilem, satis aegre ad eorum perceptionem, cum quibus agebam, disputando posse perducere, *de Ordine* studendi loqui malui, quo a corporalibus ad incorporalia potest profici.

II. Verum et in his libris displicet mihi saepe interpositum *fortunae* vocabulum³⁸ ; et quod non addebam : *corporis*, quando sensus corporis

³⁵ *De b. vita* 4, 25.

³⁶ Cf. 1 Cor 13, 12.

³⁷ 1 Cor 15, 53.

³⁸ *De ord.* 2, 9, 27.

nominavi³⁹. Et quod multum tribui liberalibus disciplinis⁴⁰, quas multi sancti multum nesciunt ; quidam etiam qui sciunt eas, sancti non sunt⁴¹ ; et quod *Musas* quasi aliquas deas, quamvis iocando commemoravi⁴² ; et quod *admirationem vitium* nuncupavi⁴³ ; et quod philosophos non vera pietate praeditos dixi virtutis luce fulsisse⁴⁴ ; et quod *duos mundos, unum sensibilem alterum intellegibilem*⁴⁵, non ex Platonis vel ex Platoniorum persona, sed ex mea sic commendavi, tamquam hoc etiam Dominus significare voluerit⁴⁶, quia non ait : " Regnum meum non est de mundo ", sed : *Regnum meum non est de hoc mundo*⁴⁷, cum [440] possit et aliqua locutione dictum inveniri ; et si alius a Domino Christo significatus est mundus, ille congruentius possit intellegi, in quo erit *caelum novum et terra nova*⁴⁸, quando complebitur quod oramus dicentes : *Adveniat regnum tuum*⁴⁹. Nec Plato quidem in hoc erravit, quia esse mundum intellegibilem dixit, si non vocabulum quod

³⁹ *De ord.* 1, 1, 3.

⁴⁰ Cf. *Retract.* 1, 1, 2.

⁴¹ *De ord.* 1, 5, 15. 8, 24 ; 2, 14, 39.

⁴² *De ord.* 1, 3, 6. 8, 24 ; 2, 14, 41.

⁴³ *De ord.* 1, 3, 8.

⁴⁴ *De ord.* 1, 11, 31.

⁴⁵ Cf. Plat., *De rep.* 508c.

⁴⁶ *De ord.* 1, 11, 32.

⁴⁷ Io 18, 36.

⁴⁸ Isa 65, 17 ; 66, 22 ; 2 Pt 3, 13 ; Apoc 21, 1.

⁴⁹ Matth. 6, 10.

ecclesiasticae consuetudini in re illa inusitatum est, sed ipsam rem velimus attendere. Mundum quippe ille intellegibilem nuncupavit ipsam rationem sempiternam atque incommutabilem, qua fecit Deus mundum. Quam qui esse negat, sequitur ut dicat irrationabiliter Deum fecisse quod fecit aut, cum faceret vel antequam faceret, nescisse quid faceret, si apud eum ratio faciendi non erat. Si vero erat, sicut erat, ipsam videtur Plato vocasse intellegibilem mundum. Nec tamen isto nomine nos uteremur, si iam satis essemus litteris ecclesiasticis eruditi.

III. Nec illud mihi placet, quod cum dixissem : *Summa opera danda est optimis moribus*, mox addidi : *Deus enim noster aliter nos exaudire non poterit, bene autem viventes facillime exaudiet*⁵⁰. Sic enim dictum est tamquam Deus non exaudiat peccatores⁵¹, quod quidam dixit in Evangelio, sed ille qui nondum cognoverat Christum, a quo iam fuerat illuminatus in corpore. Nec illud mihi placet, quod Pythagorae philosopho tantum laudis dedi⁵², ut qui hanc audit vel legit possit putare, me credidisse nullos errores in Pythagorica esse doctrina, cum sint plures idemque capitales.

Hoc opus sic incipit : *De ordine rerum, Zenobi.*
[441]

⁵⁰ *De ord.* 2, 20, 52.

⁵¹ Io 9, 31.

⁵² *De ord.* 2, 20, 53.

CAPUT IV. SOLILOQUIORUM, LIBRI DUO.

I. Inter haec scripsi etiam duo volumina secundum studium meum et amorem ratione indagandae veritatis de his rebus quas maxime scire cupiebam, me interrogans mihiq̃ue respondens, tamquam duo essemus, ratio et ego, cum solus essem, unde hoc opus *Soliloquia* nominavi. Sed imperfectum remansit, ita tamen ut in primo libro quaeretur et utcumque appareret, qualis esse debeat qui vult percipere sapientiam, quae utique non sensu corporis sed mente percipitur, et quadam ratiocinatione in libri fine colligitur, ea quae vere sunt esse immortalia. In secundo autem de immortalitate animae diu res agitur et non peragitur.

II. In his sane libris non approbo, quod in oratione dixi : *Deus, qui nisi mundos verum scire noluisti*⁵³. Responderi enim potest multos etiam non mundos multa scire vera ; neque enim definitum est hic, quid sit verum, quod nisi mundi scire non possint, et quid sit scire ; et illud quod ibi positum est : *Deus, cuius regnum est totus mundus, quem sensus ignorat*⁵⁴. Si Deus intellegendus est, addenda fuerant verba ut diceretur *quem* mortalis corporis *sensus ignorat*. Si autem mundus dictus est quem sensus ignorat, ille recte intellegitur qui futurus est *caelo novo et terra nova*⁵⁵ ; sed etiam hic

⁵³ *Solil.* 1, 1, 2.

⁵⁴ *Solil.* 1, 1, 3.

⁵⁵ Isa 65, 17 ; 66, 22.

addenda erant illa ut diceretur : mortalis corporis sensus. Sed illo more adhuc loquebar, quo sensus proprie corporis appellatur ; nec assidue repetendum est quod et [442] superius inde iam dixi⁵⁶, sed hoc recolendum ubicumque ista locutio in meis litteris invenitur.

III. Et ubi dixi de Patre et Filio : *Qui gignit et quem gignit unum est*⁵⁷, dicendum fuit : " unum sunt ", sicut aperte ipsa Veritas loquitur dicens : *Ego et Pater unum sumus*⁵⁸. Nec illud mihi placet, *quod in ista vita Deo intellecto iam beatam esse animam*⁵⁹ dixi, nisi forte spe. Item quod dixi : *Ad sapientiae coniunctionem non una via perveniri*⁶⁰, non bene sonat, quasi alia via sit praeter Christum qui dixit : *Ego sum via*⁶¹. Vitanda ergo erat haec offensio aurium religiosarum, quamvis alia sit illa universalis via, aliae autem viae de quibus et in Psalmo canimus : *Vias tuas, Domine, notas fac mihi, et semitas tuas doce me*⁶². Et in eo quod ibi dictum est : *Penitus esse ista sensibilia fugienda*⁶³, cavendum fuit, ne putaremur illam Porphyrii falsi philosophi tenere sententiam, qua dixit omne corpus esse fugiendum⁶⁴. Non

⁵⁶ *Retract.* 1, 1, 2.

⁵⁷ *Solil.* 1, 1, 4.

⁵⁸ Io 10, 30.

⁵⁹ *Solil.* 1, 7, 14.

⁶⁰ *Solil.* 1, 13, 23.

⁶¹ Io 14, 6.

⁶² Ps 24, 4.

⁶³ *Solil.* 1, 14, 24.

⁶⁴ Porf., *Ad Marc.* 8, 32, 34 ; cf. *De civ. Dei* 10, 29 ; 22, 12, 26-28.

autem dixi ego " omnia " sensibilia sed *ista*, hoc est corruptibilia. Sed hoc potius dicendum fuit ; non autem talia sensibilia futura sunt in futuri saeculi *caelo novo et terra nova*.

IV. Item quodam loco dixi quod *disciplinis liberalibus eruditi, sine dubio in se illas oblivione obrutas eruunt discendo et quodammodo refodiunt*⁶⁵. Sed hoc quoque improbo. Credibilis est enim propterea vera respondere de quibusdam disciplinis etiam imperitos earum, quando bene interrogantur, quia praesens est eis, quantum id capere possunt, lumen rationis aeternae, ubi haec immutabilia vera conspiciunt, non quia ea noverant aliquando et obliiti sunt, quod Platoni vel talibus visum est⁶⁶. Contra quorum opinionem, quanta pro [443] suscepto opere dabatur occasio, in libro duodecimo *De Trinitate* disserui⁶⁷.

Hoc opus sic incipit : *Volenti mihi multa ac varia mecum*.

CAPUT V. DE IMMORTALITATE ANIMÆ, LIBER UNUS.

I. Post libros *Soliloquiorum* iam de agro Mediolanum reversus, scripsi librum *De immortalitate animae*, quod mihi quasi commonitorium esse volueram propter *Soliloquia* terminanda, quae imperfecta remanserant. Sed

⁶⁵ *Solil.* 2, 20, 35.

⁶⁶ Plat., *Phedon* 72e ; *Menon* 81e-86b.

⁶⁷ *De Trin.* 12, 15, 24.

nescio quomodo me invito exiit in manus hominum, et inter mea opuscula nominatur. Qui primo ratiocinationum contortione atque brevitate sic obscurus est, ut fatiget cum legitur etiam intentionem meam, vixque intellegatur a me ipso.

II. Deinde cogitans nihil aliud quam animos hominum in quadam argumentatione eiusdem libri dixi : *Nec esse in eo quod nihil discit disciplina potest*⁶⁸. Itemque alio loco dixi : *Nec ullam rem scientia complectitur, nisi quae ad aliquam pertinet disciplinam*⁶⁹ ; nec venit in mentem Deum non discere disciplinam, sed habere omnium rerum scientiam, in qua etiam praescientia est futurorum. Tale est illud quod ibi dictum est : *non esse vitam cum ratione ulli nisi animae*⁷⁰ ; neque enim Deo sine ratione vita est, cum apud eum et summa vita et summa sit ratio ; et illud, quod aliquanto superius dixi : *Id quod intellegitur eiusmodi esse semper*⁷¹, cum intellegatur et animus, qui utique non eiusmodi est semper. Quod vero dixi : *Animum propterea non posse ab aeterna ratione separari, quia non ei localiter iungitur*⁷², profecto non dixissem, si iam tunc essem Litteris sacris ita eruditus, ut recolerem quod scriptum est : *Peccata vestra*

⁶⁸ *De imm. an.* 1, 1.

⁶⁹ *Ibidem.*

⁷⁰ *De imm. an.* 4, 5.

⁷¹ *De imm. an.* 1, 1.

⁷² *De imm. an.* 6, 11.

*separant inter vos et Deum*⁷³. Unde intellegi datur etiam earum rerum posse dici separationem, quae non locis sed incorporaliter iunctae fuerant.

III. Quid sit etiam quod dixi : *Anima si caret corpore, in hoc mundo non est*⁷⁴, non potui recordari. Numquid enim animae mortuorum aut non carent corpore aut in hoc mundo non sunt, quasi vero inferi non sint in hoc mundo ? Sed quia carere corpore in bono posui, fortasse nomine corporis pestes corporeas appellavi. Quod si ita est, nimis insolenter verbo usus sum. Illud quoque temere dictum est : *A summa essentia speciem corpori per animam tribui, qua est, in quantumcumque est. Per animam ergo corpus subsistit, et eo ipso est quo animatur, sive universaliter, ut mundus, sive particulariter, ut unumquodque animal intra mundum*⁷⁵. Hoc totum prorsus temere dictum est.

Hic liber sic incipit : *Si alicubi est disciplina.*

CAPUT VI. DISCIPLINARUM LIBRI.

6. Per idem tempus, quo Mediolani fui baptismum percepturus, etiam *Disciplinarum libros* conatus sum scribere, interrogans eos qui mecum erant atque ab huiusmodi studiis non abhorrebant ; per corporalia cupiens ad incorporalia quibusdam quasi passibus certis vel pervenire vel ducere. Sed earum solum *De*

⁷³ Isa 59, 2.

⁷⁴ *De imm. an.* 13, 22.

⁷⁵ *De imm. an.* 15, 24.

grammatica librum absolvere potui, quem postea de armario nostro perdidi, et *De musica* sex volumina, quantum attinet ad eam partem quae *rithmus* vocatur. Sed eosdem sex libros iam baptizatus iamque ex Italia regressus in Africam scripsi, inchoaveram quippe tantummodo istam apud Mediolanum disciplinam. De aliis vero quinque disciplinis illic similiter inchoatis - de dialectica, de rethorica, de geometria, de arithmetica, de philosophia - sola principia remanserunt, quae tamen etiam ipsa perdidimus ; sed haberi ab aliquibus existimo.

CAPUT VII. DE MORIBUS ECCLESIAE CATHOLICAE ET DE MORIBUS MANICHAeorum, LIBRI DUO.

I. Iam baptizatus autem cum Romae essem, nec ferre tacitus possem Manichaeorum iactantiam de falsa et fallaci continentia vel abstinencia, qua se ad imperitos decipiendos, veris Christianis, quibus comparandi non sunt, insuper praeferunt, scripsi duos libros, unum *De moribus Ecclesiae catholicae*, et alterum *De moribus Manichaeorum*.

II. In eo igitur qui est *De moribus Ecclesiae catholicae*, ubi posui testimonium in quo legitur : *Propter te afficimur tota die, aestimati sumus ut oves occisionis*⁷⁶, mendositas nostri codicis me fefellit minus memorem Scripturarum, in quibus nondum assuetus eram. Nam eiusdem

⁷⁶ *De mor. Eccl. cath.* 1, 9, 14 ; cf. Ps 43, 22 ; Rom 8, 36.

interpretationis alii codices non habent : *propter te afficimur*, sed : *propter te morte afficimur*, quod uno verbo alii dixerunt : *mortificamur*. Hoc esse verius Greci libri indicant, ex qua lingua in Latinam secundum *Septuaginta* interpretes veterum divinarum Scripturarum est facta translatio. Et tamen secundum haec verba, id est : *propter te afficimur*, multa disputans dixi, quae in ipsis rebus non tamquam falsa improbo. Verumtamen convenientiam Scripturarum veterum et novarum, quam demonstrare cupiebam, ex his dumtaxat verbis non utique demonstravi. Unde autem mihi error obrepserit dixi ; [447] ex aliis vero testimoniis eandem convenientiam sufficienter ostendi.

III. Similiter et paulo post testimonium posui de libro *Sapientiae* secundum codicem nostrum, in quo scriptum erat : *Sobrietatem enim sapientia docet et iustitiam et virtutem*⁷⁷. Et secundum haec verba disserui res quidem veras, sed ex occasione mendositatis inventas. Quid enim verius quam quod sapientia doceat veritatem contemplationis, quam nomine sobrietatis significatam putavi, et actionis probitatem, quam per duo alia intellegi volui, per iustitiam atque virtutem, cum codices eiusdem interpretationis veriores habeant : *Sobrietatem enim et sapientiam docet et iustitiam et virtutem* ? His enim nominibus Latinus interpret quattuor illas virtutes, quae maxime in ore

⁷⁷ Sap 8, 7.

philosophorum esse assolent, nominavit, sobrietatem appellans temperantiam, prudentiae imponens nomen sapientiam, fortitudinem vero virtutis vocabulo enuntians, solam iustitiam suo nomine interpretatus est. Has autem quattuor virtutes in eodem libro *Sapientiae* suis nominibus appellatas, sicut a Grecis vocantur, longe postea repperimus in codicibus Grecis. Item quod posui de libro Salomonis : *Vanitas vanitantium dixit Ecclesiastes*, in multis quidem codicibus legi ; sed hoc Grecus non habet, habet autem *vanitas vanitatum*⁷⁸, quod postea vidi et inveni eos Latinos esse veriores, qui habent *vanitatum* non *vanitantium*. Ex occasione tamen huius mendositatis quaecumque disserui vera esse ipsis rebus apparet.

IV. Quod autem dixi : *Eum ipsum quem cognoscere volumus*, hoc est Deum, *prius plena caritate diligamus*⁷⁹, melius diceretur " sincera " quam *plena*, ne forte putaretur caritatem Dei non futuram esse maiorem, quando [448] videbimus *facie ad faciem*⁸⁰. Sic itaque hoc accipiatur, tamquam plena dicta sit qua maior esse non possit, quamdiu ambulamus per fidem ; erit enim plenior immo plenissimus, sed per speciem. Item quod dixi de his qui subveniunt indigentibus, quia *misericordes vocantur, etiam si sapientes usque adeo sint, ut iam nullo animi*

⁷⁸ *De mor. Eccl. cath.* 1, 21, 39 ; cf. *Eccli* 1, 2.

⁷⁹ *De mor. Eccl. cath.* 1, 25, 47.

⁸⁰ 1 *Cor* 13, 12.

*dolore turbentur*⁸¹, non sic accipiendum est, tamquam definierim in hac vita esse tales sapientes ; non enim dixi : " cum sint ", sed dixi : *etiam si sint*.

V. Alio loco ubi dixi : *Iam vero cum haec humana dilectio inhaerentem uberibus tuis nutriverit et roboraverit animum, sequendo Deo factum idoneum, ubi eius maiestas ex tanta parte, quanta homini, dum terrae huius inhabitator est, sufficit aperire se coeperit, tantus caritatis ardor innascitur, et tantum divini amoris consurgit incendium, ut exustis omnibus vitiis et homine sanctificato atque purgato satis appareat, quam divine dictum sit : " Ego sum ignis consumens "*⁸², possunt putare Pelagiani istam perfectionem in hac mortali vita me dixisse posse contingere. Sed non hoc putent ; ardor quippe caritatis sequendo Deo factus idoneus et tam magnus, ut vitia cuncta consumat, in hac vita nasci et crescere potest, perficere vero propter quod nascitur, ut nullum insit homini vitium, non consequenter hic potest, quamvis tanta ista res eodem ardore caritatis perficiatur, ubi perfici et quando perfici potest, ut quemadmodum lavacrum regenerationis purgat a reatu omnium peccatorum, quae humana traxit nativitas et contraxit iniquitas, ita illa perfectio purget ab omnium labe vitiorum, sine quibus esse non potest humana in hoc saeculo infirmitas ; sicut accipiendum est etiam quod ait Apostolus :

⁸¹ *De mor. Eccl. cath.* 1, 27, 53.

⁸² *De mor. Eccl. cath.* 1, 30, 64 ; *Hebr* 12, 29.

*Christus dilexit [449] Ecclesiam, et se ipsum tradidit pro ea, mundans eam lavacro aquae in verbo, ut exhiberet sibi gloriosam Ecclesiam, non habentem maculam aut rugam aut aliquid eiusmodi*⁸³. Hic est enim *lavacrum aquae in verbo* quo mundatur Ecclesia. Sed cum tota dicat, quamdiu hic est : *Dimitte nobis debita nostra*⁸⁴, non utique hic est *sine macula aut ruga aut aliquid eiusmodi* ; ex eo tamen quod hic accipit, ad illam gloriam, quae hic non est, perfectionemque perducitur.

VI. In alio libro, cuius est titulus : *De moribus Manichaeorum*, illud quod dixi : *Dei bonitas omnia deficientia sic ordinat, ut ibi sint ubi congruentissime possint esse, donec ordinatis motibus ad id recurrant unde defecerunt*⁸⁵, non sic accipiendum est, tamquam omnia *recurrant ad id unde defecerunt*, sicut Origeni visum est⁸⁶, sed ea omnia quae recurrunt. Non enim recurrunt ad Deum a quo defecerunt, qui sempiterno igne punientur, quamvis omnia deficientia sic ordinentur, ut ibi sint ubi congruentissime possint esse, quia et illi qui non recurrunt congruentissime in poena sunt. Alio loco : *Nemo fere, inquam, de scarabeis dubitat, quin de fimo in pilam rotundato ab his atque obruto existant*⁸⁷,

⁸³ Eph 5, 25. 27.

⁸⁴ Matth. 6, 12.

⁸⁵ *De mor. Eccl. cath.* 2, 7, 9.

⁸⁶ Orig., *De princ.* 2, 3, 3.

⁸⁷ *De mor. Eccl. cath.* 2, 17, 63.

cum hoc utrum verum sit multi dubitent, multi ne audiverint quidem.

Hoc opus sic incipit : *In aliis libris satis opinor egisse nos.*

CAPUT VIII. DE ANIMAE QUANTITATE, LIBER UNUS.

I. In eadem urbe scripsi dialogum, in quo de anima multa quaeruntur ac disseruntur ; id est unde sit, qualis sit, quanta sit, cur corpori fuerit data, cum ad corpus venerit qualis efficiatur, qualis cum abscesserit⁸⁸. Sed quoniam quanta sit, diligentissime ac subtilissime disputatum est, ut eam, si possemus, ostenderemus corporalis quantitatis non esse et tamen magnum aliquid esse, ex hac una inquisitione totus liber nomen accepit, ut appellaretur : *De animae quantitate.*

II. In quo libro illud quod dixi : *Omnes artes animam secum attulisse mihi videri, nec aliud quidquam esse id quod dicitur discere quam reminisci ac recordari*⁸⁹, non sic accipiendum est, quasi ex hoc approbetur animam vel hic in alio corpore vel alibi sive in corpore sive extra corpus aliquando vixisse, et ea quae interrogata respondet, cum hic non didicerit, in alia vita ante didicisse⁹⁰. Fieri enim potest, sicut iam in hoc opere supra diximus⁹¹, ut hoc ideo

⁸⁸ *De quant. an.* 1, 1.

⁸⁹ *De quant. an.* 20, 34.

⁹⁰ Cf. *De Trin.* 12, 15, 24 ; Plat., *Phaedo* 72.

⁹¹ *Retract.* 1, 4, 4.

possit, quia natura intellegibilis est et connectitur non solum intellegibilibus, verum etiam immutabilibus rebus, eo ordine facta, ut cum se ad eas res movet quibus connexa est vel ad se ipsam, in quantum eas videt, in tantum de his vera respondeat. Nec sane omnes artes eo modo secum attulit ac secum habet ; nam de artibus quae ad sensus corporis pertinent, sicut multa medicinae, [451] sicut astrologiae omnia, nisi quod hic didicerit, non potest dicere. Ea vero quae sola intellegentia capit propter id quod dixi, cum vel a se ipsa vel ab alio fuerit bene interrogata, et recordata respondet.

III. Alio loco : *Vellem, inquam, hinc plura dicere ac me ipsum constringere, dum quasi tibi praecipio, ut nihil aliud agerem quam redderem mihi, cui me maxime debeo*⁹², ubi videor dicere potius debuisse *redderem Deo, cui me maxime debeo*. Sed quoniam prius sibi ipse homo reddendus est, ut illic quasi gradu facto inde surgat atque attollatur ad Deum, sicut filius ille minor prius reversus est ad semet ipsum et tunc ait : *Surgam et ibo ad patrem meum*⁹³, ideo sic sum locutus. Denique mox addidi : *Atque ita fieri amicum mancipium Domino*⁹⁴. Quod ergo dixi : *cui me maxime debeo*, ad homines retuli ; magis enim mihi me debeo quam hominibus ceteris, quamvis Deo magis quam mihi.

⁹² *De quant. an.* 28, 55.

⁹³ Lucas 15, 18.

⁹⁴ *De quant. an.* 28, 55 ; *Hor.Sat.* 2, 7, 2-3.

Hic liber sic incipit : *Quoniam video te abundare otio.*

CAPUT IX. DE LIBERO ARBITRIO, LIBRI TRES.

I. Cum adhuc Romae demoraremur, volumus disputando quaerere unde sit malum. Et eo modo disputavimus ut, si possemus, id quod de hac re divinae auctoritati subditi credebamus, etiam ad intellegentiam nostram, quantum disserendo opitulante Deo agere possemus, ratio considerata et tractata perduceret. Et quoniam constitit inter nos diligenter ratione discussa, malum non exortum nisi ex libero voluntatis arbitrio, tres libri, [452] quos eadem disputatio peperit appellati sunt : *De libero arbitrio*. Quorum secundum et tertium in Africa, iam Hippone Regio presbyter ordinatus, sicut tunc potui, terminavi.

II. In his libris ita multa disserta sunt, ut incidentes nonnullae quaestiones, quas vel enodare non poteram vel longam sermocinationem in praesenti requirebant, ita differrentur, ut ex utraque parte vel ex omnibus earumdem quaestionum partibus, in quibus non apparebat quid potius congrueret veritati, ad hoc tamen ratiocinatio nostra concluderetur, ut, quodlibet eorum verum esset, laudandus crederetur, vel etiam ostenderetur Deus⁹⁵. Propter eos quippe disputatio illa suscepta est, qui negant

⁹⁵ Cf. *De lib. arb.* 1, 2, 4. 16, 35 ; 3, 16, 46. 22, 65.

ex libero voluntatis arbitrio mali originem duci, et Deum, si ita est, creatorem omnium naturarum culpandum esse contendunt; eo modo volentes secundum suae impietatis errorem (Manichaei enim sunt) immutabilem quamdam et Deo coaeternam introducere naturam mali. De gratia vero Dei, qua suos electos sic praedestinavit, ut eorum qui iam in eis utuntur libero arbitrio ipse etiam praepararet voluntates, nihil in his libris disputatum est propter hanc propositam quaestionem. Ubi autem incidit locus ut huius gratiae fieret commemoratio, transeunter commemorata est; non, quasi inde ageretur, operosa ratiocinatione defensa. Aliud est enim quaerere, unde sit malum, et aliud est quaerere, unde redeatur ad pristinum vel ad maius perveniatur bonum.

III. Quapropter novi haeretici Pelagiani, qui liberum sic asserunt voluntatis arbitrium, ut gratiae Dei non relinquunt locum, quandoquidem eam secundum merita nostra dari asserunt, non se extollant, quasi eorum egerim causam, quia multa in his libris dixi pro libero arbitrio, quae illius disputationis causa possebat. Dixi [453] quippe in primo libro: *Malefacta iustitia Dei vindicari*, et addidi: *Non enim iuste vindicarentur, nisi fierent voluntate*⁹⁶. Item cum ipsam bonam voluntatem tam magnum bonum esse monstrarem, ut omnibus corporeis et externis bonis merito

⁹⁶ *De lib. arb.* 1, 1, 1.

anteponeretur, dixi : *Vides igitur iam, ut existimo, in voluntate nostra esse constitutum, ut hoc vel fruamur vel careamus tanto et tam vero bono. Quid enim tam in voluntate quam ipsa voluntas sita est ?*⁹⁷ Et alio loco : *Quid ergo causae est, inquam, cur dubitandum putemus, etiam si numquam antea sapientes fuimus, voluntate nos tamen laudabilem et beatam vitam, voluntate turpem et miseram mereri ac degere ?*⁹⁸ Item alio loco : *Ex quo conficitur, inquam, ut quisquis recte honesteque vult vivere, si id se velle prae fugacibus rebus velit, assequatur tantam rem tanta facilitate, ut nihil aliud ei, quam ipsum velle, sit habere quod voluit*⁹⁹. Itemque alibi dixi : *Hoc enim aeterna lex illa, ad cuius considerationem redire iam tempus est, incommutabili stabilitate firmavit, ut in voluntate meritum sit, in beatitudine autem et miseria praemium atque supplicium*¹⁰⁰. Et alio loco : *Quid, inquam, quisque sectandum et amplectendum eligat, in voluntate esse positum constitit*¹⁰¹. Et in libro secundo : *Homo enim ipse, inquam, in quantum homo est, aliquod bonum est, quia recte vivere cum vult potest*¹⁰². Et alio loco dixi : *Recte fieri non posse nisi eodem libero voluntatis arbitrio*¹⁰³. Et in libro tertio : *Quid opus est quaeri, inquam, unde iste motus existat, quo voluntas avertitur ab incommutabili bono ad commutabile bonum,*

⁹⁷ *De lib. arb.* 1, 12, 26.

⁹⁸ *De lib. arb.* 1, 13, 28.

⁹⁹ *De lib. arb.* 1, 13, 29.

¹⁰⁰ *De lib. arb.* 1, 14, 30.

¹⁰¹ *De lib. arb.* 1, 16, 34.

¹⁰² *De lib. arb.* 2, 1, 2.

¹⁰³ *De lib. arb.* 2, 18, 47.

cum eum non nisi animi et voluntarium et ob hoc culpabilem esse fateamur, omnisque de hac re disciplina utilis ad id valeat, ut eo motu [454] improbato atque cohibito voluntatem nostram ad perfruendum sempiterno bono a lapsu temporalium convertamus ?¹⁰⁴ Et alio loco : Optime, inquam, de te veritas clamat. Non enim posses aliud sentire esse in potestate nostra, nisi quod cum volumus facimus. Quapropter nihil tam in nostra potestate quam ipsa voluntas est. Ea enim prorsus nullo intervallo mox ut volumus praesto est¹⁰⁵. Item alio loco : Si enim tu laudaris, inquam, videndo quid facere debeas, cum id non videas nisi in illo qui est incommutabilis veritas, quanto magis ille qui et velle praecepit et posse praebeuit et non impune nolle permisit ?¹⁰⁶ Deinde subiunxi dicens : Si enim hoc debet quisque quod accepit, et sic homo factus est ut necessario peccet, hoc debet ut peccet. Cum ergo peccat, quod debet facit. Quod si scelus est dicere, neminem natura sua cogit ut peccet¹⁰⁷. Et iterum : Quae tandem esse poterit, inquam, ante voluntatem causa voluntatis ? Aut enim et ipsa voluntas est, et a radice ista voluntatis non receditur, aut non est voluntas, et peccatum nullum habet. Aut igitur voluntas est prima causa peccandi, aut nullum peccatum est prima causa peccandi, nec est cui recte imputetur peccatum nisi peccanti. Non ergo est cui recte imputetur nisi volenti¹⁰⁸. Et paulo

¹⁰⁴ *De lib. arb.* 3, 1, 2.

¹⁰⁵ *De lib. arb.* 3, 3, 7.

¹⁰⁶ *De lib. arb.* 3, 16, 46.

¹⁰⁷ *Ibidem.*

¹⁰⁸ *De lib. arb.* 3, 17, 49.

post : *Quis, inquam, peccat in eo quod nullo modo caveri potest ? Peccatur autem, caveri igitur potest*¹⁰⁹. Quo testimonio meo in quodam libro suo Pelagius usus est. Cui libro cum respondissem, titulum libri mei esse volui : *De natura et gratia*.

IV. In his atque huiusmodi verbis meis, quia gratia Dei commemorata non est, de qua tunc non agebatur, putant Pelagiani, vel putare possunt, suam nos tenuisse sententiam. Sed frustra hoc putant. Voluntas quippe est [455] qua et peccatur et recte vivitur ; quod his verbis egimus. Voluntas ergo ipsa nisi Dei gratia liberetur a servitute, qua facta est *serva peccati*¹¹⁰, et ut vitia superet adiuvetur, recte pieque vivi a mortalibus non potest. Et hoc divinum beneficium quo liberatur nisi eam praeveniret, iam meritis eius daretur et non esset gratia, quae utique gratis datur. Quod in aliis opusculis nostris satis egimus¹¹¹, istos inimicos huius gratiae novos haereticos refellentes ; quamvis et in his libris, qui non contra illos omnino, quippe illi nondum erant, sed contra Manichaeos conscripti sunt *de libero arbitrio*, non omnimodo de ista Dei gratia reticuimus, quam nefanda impietate conantur auferre. Diximus quippe in secundo libro : *non solum magna, sed etiam minima bona non esse posse, nisi*

¹⁰⁹ *De lib. arb.* 3, 18, 50.

¹¹⁰ Rom 6, 17. 20.

¹¹¹ Cf. *C. duas epp. Pelag.* 1, 18, 36 ; *De Spir. et litt.* 27 ss. ; *De nat. et grat.* 47, 55 ; *De gesta Pel.* 7 ss. ; *De grat. Chr.* 1, 4, 5 ; *De grat. et lib. arb.* 5, 10 ; 21, 42.

ab illo a quo sunt omnia bona, hoc est Deo¹¹² ; et paulo post : Virtutes, inquam, quibus recte vivitur, magna bona sunt, species autem quorumlibet corporum, sine quibus recte vivi potest, minima bona sunt, potentiae vero animi, sine quibus recte vivi non potest, media bona sunt. Virtutibus nemo male utitur, ceteris autem bonis, id est mediis et minimis, non solum bene sed etiam male quisque uti potest. Et ideo virtute nemo male utitur, quia opus virtutis est bonus usus istorum, quibus etiam non bene uti possumus, nemo autem bene utendo male utitur. Quare abundantia et magnitudo bonitatis Dei non solum magna sed etiam media et minima bona esse praestitit. Magis laudanda est bonitas eius in magnis quam in mediis, et magis in mediis quam in minimis bonis, sed magis in omnibus, quam si non omnia tribuisset¹¹³. Et alio loco : Tu tantum, inquam, pietatem inconcussam tene, ut nullum tibi bonum vel sentienti vel intellegenti vel quoquo [456] modo cogitanti occurrat quod non sit ex Deo¹¹⁴. Itemque alio loco dixi : Sed quoniam non sicut sponte homo cecidit, ita etiam sponte surgere potest, porrectam nobis desuper dexteram Dei, id est Dominum nostrum Iesum Christum, firma fide teneamus¹¹⁵.

V. Et in libro tertio, cum dixissem illud, quo et Pelagium de meis opusculis usum fuisse commemoravi¹¹⁶ : *Quis enim, inquam, peccat in eo*

¹¹² *De lib. arb.* 2, 19, 50.

¹¹³ *Ibidem.*

¹¹⁴ *De lib. arb.* 2, 20, 54.

¹¹⁵ *Ibidem.*

¹¹⁶ *Retract.* 1, 9, 3.

*quod nullo modo caveri potest ? Peccatur autem, caveri igitur potest*¹¹⁷, continuo secutus adiunxi : *Et tamen etiam per ignorantiam facta quaedam improbantur et corrigenda iudicantur, sicut in divinis auctoritatibus legimus. Ait enim Apostolus : " Misericordiam consecutus sum quia ignorans feci "*¹¹⁸ ; *ait et Propheta : " Delicta inventutis meae et ignorantiae meae ne memineris "*¹¹⁹. *Sunt etiam necessitate facta improbanda, ubi vult homo recte facere et non potest. Nam unde sunt illae voces : " Non enim quod volo facio bonum, sed quod odi malum hoc ago "*¹²⁰ ; *et illud : " Velle adiacet mihi, perficere autem bonum non "*¹²¹, *et illud : " Caro concupiscit adversus spiritum, spiritus autem adversus carnem ; haec enim invicem adversantur, ut non ea quae vultis faciatis "*¹²². *Sed haec omnia hominum sunt ex illa mortis damnatione venientium. Nam si non est ista poena hominis sed natura, nulla ista peccata sunt. Si enim non receditur ab eo modo quo naturaliter factus est, ita ut melius esse non possit, ea quae debet facit, cum haec facit. Si autem bonus homo esset, aliter esset. Nunc autem quia ita est, non est bonus, nec habet in potestate, ut [457] bonus sit, sive non videndo qualis esse debeat, sive videndo et non valendo esse qualem debere esse se videt. Poenam istam esse quis dubitet ? Omnis autem poena, si iusta est,*

¹¹⁷ *De lib. arb.* 3, 18, 50.

¹¹⁸ 1 Tim 1, 13.

¹¹⁹ Ps 24, 7.

¹²⁰ Rom 7, 15.

¹²¹ Rom 7, 18.

¹²² Gal 5, 17.

peccati poena est et supplicium nominatur. Si autem iniusta poena est, quoniam poenam esse nemo ambigit, iniusto aliquo dominante homini imposita est. Porro quia de omnipotentia Dei et iustitia dubitare dementis est, iusta haec poena est et pro peccato aliquo penditur. Non enim quisquam iniustus dominator aut subripere hominem potuit velut ignoranti Deo, aut extorquere invito tamquam invalidiori vel terrendo vel confligendo, ut hominem iniusta poena cruciaret. Relinquitur ergo ut haec poena iusta de damnatione hominis veniat¹²³. Et alio loco : Approbare, inquam, falsa pro veris ut erret invitus, et resistente atque torquente dolore carnalis vinculi non posse a libidinosi operibus temperare, non est natura instituti hominis sed poena damnati. Cum autem de libera voluntate recte facienda loquimur, de illa scilicet in qua homo factus est loquimur¹²⁴.

VI. Ecce tam longe antequam Pelagiana heresis exstisset, sic disputavimus, velut iam contra illos disputaremus. Cum enim omnia bona dicerentur ex Deo, id est et magna et media et minima, in mediis quidem bonis invenitur liberum voluntatis arbitrium, quia et male illo uti possumus, sed tamen tale est, ut sine illo recte vivere nequeamus. Bonus autem usus eius iam virtus est, quae in magnis repperitur bonis, quibus male uti nullus potest. Et quia omnia bona, sicut dictum est, et magna et media et minima ex Deo sunt, sequitur ut ex Deo sit etiam bonus usus

¹²³ *De lib. arb.* 3, 18, 51.

¹²⁴ *De lib. arb.* 3, 18, 52.

liberae voluntatis, quae virtus est et in magnis numeratur bonis¹²⁵. Deinde dictum est : *ex* [458] *qua miseria peccantibus iustissime inflicta, liberet Dei gratia, quia sponte homo, id est libero arbitrio, cadere potuit non etiam surgere. Ad quam miseriam iustae damnationis pertinet ignorantia et difficultas, quam patitur omnis homo ab exordio nativitatis suae, nec ab isto malo quisquam, nisi Dei gratia, liberatur*¹²⁶. Quam miseriam Pelagiani nolunt ex iusta damnatione descendere, negantes originale peccatum. Quamvis ignorantia et difficultas etiamsi essent hominis primordia naturalia, nec sic culpandus sed laudandus esset Deus, sicut in eodem libro tertio disputavimus¹²⁷. Quae disputatio contra Manichaeos habenda est, qui non accipiunt Scripturas sanctas Veteris Instrumenti, in quibus peccatum originale narratur, et quidquid inde in *Litteris Apostolicis* legitur, detestabili impudentia immissum fuisse contendunt a corruptoribus Scripturarum, tamquam non fuerit ab Apostolis dictum. Contra Pelagianos autem hoc defendendum est quod utraque Scriptura commendat, quam se accipere profitentur.

Hoc opus sic incipit : *Dic mihi, quaeso te, utrum Deus non sit auctor mali.* [459]

CAPUT X. DE GENESI ADVERSUS MANICHAEOS, LIBRI DUO.

¹²⁵ *De lib. arb.* 2, 19, 50-53.

¹²⁶ *De lib. arb.* 2, 20, 54 ; 3, 18, 50.

¹²⁷ *De lib. arb.* 3, 20, 58 ; cf. 3, 22, 64.

I. Iam vero in Africa constitutus, scripsi duos libros *De Genesi contra Manichaeos*. Quamvis enim in superioribus libris quidquid disputavi, unde ostenderem Deum summe bonum et immutabilem creatorem esse omnium mutabilium naturarum nec ullam esse naturam malam sive substantiam, in quantum natura est atque substantia, adversus Manichaeos nostra invigilaret intentio, isti tamen duo libri apertissime adversus eos editi sunt in defensionem Veteris Legis, quam vehementi studio vesani erroris oppugnant: in primo ab eo quod scriptum est: *In principio fecit Deus caelum et terram*¹²⁸, donec septem peragantur dies, ubi legitur Deus requievisse in die septimo. In secundo autem, ab eo quod scriptum est: *Hic liber creaturae caeli et terrae*¹²⁹, donec Adam et mulier eius dimissi sunt de paradiso, et custodia posita est ligno vitae. Deinde in fine libri errori Manichaeorum fidem catholicae veritatis opposui, quid illi dicant et nos quid dicamus breviter aperteque complectens.

II. Quod vero dixi: *Illud autem lumen non irrationalium avium oculos pascit, sed pura corda eorum qui Deo credunt et ab amore visibilium rerum et temporalium se ad eius praecepta implenda convertunt, quod omnes homines possunt si velint*¹³⁰, [460] non existiment novi haeretici Pelagiani secundum eos

¹²⁸ Gen 1, 1.

¹²⁹ Gen 2, 4.

¹³⁰ *De Gen c. Man.* 1, 3, 6.

esse dictum. Verum est enim omnino, omnes homines hoc posse si velint ; sed *praeparatur voluntas a Domino*, et tantum augetur munere caritatis ut possint, quod hic ideo dictum non est, quoniam praesenti necessarium non erat quaestioni. Quod vero ibi legitur benedictionem Dei, qua dictum est : *Crescite et multiplicamini*¹³¹ in carnalem fecunditatem post peccatum conversam esse credendam¹³² ; si non potest alio modo dictum videri, nisi ut putentur illi homines non habituri fuisse filios homines nisi peccassent, omnino non approbo. Illud etiam non est consequens, ut ideo intellegatur in allegoria tantummodo esse accipiendum, quod herbae virides et ligna fructifera omni generi bestiarum et omnibus avibus et omnibus serpentibus in libro *Geneseos* dantur ad cibum, quia sunt et quadrupedia et volatilia quae solis carnibus vivere videantur¹³³. Fieri enim posset ut alerentur ab hominibus etiam de fructibus terrae, si propter oboedientiam, qua ipsi homines Deo sine ulla iniquitate servirent, mererentur omnes bestias et aves omni modo habere servientes. Item movere potest quomodo dixerim de populo Israel : *Adhuc corporali circumcissione et sacrificiis, tamquam in mari gentium populus ille legi serviebat*¹³⁴ quandoquidem

¹³¹ Gen 1, 28.

¹³² *De Gen c. Man.* 1, 19, 30.

¹³³ *De Gen c. Man.* 1, 20, 31.

¹³⁴ *De Gen c. Man.* 1, 23, 40.

apud gentes sacrificare non poterant, sicut eos et nunc videmus sine sacrificiis remansisse¹³⁵, nisi forte quod per Pascha immolant ovem, hoc in sacrificio deputetur.

III. In secundo etiam libro illud quod posui nomine *pabuli* significari posse vitam¹³⁶, cum melioris interpretationis codices non habeant *pabulum*, sed *faenum*, non satis apte dictum videtur. Non enim congruit faeni nomen significationi vitae quomodo pabuli. Item [461] videor¹³⁷ non recte appellasse verba prophetica quibus scriptum est : *Quid superbit terra et cinis ?*¹³⁸, quia non in eius libro legitur, quem certi simus appellandum esse Prophetam. Nec illud Apostoli ubi adhibet testimonium de *Genesi* dicens : *Factus est primus homo Adam in animam viventem*¹³⁹, sicut ille voluit intellexi, cum exponerem quod scriptum est. *Insufflavit Deus in faciem eius flatum vitae, et factus est homo in animam vivam, vel in animam viventem*¹⁴⁰. Apostolus enim ad hoc adhibuit illud testimonium, ut probaret esse corpus animale ; ego autem hinc putavi esse monstrandum animale factum prius hominem, non corpus hominis solum¹⁴¹. Quod autem dixi : *nulli naturae*

¹³⁵ *C. litt. Petil.* 2, 27, 87.

¹³⁶ *De Gen c. Man.* 2, 3, 4 ; *Gen* 2, 5.

¹³⁷ *De Gen c. Man.* 2, 5, 6.

¹³⁸ *Eccli* 10, 9.

¹³⁹ *1 Cor* 15, 45.

¹⁴⁰ *Gen* 2, 7.

¹⁴¹ *De Gen c. Man.* 2, 8, 10.

*nocere peccata nisi sua*¹⁴², ideo dixi, quoniam iusto qui nocet non ei vere nocet, quando quidem etiam *mercedem* eius auget *in caelis*¹⁴³, sibi autem peccando vere nocet, quia propter ipsam voluntatem nocendi recipiet id, quod nocuit. Possunt sane Pelagiani ad suum dogma trahere istam sententiam, et ideo dicere parvulis aliena non nocuisse peccata, quia dixi : *nulli naturae nocere peccata nisi sua*, non intuentes ideo parvulos, qui utique pertinent ad humanam naturam, trahere originale peccatum, quia in primis hominibus natura humana peccavit, ac per hoc naturae humanae nulla nocuere peccata nisi sua. *Per unum* quippe *hominem*, in quo omnes peccaverunt, *peccatum intravit in mundum*¹⁴⁴ ; non enim nulli homini, sed *nulli naturae* dixi *peccata nocere nisi sua*. Item in eo quod paulo post dixi : *nullum esse malum naturale*¹⁴⁵, possunt quaerere similem latebram, nisi hoc dictum ad naturam talem referatur, qualis sine vitio primitus condita est ; ipsa enim vere ac proprie natura hominis dicitur. Translato autem verbo utimur, ut [462] naturam dicamus etiam qualis nascitur homo, secundum quam locutionem dixit Apostolus : *Fuimus enim et nos aliquando natura filii irae sicut et ceteri*¹⁴⁶.

¹⁴² *De Gen c. Man.* 2, 29, 43.

¹⁴³ Matth. 5, 12 ; Lucas 6, 23.

¹⁴⁴ Rom 5, 12.

¹⁴⁵ *De Gen c. Man.* 2, 29, 43.

¹⁴⁶ Eph 2, 3.

Hoc opus sic incipit : *Si eligerent Manichaei quos deciperent.*

CAPUT XI. DE MUSICA, LIBRI SEX.

I. Deinde, ut supra commemoravi¹⁴⁷, sex libros *De musica* scripsi, quorum ipse sextus maxime innotuit, quoniam res in eo cognitione digna versatur, quomodo a corporalibus et spiritalibus, sed mutabilibus numeris, perveniatur ad immutabiles numeros, qui iam in ipsa sunt immutabili veritate, et sic *invisibilia Dei per ea quae facta sunt intellecta conspiciantur*¹⁴⁸. Quod qui non possunt et tamen *ex fide Christi vivunt*¹⁴⁹, ad illa certius atque felicius conspicienda post hanc vitam veniunt. Qui autem possunt, si desit eis fides Christi qui *unus Mediator est Dei et hominum*¹⁵⁰, cum tota sapientia sua pereunt.

II. In hoc libro illud quod dixi : *Corpora enim tanto meliora sunt quanto numerosiora talibus numeris, anima vero istis quae per corpus accipit carendo fit melior, cum sese avertit a carnalibus sensibus, et divinis Sapientiae numeris reformatur*¹⁵¹, non sic accipiendum est, quasi non sint futuri numeri corporales in corporibus incorruptibilibus et spiritalibus, cum multo speciosiora et decentiora futura sint, aut

¹⁴⁷ *Retract.* 1, 6.

¹⁴⁸ Rom 1, 20.

¹⁴⁹ Rom 1, 17 ; 3, 26 ; Gal 3, 11 ; Hebr 10, 38.

¹⁵⁰ *De musica* 6, 1, 1 ; 1 Tim 2, 5.

¹⁵¹ *De musica* 6, 4, 7.

anima eos sensura non sit, [463] quando erit optima, quemadmodum hic eis carendo fit melior. Hic enim opus habet avertere se a carnalibus sensibus ad intellegibilia capienda, quia infirma est et minus idonea utrisque simul adhibere intentionem suam ; et in his corporalibus nunc illecebra cavenda est, quamdiu anima illiciti ad delectationem turpem potest. Tunc autem tam firma erit atque perfecta, ut numeris corporalibus non avertatur a contemplatione Sapientiae, et ita sentiat eos ut non illicitiatur ab eis, nec eis carendo fiat melior ; sed ita sit bona et recta, ut nec latere possint eam nec occupare.

III. Item quod dixi : *Haec autem sanitas tunc firmissima erit atque certissima, cum pristinae stabilitati certo suo tempore atque ordine hoc corpus fuerit restitutum*¹⁵², non ita dictum putetur, quasi non sint futura post resurrectionem corpora meliora, quam primorum hominum in paradiso fuerunt, cum illa iam non sint alenda corporalibus alimentis, quibus alebantur ista ; sed pristina stabilitas hactenus accipienda est, quatenus aegritudinem ita nullam corpora illa patientur, sicut nec ista pati possent ante peccatum.

IV. Alio loco : *Laboriosior est, inquam, huius mundi amor. Quod enim in illo anima quaerit, constantiam scilicet aeternitatemque, non invenit, quoniam rerum transitu completur infima pulchritudo, et quod in illa imitatur constantiam, a summo Deo per animam*

¹⁵² *De musica* 6, 5, 13.

*traicitur, quoniam prior est species tantummodo tempore commutabilis quam est ea quae et tempore et locis*¹⁵³. Haec verba, si eo modo accipi possunt, ut non intellegatur infima pulchritudo nisi in corporibus hominum omniumque animalium, quae cum sensu corporis vivunt, ratio manifesta defendit. Hoc quippe in ea pulchritudine imitatur constantiam, quod [464] in compage sua manent eadem corpora, in quantum manent, id autem a summo Deo in ea per animam traicitur¹⁵⁴. Anima quippe ipsam compagem tenet, ne dissolvatur et diffluat ; quod videmus in corporibus animalium anima discedente contingere. Si autem infima pulchritudo in omnibus corporibus intellegatur, cogit ista sententia etiam ipsum mundum animal credere, ut etiam in ipsum, quod in illo imitatur constantiam, a summo Deo per animam traiciatur. Sed animal esse istum mundum, sicut Plato sensit, aliique philosophi plurimi¹⁵⁵, nec ratione certa indagare potui, nec divinarum Scripturarum auctoritate persuaderi posse cognovi. Unde tale aliquid a me dictum quo id accipi possit, etiam in libro *De immortalitate animae* temere dictum notavi¹⁵⁶, non quia hoc falsum esse confirmo, sed quia nec verum esse comprehendo, quod sit animal mundus. Hoc sane inconcusse

¹⁵³ *De musica* 6, 14, 44.

¹⁵⁴ Cf. *De civ. Dei* 7, 6.

¹⁵⁵ Cf. Plato., *Tim.* 30b. Cicer., *De nat. deor.* 1, 30, 52. 2, 22, 30, 32.

¹⁵⁶ *De imm. an.* 15, 24 ; *Retract.* 1, 5, 3.

retinendum esse non dubito, Deum nobis non esse istum mundum, sive anima eius ulla sive nulla sit, quia si ulla est, ille qui eam fecit *est Deus noster*, si autem nulla est, nullorum Deus potest esse iste, quanto minus noster. Esse tamen spiritalem vitalemque virtutem, etiam si non sit animal mundus, quae virtus in angelis sanctis ad decorandum atque administrandum mundum Deo servit et a quibus non intellegitur, rectissime creditur. Angelorum autem sanctorum nomine, omnem sanctam creaturam spiritalem in Dei secreto atque occulto ministerio constitutam nunc appellaverim ; sed spiritus angelicos sancta Scriptura nomine animarum significare non solet. Proinde in eo quod circa finem libri huius dixi : *Rationales et intellectuales numeri beatarum animarum atque sanctarum legem ipsam Dei, sine qua folium de arbore non [465] cadit, et cui nostri capilli numerati sunt, nulla interposita natura excipientes, usque ad terrena et inferna iura transmittunt*¹⁵⁷, non video quemadmodum vocabulum animarum secundum Scripturas sanctas positum possit ostendi, quandoquidem hic nonnisi angelos sanctos intellegi volui, quos habere animas nusquam me legisse in divinis eloquiis canonicis recolo.

Hic liber sic incipit : *Satis diu pene.*

CAPUT XII. DE MAGISTRO, LIBER UNUS.

¹⁵⁷ *De musica* 6, 17, 58.

12. Per idem tempus scripsi librum cuius est titulus : *De magistro*, in quo disputatur et quaeritur et invenitur, magistrum non esse qui docet hominem scientiam nisi Deum, secundum illud etiam quod in Evangelio scriptum est : *Unus est Magister vester Christus*¹⁵⁸. Hic liber sic incipit : *Quid tibi videmur efficere velle cum loquimur ?* [466]

CAPUT XIII. DE VERA RELIGIONE, LIBER UNUS.

I. Tunc etiam *De vera religione* librum scripsi, in quo multipliciter et copiosissime disputatur unum verum Deum, id est Trinitatem Patrem et Filium et Spiritum Sanctum, religione vera colendum, et quanta misericordia eius per temporalem dispensationem concessa sit hominibus christiana religio, quae vera religio est, et ad eundem cultum Dei quemadmodum sit homo quadam sua vita coaptandus. Maxime tamen contra duas naturas Manichaeorum liber hic loquitur.

II. In hoc libro quodam loco : *Sit, inquam, tibi manifestum atque perceptum, nullum errorem in religione esse potuisse, si anima pro Deo suo non coleret animam aut corpus aut phantasmata sua*¹⁵⁹. Hic animam pro universa creatura incorporali posui non loquens more Scripturarum, quae animam, quando non translato verbo utuntur, nescio utrum velint intellegi nisi eam qua vivunt animalia

¹⁵⁸ Matth. 23, 10.

¹⁵⁹ *De vera rel.* 10, 18.

mortalia, in quibus et homines sunt, quamdiu mortales sunt. Paulo post autem eundem sensum melius sum breviusque complexus, ubi dixi : *Non ergo creaturae potius quam Creatori serviamus*¹⁶⁰ *nec evanescamus in cogitationibus nostris*¹⁶¹, *et perfecta religio est*¹⁶². Creaturam quippe uno nomine utramque, id est spiritalem corporalemque, significavi. Restat quod ibi dixi : *aut phantasmata sua* ; propter quod hic dixi : *nec evanescamus in cogitationibus nostris*. [467]

III. Item quod dixi : *Ea est nostris temporibus christiana religio, quam cognoscere ac sequi securissima et certissima salus est*¹⁶³, secundum hoc nomen dictum est, non secundum ipsam rem, cuius hoc nomen est. Nam res ipsa, quae nunc christiana religio nuncupatur, erat et apud antiquos nec defuit ab initio generis humani, quo- usque ipse Christus veniret in carne, unde vera religio, quae iam erat, coepit appellari christiana. Cum enim eum post resurrectionem ascensionemque in caelum coepissent Apostoli praedicare, et plurimi crederent, primum apud Antiochiam, sicut scriptum est, appellati sunt discipuli "Christiani"¹⁶⁴. Propterea dixi : *Haec est nostris temporibus christiana religio*, non quia prioribus

¹⁶⁰ Rom 1, 25.

¹⁶¹ Rom 1, 21.

¹⁶² *De vera rel.* 10, 19.

¹⁶³ *Ibidem*.

¹⁶⁴ Cf. Act 11, 26.

temporibus non fuit, sed quia posterioribus hoc nomen accepit.

IV. Alio loco : *Intende igitur, inquam, in haec quae sequuntur, diligenter et pie, quantum potes, tales enim adiuvat Deus*¹⁶⁵. Quod non ita intellegendum est, quasi tantummodo tales adiuvet, cum adiuvet etiam non tales ut sint tales, id est ut diligenter et pie quaerant ; tales autem adiuvat ut inveniant. Itemque alibi : *Deinde, inquam, iam erit consequens, ut post mortem corporalem, quam debemus primo peccato, tempore suo atque ordine suo hoc corpus restituatur pristinae stabilitati*¹⁶⁶. Quod sic accipiendum est, quia etiam pristina stabilitas corporis, quam peccando amisimus, habebat tantam felicitatem, ut in defectum non vergeret senectutis. Huic ergo pristinae stabilitati restituetur hoc corpus in resurrectione mortuorum. Sed habebit amplius ut nec alimentis corporalibus sustentetur, sed ad sufficientiam *vivificetur solo spiritu*¹⁶⁷, *cum resurrexerit in spiritum vivificantem*¹⁶⁸, qua causa etiam spiritale erit. [468] Illud autem quod primum fuit, quamvis non moriturum nisi homo peccasset, tamen animale factum est, hoc est *in animam viventem*.

V. Et alibi : *Usque adeo, inquam, peccatum voluntarium malum est, ut nullo modo sit peccatum, si*

¹⁶⁵ *De vera rel.* 10, 20.

¹⁶⁶ *De vera rel.* 12, 25.

¹⁶⁷ 1 Pt 3, 18.

¹⁶⁸ 1 Cor 15, 45.

*non sit voluntarium*¹⁶⁹. Potest videri falsa haec definitio ; sed si diligenter discutiatur, invenietur esse verissima. Peccatum quippe illud cogitandum est, quod tantummodo peccatum est, non quod est etiam poena peccati, sicut superius ostendi, cum quaedam commemorarem ex libro tertio *De libero arbitrio*¹⁷⁰. Quamvis et illa quae non immerito non voluntaria peccata dicuntur, quia vel a nescientibus vel a coactis perpetrantur, non omnimodo possunt sine voluntate committi, quoniam et ille qui peccat ignorans voluntate utique peccat, quod, cum faciendum non sit, putat esse faciendum, et ille qui *concupiscente adversus spiritum carne*¹⁷¹, non ea quae vult facit, concupiscit quidem nolens, et in eo non facit quod vult, sed si vincitur, concupiscentiae consentit volens, et in eo non facit nisi quod vult, liber scilicet iustitiae servusque peccati¹⁷². Et illud quod in parvulis dicitur originale peccatum, cum adhuc non utantur arbitrio voluntatis, non absurde vocatur etiam " voluntarium ", quia ex prima hominis mala voluntate contractum, factum est quodammodo haereditarium. Non itaque falsum est quod dixi : *Usque adeo peccatum voluntarium malum est, ut nullo modo sit peccatum, si*

¹⁶⁹ *De vera rel.* 14, 27.

¹⁷⁰ *Retract.* 1, 9, 5.

¹⁷¹ Gal 5, 17.

¹⁷² Rom 6, 20. 17.

*non sit voluntarium*¹⁷³. Ideo gratia Dei non solum reatus omnium praeteritorum solvitur in omnibus qui baptizantur in Christo, quod fit Spiritu regenerationis, verum etiam in grandibus voluntas ipsa sanatur et praeparatur a Domino, quod fit spiritu fidei et caritatis.

VI. Alio loco in eo quod dixi de Domino Iesu Christo : [469] *Nihil egit vi, sed omnia suadendo et monendo*¹⁷⁴, non mihi occurrerat quod vendentes et ementes flagellando eiecit de templo¹⁷⁵. Sed quid hoc, aut quantum est? Quamvis et daemones nolentes ab hominibus non sermone suasionis, sed vi potestatis eiecerit¹⁷⁶? Item alio loco : *Prius, inquam, isti sequendi sunt, qui unum Deum summum, solum, verum Deum et solum colendum esse dicunt. Si apud hos veritas non eluxerit, tum demum migrandum est*¹⁷⁷. Quod ita potest videri dictum, quasi de huius religionis veritate dubitaverim. Dixi autem sicut ei congruebat ad quem scribebam. Sic enim dixi : *Si apud hos veritas non eluxerit, nihil dubitans quod apud eos elucesceret, quemadmodum ait Apostolus : Si Christus non resurrexit*¹⁷⁸, non utique dubitans quod resurrexerit.

¹⁷³ *De vera rel.* 14, 27.

¹⁷⁴ *De vera rel.* 16, 31.

¹⁷⁵ Matth. 21, 12 ; Marcus 11, 15 ; Lucas 19, 45.

¹⁷⁶ Cf. Matth. 9, 32 ; Marcus 1, 34 ; Lucas 4, 35.

¹⁷⁷ *De vera rel.* 25, 46.

¹⁷⁸ 1 Cor 15, 14.

VII. Item quod dixi : *Nec miracula illa in nostra tempora durare permissa sunt, ne anima semper visibilia quaereret, et eorum consuetudine frigeret genus humanum, quorum novitate flagravat*¹⁷⁹, verum est quidem ; non enim nunc usque, cum manus imponitur baptizatis, sic accipiunt Spiritum Sanctum, ut loquantur linguis omnium gentium¹⁸⁰, aut nunc usque ad umbram transeuntium praedicatorum Christi sanantur infirmi¹⁸¹, et si quae talia tunc facta sunt, quae postea cessasse manifestum est. Sed non sic accipiendum est quod dixi, ut nunc in Christi nomine fieri miracula nulla credantur. Nam ego ipse, quando istum ipsum librum scripsi, ad Mediolanensium corpora martyrum¹⁸² in eadem civitate caecum illuminatum fuisse iam noveram¹⁸³ et alia nonnulla, qualia tam multa etiam istis temporibus fiunt, ut nec omnia cognoscere nec ea quae cognoscimus, enumerare possimus. [470]

VIII. Et alio loco illud quod dixi : *Sicut ait Apostolus : " Omnis ordo a Deo est "*¹⁸⁴, non eisdem verbis hoc dixit Apostolus, quamvis eadem videatur esse sententia. Ait quippe ille : *Quae autem sunt, a Deo ordinata sunt*¹⁸⁵. Et alibi : *Prorsus,*

¹⁷⁹ *De vera rel.* 25, 46.

¹⁸⁰ Cf. Act 2, 4 ; 10, 46.

¹⁸¹ Cf. Act 5, 15.

¹⁸² Protasii et Gervasii.

¹⁸³ Cf. *Confess.* 9, 7, 16 ; *De civ. Dei* 22, 8, 2 ; *Serm.* 286, 5.

¹⁸⁴ *De vera rel.* 41, 77 ; Rom 13, 1.

¹⁸⁵ Rom 13, 1.

inquam, *nemo nos fallat, quidquid recte vituperatur, in melioris comparatione respuitur*¹⁸⁶. Hoc de substantiis atque naturis dictum est, inde enim disputabatur, non de bonis actionibus atque peccatis. Itemque alibi : *Sed nec sic quidem, inquam, ab homine homo diligendus est, ut diliguntur carnales fratres vel filii vel coniuges vel quique cognati, aut affines aut cives, nam et ista dilectio temporalis est. Non enim ullas tales necessitudines haberemus, quae nascendo et moriendo contingunt, si natura nostra in praeceptis et imagine Dei manens, in istam corruptionem non relegaretur*¹⁸⁷. Hunc sensum prorsus improbo, quem iam et superius improbavi in primo libro *De Genesi contra Manichaeos*¹⁸⁸. Ad hoc enim ducit, ut credantur illi coniuges primi non generaturi posteros homines nisi peccassent ; tamquam necesse fuerit ut morituri gignerentur, si de concubitu maris et feminae gignerentur. Nondum enim videram fieri potuisse, ut non morituri de non morituris nascerentur, si peccato illo magno non mutaretur in deterius humana natura, ac per hoc, si et in parentibus et in filiis fecunditas felicitasque mansisset, usque ad certum sanctorum numerum, quem *praedestinavit Deus*¹⁸⁹, nascerentur homines non parentibus successuri morientibus, sed cum viventibus regnaturi. Essent ergo etiam istae

¹⁸⁶ *De vera rel.* 41, 78.

¹⁸⁷ *De vera rel.* 46, 88.

¹⁸⁸ *Retract.* 1, 10, 2.

¹⁸⁹ Cf. Rom 8, 28 ; 1 Cor 2, 7 ; Eph 1, 5, 11.

cognitiones atque affinitates, si nullus delinqueret nullusque moreretur.

IX. Item alio loco : *Ad unum Deum tendentes, inquam, et ei uni religantes animas nostras, unde [471] religio dicta creditur, omni superstitione careamus*¹⁹⁰. In his verbis meis ratio quae reddita est, unde sit dicta religio, plus mihi placuit. Nam non me fugit aliam nominis huius originem exposuisse latini sermonis auctores, quod inde sit appellata religio, quod religitur¹⁹¹. Quod verbum compositum est a legendo, id est eligendo, ut ita latinum videatur " religo " sicut " eligo ".

Hic liber sic incipit : *Cum omnis vitae bonae ac beatae via.*

CAPUT XIV. DE UTILITATE CREDENDI, AD HONORATUM, LIBER UNUS.

I. Iam vero apud Hipponem Regium presbyter scripsi librum *De utilitate credendi* ad amicum meum, quem deceptum a Manichaeis adhuc eo errore noveram detineri, et irridere in catholicae fidei disciplina, quod iuberentur homines credere, non autem quid esset verum certissima ratione docerentur. In hoc libro dixi : *In quibus tamen legis praeceptis atque mandatis, quibus nunc christiano uti fas non est, quale vel sabbatum est vel circumcisio vel sacrificia et si quid huiusmodi est ; tanta mysteria continentur, ut omnis pius intellegat nihil esse*

¹⁹⁰ *De vera rel.* 55, 111.

¹⁹¹ Cicer., *De nat. deor.* 2, 28, 72.

*perniciosius quam quidquid ibi est accipi ad litteram, id est ad verbum, nihil autem salubrius quam spiritu revelari. Inde est: " Littera occidit, spiritus autem vivificat "*¹⁹². Sed aliter exposui verba ista apostoli Pauli et, quantum mihi videtur, vel potius ipsis rebus apparet, multo convenientius in eo [472] libro qui inscribitur: *De spiritu et littera*, quamvis non sit et sensus iste respuendus¹⁹³.

II. Item dixi: *Duae sunt enim personae in religione laudabiles. Una eorum qui iam invenerunt, quos etiam beatissimos iudicari necesse est; alia eorum qui studiosissime et rectissime inquirunt. Primi ergo sunt iam in ipsa possessione, alteri in via, qua tamen certissime pervenitur*¹⁹⁴. In his verbis meis, si illi qui iam invenerunt quos in ipsa possessione iam esse diximus, sic accipiantur beatissimi, ut non in hac vita, sed in ea quam speramus et ad quam per fidei viam tendimus sint non habet iste sensus errorem. Ipsi enim iudicandi sunt quod quaerendum est invenisse, qui iam ibi sunt quo nos quaerendo et credendo, id est viam fidei tenendo, cupimus pervenire. Si autem in hac vita putantur esse isti vel fuisse, id verum esse non mihi videtur, non quia in hac vita nihil veri omnino inveniri potest, quod mente cernatur non fide credatur, sed quia tantum est quidquid est, ut non faciat beatissimos. Neque enim quod ait

¹⁹² *De util. cred.* 3, 9; 2 Cor 3, 6.

¹⁹³ *De spir. et litt.* 5, 7; cf. *Retract.* 2, 37.

¹⁹⁴ *De util. cred.* 11, 25.

Apostolus : *Videmus nunc per speculum in enigmate*¹⁹⁵, et : *Nunc scio ex parte*, non cernitur mente ; cernitur plane, sed beatissimos nondum facit. Illud enim beatissimos si facit quod ait : *Tunc autem facie ad faciem*, et : *Tunc cognoscam sicut et cognitus sum*¹⁹⁶. Qui hoc invenerunt, ipsi dicendi sunt in beatitudinis possessione consistere, ad quam ducit via fidei quam tenemus, et quo credendo cupimus pervenire. Sed quinam sint illi beatissimi, qui iam sunt in ea possessione quo ducit haec via, magna quaestio est. Et angeli quidem sancti quod ibi sint, nulla quaestio est. Sed de sanctis hominibus iam defunctis, utrum ipsi saltem dicendi sint iam in illa possessione consistere, merito [473] quaeritur. Iam enim corpore quidem corruptibili, quo anima aggravatur, exuti sunt ; sed adhuc *expectant* etiam ipsi *redemptionem corporis sui*¹⁹⁷, et *caro* eorum *requiescit in spe*¹⁹⁸, nondum in futura incorruptione clarescit. Sed utrum ad contemplandam cordis oculis veritatem, sicut dictum est *facie ad faciem*, nihil ex hoc minus habeant, non hic locus est disputando inquirere. Item quod dixi : *Nam scire magna et honesta vel etiam divina, beatissimum est*¹⁹⁹, ad eandem beatitudinem referre debemus. In hac enim vita, quantumcumque id sciatur, nondum

¹⁹⁵ 1 Cor 13, 12.

¹⁹⁶ 1 Cor 13, 12.

¹⁹⁷ Rom 8, 23.

¹⁹⁸ Ps 15, 9.

¹⁹⁹ *De util. cred.* 11, 25.

est beatissimum, quoniam incomparabiliter longe est amplius quod inde nescitur.

III. Et quod dixi: *Multum interesse utrum aliquid mentis certa ratione teneatur, quod scire dicimus, an famae vel litteris credendum posteris utiliter commendetur*; et paulo post: *Quod scimus igitur debemus rationi, quod credimus auctoritati*²⁰⁰, non sic accipiendum est, ut in sermone usitatore vereamur nos dicere scire quod idoneis testibus credimus. Proprie quippe cum loquimur, id solum scire dicimus quod mentis firma ratione comprehendimus. Cum vero loquimur verbis consuetudini aptioribus, sicut loquitur etiam Scriptura divina, non dubitemus dicere scire nos et quod percipimus nostri corporis sensibus et quod fide dignis credimus testibus, dum tamen inter haec et illud quid distet intellegamus.

IV. Item quod dixi: *Nemini dubium est omnes homines aut stultos esse aut sapientes*²⁰¹, potest videri esse contrarium illi quod legitur in libro tertio *De libero arbitrio*: *Quasi vero natura humana praeter stultitiam et sapientiam nullam mediam recipiat affectionem*²⁰². Sed illud ibi dictum est, ubi de primo homine quaerebatur, utrum sapiens fuerit factus an stultus an [474] neutrum, quoniam nullo modo stultum dicere poteramus qui sine vitio factus est, cum sit stultitia magnum vitium; et sapientem

²⁰⁰ *Ibidem.*

²⁰¹ *De util. cred.* 12, 27.

²⁰² *De lib. arb.* 3, 24, 71.

quomodo diceremus qui potuit seduci, non satis apparebat. Ideoque ad compendium dicere volui : *Quasi vero natura humana praeter stultitiam et sapientiam nullam mediam recipiat affectionem.* Intuebar quippe etiam parvulos, quos licet confiteamur trahere originale peccatum, tamen nec sapientes nec stultos possumus proprie dicere, nondum utentes libero arbitrio seu bene seu male. Nunc autem aut sapientes aut stultos esse omnes homines dixi, eos volens intellegi qui iam ratione utuntur, qua discernuntur a pecoribus ut homines sint, sicut dicimus beatos esse omnes homines velle. Numquid enim in hac sententia tam vera atque manifesta metuimus, ne intellegantur et parvuli qui hoc adhuc velle non possunt ?

V. Alio loco, cum miracula commemorassem quae Dominus Iesus fecit cum hic esset in carne, adiunxi dicens : *Cur, inquis, ista modo non fiunt ?*²⁰³ Atque respondi : *Quia non moverent nisi mira essent, si autem solita essent, mira non essent*²⁰⁴. Hoc autem dixi, quia non tanta nec omnia modo, non quia nulla fiunt etiam modo.

VI. In fine autem libri : *Sed quoniam sermo iste noster, inquam, multo processit longius quam putabam, hic finem libro faciamus, in quo memineris volo nondum me Manichaeos coepisse refellere, et illas nugas nondum invasisse neque de ipsa Catholica magnum aliquid aperuisse, sed voluisse tantummodo eruere tibi, si possem,*

²⁰³ *De util. cred.* 16, 34.

²⁰⁴ *Retract.* 1, 13, 7.

*falsam opinionem de veris Christianis malitiose aut imperite nobis insinuatam et erigere ad magna quaedam et divina discenda. Quare hoc volumen ita sese habeat, placatiore autem animo tuo facto ero fortassis in [475] cæteris promptior*²⁰⁵. Haec non ita dixi, quasi nihil adversus Manichaeos adhuc scripsissem, vel nihil de doctrina catholica mandassem litteris, cum tot superius edita volumina de utraque re non me tacuisse testentur; sed in hoc libro ad illum scripto *nondum Manichaeos refellere* coeperam, et *illas nugas nondum* invaseram, neque *de ipsa Catholica magnum aliquid* aperueram, quoniam sperabam hoc initio facto, ad eum ipsum me scripturum fuisse quae hic nondum scripseram.

Hic liber sic incipit: *Si mihi, Honorate, unum atque idem videretur esse.*

CAPUT XV. DE DUABUS ANIMABUS, CONTRA MANICHAEOS, LIBER UNUS.

I. Post hunc librum scripsi adhuc presbyter contra Manichaeos *De duabus animabus*, quarum dicunt unam partem Dei esse, alteram de gente tenebrarum, quam non condiderit Deus, et quae sit Deo coaeterna. Et has ambas animas, unam bonam alteram malam, in homine uno esse delirant; istam scilicet malam propriam carnis esse dicentes, quam carnem etiam dicunt gentis esse tenebrarum; illam vero bonam ex adventitia Dei parte, quae cum tenebrarum gente conflixerit,

²⁰⁵ *De util. cred.* 18, 36.

atque utramque miscuerit. Et omnia quidem bona hominis illi bonae animae, omnia vero mala illi malae animae tribuunt. In hoc libro illud quod dixi : *Nullam esse qualemcumque vitam, quae non eo ipso quo vita est, et in quantum omnino vita est, ad summum vitae fontem principiumque pertineat*²⁰⁶, ita dixi, ut tamquam [476] creatura ad Creatorem pertinere intellegatur, non autem de illo esse tamquam pars eius existimetur.

II. Item quod dixi : *Nusquam scilicet, nisi in voluntate esse peccatum*²⁰⁷, possunt Pelagiani pro se dictum putare propter parvulos, quos ideo negant habere peccatum quod eis in baptismo remittatur, quia nondum arbitrio voluntatis utuntur. Quasi vero peccatum, quod eos ex Adam dicimus originaliter trahere, id est reatu eius implicatos, et ob hoc poenae obnoxios detineri, usquam esse potuit nisi in voluntate, qua voluntate commissum est, quando divini praecepti est facta transgressio. Potest etiam putari falsa esse ista sententia qua diximus : *Nusquam nisi in voluntate esse peccatum*, quia dixit Apostolus : *Si autem quod nolo hoc facio, iam non ego operor illud, sed id quod in me habitat peccatum*²⁰⁸. Hoc enim peccatum usque adeo non est in voluntate, ut dicat : *Quod nolo hoc facio*. Quomodo ergo nusquam est nisi in voluntate peccatum ? Sed hoc peccatum, de quo sic est

²⁰⁶ *De duab. anim.* 1, 1.

²⁰⁷ *De duab. anim.* 12.

²⁰⁸ Rom 7, 20.

locutus Apostolus, ideo peccatum vocatur, quia peccato factum est et poena peccati est ; quando quidem hoc de concupiscentia carnis dicitur, quod aperit in consequentibus dicens : *Scio quia non habitat in me hoc est in carne mea bonum : velle enim adiacet mihi, perficere autem bonum non*²⁰⁹. Perfectio quippe boni est, ut nec ipsa concupiscentia peccati sit in homine, cui quidem quando bene vivitur non consentit voluntas. Verumtamen non perficit bonum, quia inest adhuc concupiscentia cui repugnat voluntas ; cuius concupiscentiae reatus in baptismo solvitur, sed infirmitas manet, cui donec sanetur omnis fidelis qui bene proficit, studiosissime reluctatur. Peccatum autem quod *nusquam est nisi in voluntate*, [477] illud praecipue intellegendum est, quod iusta damnatio consecuta est ; hoc enim *per unum hominem intravit in mundum*²¹⁰. Quamquam et hoc peccatum quo consentitur peccati concupiscentiae non nisi voluntate committitur. Propter hoc et alio loco dixi : *Non igitur nisi voluntate peccatur*²¹¹.

III. Itemque alio loco ipsam voluntatem definivi dicens : *Voluntas est animi motus cogente nullo ad aliquid vel non amittendum vel adipiscendum*²¹². Quod propterea dictum est, ut hac definitione volens a nolente discerneretur, et sic ad illos

²⁰⁹ Rom 7, 18.

²¹⁰ Rom 5, 12.

²¹¹ *De duab. anim.* 14.

²¹² *Ibidem.*

referretur intentio, qui primi in paradiso fuerunt humano generi origo mali, nullo cogente peccando, hoc est libera voluntate peccando, quia et scientes contra praeceptum fecerunt, et ille tentator suasit ut hoc fieret, non coegit. Nam et qui nesciens peccavit, non incongruenter nolens peccasse dici potest, quamvis et ipse quod nesciens fecit, volens tamen fecit ; ita nec ipsius esse potuit sine voluntate peccatum. Quae voluntas utique, sicut definita est, *animi motus fuit cogente nullo ad aliquid vel non amittendum vel adipiscendum*. Quod enim si noluisset non fecisset, non coactus est facere. Quia voluit ergo fecit, etiamsi non quia voluit peccavit, nesciens peccatum esse quod fecit. Ita nec tale peccatum sine voluntate esse potuit, sed voluntate facti non voluntate peccati, quod tamen factum peccatum fuit ; hoc enim factum est quod fieri non debuit. Quisquis autem sciens peccat, si potest cogenti ad peccatum sine peccato resistere nec tamen facit, utique volens peccat, quoniam qui potest resistere non cogitur cedere. Qui vero cogenti cupiditati bona voluntate resistere non potest, et ideo facit contra praecepta iustitiae, iam hoc ita peccatum est, ut sit etiam poena peccati. [478] Quapropter peccatum sine voluntate esse non posse verissimum est.

IV. Itemque definitio peccati qua diximus : *Peccatum est voluntas retinendi vel consequendi quod*

*institia vetat, et unde liberum est abstinere*²¹³, propterea vera est, quia id definitum est quod tantummodo peccatum est, non quod etiam poena peccati. Nam quando tale est ut idem sit et poena peccati, quantum est quod valet voluntas sub dominante cupiditate, nisi forte, si pia est, ut oret auxilium ? In tantum enim libera est, in quantum liberata est, et in tantum appellatur voluntas. Alioquin tota cupiditas quam voluntas proprie nuncupanda est, quae non est, sicut Manichaei desipiunt, alienae naturae additamentum, sed nostrae vitium a quo non sanamur nisi gratia Salvatoris. Quod si quisquam dicit etiam ipsam cupiditatem nihil esse aliud quam voluntatem, sed vitiosam peccatoque servientem, non resistendum est nec de verbis, cum res constet, controversia facienda. Etiam sic enim ostenditur sine voluntate nullum esse peccatum sive in opere sive in origine.

V. Rursus in eo quod dixi : *Iam quaerere poteram, utrum illud malum genus animarum, antequam bono misceretur, habuisset aliquam voluntatem. Si enim non habebat, sine peccato atque innocens erat et ideo nullo modo malum*²¹⁴. Cur ergo, inquiunt, peccatum dicitis parvulorum, quorum voluntatem non tenetis ream ? Respondetur non eos proprietate voluntatis, sed origine reos teneri. Omnis enim homo terrenus quid est origine nisi Adam ? Porro autem Adam habebat utique voluntatem, qua

²¹³ *De duab. anim.* 15 ; cf. *Op. imp. C. Iul.* 1, 104 ; *Enarr. In Ps.* 57, 18.

²¹⁴ *De duab. anim.* 16.

voluntate cum peccasset, *peccatum* per eum *intravit in mundum*²¹⁵.

VI. Itemque in eo quod dixi : *Natura esse malae* [479] *animae nullo modo queunt*²¹⁶, si quaeritur quomodo accipiamus quod ait Apostolus : *Fuimus et nos natura filii irae, sicut et ceteri*²¹⁷ ; respondemus naturam in his verbis meis me intellegi voluisse illam, quae proprie natura dicitur, in qua sine vitio creati sumus. Nam ista propter originem natura appellatur, quae origo utique habet vitium, quod est contra naturam. Et iterum in eo quod dictum est : *Peccati reum teneri quemquam, quia non fecit quod facere non potuit, summae iniquitatis et insaniae est*²¹⁸ ; cur ergo, inquiunt, parvuli tenentur rei ? Respondetur, quia ex eius origine tenentur qui non fecit quod facere potuit, divinum scilicet servare mandatum. Quod autem dixi : *Illae animae quidquid faciunt, si natura non voluntate faciunt, id est si libero et ad faciendum et ad non faciendum motu animi carent, si denique his abstinendi ab opere suo potestas nulla conceditur, peccatum earum tenere non possumus*²¹⁹, propterea non perturbat de parvulis quaestio, quia ex illius origine rei tenentur qui voluntate peccavit, quando libero et ad faciendum et ad non faciendum motu animi non carebat, eique ab

²¹⁵ Rom 5, 12.

²¹⁶ *De duab. anim.* 17.

²¹⁷ Eph 2, 3.

²¹⁸ *De duab. anim.* 17.

²¹⁹ *Ibidem.*

opere malo abstinendi summa potestas erat. Quod Manichaei de tenebrarum gente non dicunt, quam fabulosissime inducunt, eamque naturam semper malam numquam bonam fuisse contendunt.

VII. Illud autem quaeri potest quomodo dixerim : *Etiam si sunt animae, quod interim incertum est, corporeis officiis non peccato sed natura deditae nosque, quamquam sint inferiores, aliqua tamen interiore vicinitate contingunt, non illas ideo malas haberi oportere, quia nos, cum eas sequimur et corporea diligimus, mali sumus*²²⁰ ; quandoquidem de illis hoc [480] dixi, de quibus superius loqui coeperam dicens : *Quamquam etiam si eisdem concedatur inferiore alio genere animarum nos illici ad turpia, non inde conficiunt aut illas natura malas esse aut istas summum bonum*²²¹. De his enim disputationem usque ad hunc locum perduxì, ubi dixi : *Etiam si sunt animae, quod interim incertum est, corporeis officiis non peccato sed natura deditae* et cetera. Quaeri ergo potest, cur dixerim *quod interim incertum est*, cum prorsus dubitare non debuerim non esse tales animas. Sed hoc ideo dixi, quia expertus sum qui dicerent diabolum et angelos eius bonos esse in genere suo et in ea natura, in qua eos creavit Deus ordine proprio tales quales sunt, sed nobis malum esse, si illiciamur et seducamur ab eis, si autem caveamus eos atque vincamus, decorum atque gloriosum. Et

²²⁰ *De duab. anim. 20.*

²²¹ *Ibidem.*

hoc qui dicunt videntur sibi, ut id probent, de Scripturis adhibere idonea testimonia : vel illud quod scriptum est in libro Iob, cum diabolus describeretur : *Hoc est initium figmenti Domini quod fecit ad illudendum ab angelis suis*²²², vel illud in Psalmo centesimo tertio : *Draco hic quem finxisti ad illudendum ei*²²³. Quam quaestionem, quae non adversus Manichaeos qui hoc non sentiunt sed adversus alios qui hoc sentiunt suscipienda esset atque solvenda, pertractare atque enodare tunc nolui, ne librum multo quam vellem facerem longiorem, cum viderem etiam si hoc concederetur, tamen debere Manichaeos ac iam posse convinci introducentes insanissimo errore naturam mali aeterno bono coaeternam. Ideo ergo dixi *quod interim incertum est*, non quod ego inde dubitarem, sed quod inter me et illos, quos ita sapere inveneram, nondum esset ista quaestio dissoluta ; quam tamen in aliis longe posterioribus libris meis *De* [481] *Generi ad litteram* secundum Scripturas sanctas quanta potui manifestatione dissolvi²²⁴.

VIII. Alio loco : *Propterea, inquam, corporea diligendo peccamus, quia spiritalia diligere et iustitia iubemur et natura possumus, et tunc in nostro genere optimi et beatissimi sumus*²²⁵. Ubi quaeri potest, cur

²²² Iob 40, 19 (sec. i LXX).

²²³ Ps 103, 26.

²²⁴ *De Gen ad litt.* 11, 20 ss.

²²⁵ *De duab. anim.* 20.

*natura et non gratia possumus dixerim. Sed contra Manichaeos de natura quaestio versabatur. Et utique id agit gratia, ut sanata natura, quod vitata non potest, possit per eum qui venit quaerere et salvum facere quod perierat*²²⁶. Quam tamen gratiam etiam tunc recolens oravi pro familiarissimis meis, qui mortifero illo adhuc tenebantur errore, et dixi : *Deus magne, Deus omnipotens, Deus summae bonitatis, quem inviolabilem atque incommutabilem credi atque intellegi fas est, Trina Unitas, quam catholica Ecclesia colit, supplex oro expertus in me misericordiam tuam, ne homines, cum quibus mihi a pueritia in omni convictu fuit summa consensio, in tuo cultu a me dissentire permittas*²²⁷. Sic utique orans, iam fide retinebam, non solum conversos ad Deum gratia eius adiuvari ut proficiant ac perficiantur, ubi adhuc dici potest pro merito conversionis illorum istam dari gratiam, verum etiam ut convertantur ad Deum, ad ipsam Dei gratiam pertinere, quando quidem pro eis oravi qui erant ab illo nimis aversi, atque ut ad illum converterentur oravi.

Hic liber sic incipit : *Opitulante Dei misericordia.*
[482]

CAPUT XVI. ACTA CONTRA FORTUNATUM MANICHAEUM, LIBER UNUS.

I. Eodem tempore presbyterii mei contra
Fortunatum quendam Manichaeorum

²²⁶ Lucas 19, 10 ; Matth. 18, 11.

²²⁷ *De duab. anim.* 24.

presbyterum disputavi, qui plurimum temporis apud Hipponem vixerat seduxeratque tam multos, ut propter illos ibi eum delectaret habitare. Quae disputatio nobis altercantibus excepta est a notariis, veluti gesta conficerentur ; nam et diem habet et consulem. Hanc in librum memoriae mandandum conferre curavimus. Versatur ibi quaestio unde sit malum, me asserente exortum fuisse hominis malum ex libero voluntatis arbitrio, illo autem naturam mali Deo coaeternam persuadere moliente. Sed consequenti die tandem confessus est, nihil se adversus nos invenire quod diceret. Nec sane catholicus factus est, sed tamen ab Hippone discessit.

II. In hoc libro illud quod dixi : *Animam dico factam a Deo ut cetera omnia quae a Deo facta sunt, et inter illa quae Deus omnipotens fecit principalem locum datum esse animae*²²⁸, ita dixi ut hoc generaliter de universa creatura rationali accipi vellem, quamvis in Scripturis sanctis animas dictas esse angelorum aut non omnino aut non possit facile repperiri, sicut supra iam diximus.²²⁹ Item alio loco : *Ego dico, inquam, peccatum non esse, si non propria voluntate peccetur*²³⁰. Ubi peccatum illud intellegi volui, quod non est etiam poena peccati ; nam de tali poena dixi alibi in eadem disputatione quod dicendum

²²⁸ *Acta c. Fortun.* 1, 13.

²²⁹ *Retract.* 1, 11, 4.

²³⁰ *Acta c. Fortun.* 2, 21.

fuit²³¹. Itemque dixi : [483] *Ut postea eadem ipsa caro, quae nos poenis torsit in peccatis manentes, subiciatur nobis in resurrectione, et nulla adversitate nos quatiat, quominus legem et divina praecepta servemus*²³². Quod non ita est accipiendum, tamquam et in illo Dei regno, ubi incorruptibile atque immortale corpus habebimus, de Scripturis divinis lex et praecepta sumenda sint, sed quia perfectissime ibi lex aeterna servabitur, et illa duo praecepta de diligendo Deo et proximo²³³, non in lectione, sed in ipsa perfecta et sempiterna dilectione tenebimus.

Hoc opus sic incipit : *Quinto Kalendas Septembris, Arcadio Augusto bis et Rufino, viris clarissimis, consulibus.*

CAPUT XVII. DE FIDE ET SYMBOLO, LIBER UNUS.

17. Per idem tempus coram episcopis hoc mihi iubentibus, qui plenarium totius Africae concilium Hippone Regio agebant, *De fide ac Symbolo* presbyter disputavi. Quam disputationem nonnullis eorum qui nos familiarius diligebant studiosissime instantibus in librum contuli ; in quo de rebus ipsis ita disseritur, ut tamen non fiat verborum illa contextio, quae tenenda memoriter competentibus traditur. In hoc libro, cum de

²³¹ *Acta c. Fortun. 1, 15 ; Retract. 1, 15, 2.*

²³² *Acta c. Fortun. 2, 29.*

²³³ Cf. Marcus 12, 30 ; Lucas 10, 27.

resurrectione carnis ageretur: *Resurget, inquam, corpus secundum christianam fidem, quae fallere non potest. Quod cui videtur incredibile, qualis sit nunc caro attendit, qualis autem futura sit non considerat, quia illo tempore immutationis angelicae non iam caro erit et sanguis sed tantum corpus*²³⁴ et cætera, [484] quae ibi de corporum terrestrium in corpora caelestia mutatione disserui, quoniam dixit Apostolus, cum inde loqueretur: *Caro et sanguis regnum Dei non possidebunt*²³⁵. Sed quisquis ea sic accipit, ut existimet ita corpus terrenum, quale nunc habemus, in corpus caeleste resurrectione mutari, ut nec membra ista nec carnis sit futura substantia, procul dubio corrigendus est, commonitus de corpore Domini, qui post resurrectionem in eisdem membris non solum conspiciendus oculis, verum etiam manibus tractandus apparuit, carnemque se habere etiam sermone firmavit dicens: *Palpate et videte quia spiritus ossa et carnem non habet sicut me videtis habere*²³⁶. Unde constat Apostolum non carnis substantiam negasse in Dei regno futuram, sed aut homines qui secundum carnem vivunt carnis et sanguinis nomine nuncupasse aut ipsam carnis corruptionem, quae tunc utique nulla erit. Nam cum dixisset: *Caro et sanguis regnum Dei non possidebunt*, bene intellegitur tamquam exponendo

²³⁴ *De fide et symb.* 10, 24.

²³⁵ 1 Cor 15, 50.

²³⁶ Lucas 24, 39.

quid dixerit continuo subdidisse : *Neque corruptio incorruptionem possidebit*²³⁷. De qua re ad persuadendum infidelibus difficili diligenter quantum potui me disseruisse repperiet, quisquis *De civitate Dei* librum legerit novissimum²³⁸.

Hic liber sic incipit : *Quoniam scriptum est.*
[485]

CAPUT XVIII. DE GENESI AD LITTERAM
IMPERFECTUS, LIBER UNUS.

18. Cum *de Genesi* duos libros *contra Manichaeos* condidissem²³⁹, quoniam secundum allegoricam significationem Scripturae verba tractaveram, non ausus naturalium rerum tanta secreta ad litteram exponere, hoc est quemadmodum possent secundum historicam proprietatem quae ibi dicta sunt accipi, volui experiri in hoc quoque negotiosissimo ac difficillimo opere quid valerem ; sed in Scripturis exponendis tirocinium meum sub tanta sarcinae mole succubuit, et nondum perfecto uno libro ab eo quem sustinere non poteram labore conquievi. Sed in hoc opere, cum mea opuscula retractarem, iste ipse ut erat imperfectus venit in manus, quem neque edideram et abolere decreveram, quoniam scripsi postea duodecim libros quorum titulus

²³⁷ 1 Cor 15, 50.

²³⁸ *De civ. Dei* 22, 5, 21.

²³⁹ *Retract.* 1, 10.

est : *De Genesi ad litteram*²⁴⁰. In quibus quamvis multa quaesita potius quam inventa videantur, tamen eis iste nullo modo est comparandus. Verum et hunc posteaquam retractavi manere volui, ut esset index, quantum existimo, non inutilis rudimentorum meorum in enucleandis atque scrutandis divinis eloquiis ; eiusque titulum esse volui : *De Genesi ad litteram imperfectus*. Inveni quippe eum usque ad haec verba dictatum : *Pater tantum Pater est, nec Filius aliud est quam Filius ; quia et cum dicitur similitudo Patris, quamquam ostendat nullam intervenire dissimilitudinem, non tamen solus est Pater, si habet similitudinem*²⁴¹. Post haec repetivi verba Scripturae [486] rursus considerata atque tractanda : *Et dixit Deus : "Faciamus hominem ad imaginem et similitudinem nostram"*²⁴². Huc usque dictatum librum imperfectum reliqueram. Quod autem ibi sequitur addendum putavi cum eum retractarem ; nec sic tamen perfecì, sed hoc quoque addito imperfectum reliqui. Si enim perfecissem, saltem de omnibus operibus et verbis Dei, quae ad sextum diem pertinent, disputassem. In hoc libro ea notare quae mihi displicent, vel defendere quae aliis non bene intellecta displicere possunt, superfluum mihi visum est. Breviter enim potius admoneo, ut illi

²⁴⁰ *Retract.* 2, 24, 1.

²⁴¹ *De Gen ad litt. lib. imp.* 16, 60.

²⁴² Gen 1, 26.

duodecim libri legantur, quos longe postea episcopus feci, et ex ipsis de isto iudicetur.

Hic ergo sic incipit : *De obscuris naturalium rerum, quae omnipotente Deo artifice facta sentimus, non affirmando sed quaerendo tractandum est.*

CAPUT XIX. DE SERMONE DOMINI IN MONTE, LIBRI DUO.

I. Per idem tempus *De sermone Domini in monte* secundum Matthaeum duo volumina scripsi. In quorum primo propter id quod scriptum est : *Beati pacifici quoniam ipsi filii Dei vocabuntur*²⁴³, *Sapientia*, inquam, *congruit pacificis, in quibus iam ordinata sunt omnia nullusque motus adversus rationem rebellis est, sed cuncta obtemperant spiritui hominis, cum et ipse obtemperat Deo*²⁴⁴. Quod merito movet [487] quomodo dixerim. Non enim cuiquam provenire in hac vita potest, ut lex repugnans *legi mentis*²⁴⁵ omnino non sit in membris, quando quidem etiamsi ei sic resisteret spiritus hominis, ut in nullum eius laberetur assensum, non ideo tamen illa non repugnaret. Hoc ergo quod dictum est : *Nullum esse motum adversus rationem rebellem*, recte accipi potest id nunc agentibus pacificis, domando concupiscentias carnis, ut ad istam pacem plenissimam quandoque veniatur.

²⁴³ Matth. 5, 9.

²⁴⁴ *De serm. Dom. in m.* 1, 4, 11.

²⁴⁵ Cf. Rom 7, 23.

II. Proinde quod alio loco, cum eamdem sententiam evangelicam repetens dixissem : *Beati pacifici quoniam ipsi filii Dei vocabuntur*, adiunxi dicens : *Et ista quidem in hac vita compleri possunt, sicut completa esse in Apostolis credimus*²⁴⁶, sic accipiendum est, non ut in Apostolis hic viventibus nullum carnis motum arbitremur spiritui repugnasse, sed hactenus hic ista posse compleri, quatenus in Apostolis credimus esse completa, ea mensura scilicet perfectionis humanae, quanta in hac vita potest esse perfectio. Non enim dictum est : ista in hac vita compleri possunt, nam completa esse in Apostolis credimus, sed dictum est : *sicut completa esse in Apostolis credimus*, ut ita compleantur sicut in illis completa sunt, id est quadam perfectione, cuius capax est ista vita, non sicut complenda sunt illa quam speramus pace plenissima, quando dicetur : *Ubi est, mors, contentio tua* ?²⁴⁷

III. Alio loco quod interposui testimonium : *Non enim ad mensuram dat Deus spiritum*²⁴⁸, nondum intellexeram de Christo proprie verius accipi. Aliis quippe hominibus nisi ad mensuram daretur spiritus, non duplum peteret Eliseus quam fuit in Elia²⁴⁹. Item quod scriptum est : *Iota unum aut unus*

²⁴⁶ De serm. Dom. in m. 1, 4, 12.

²⁴⁷ 1 Cor 15, 55.

²⁴⁸ De serm. Dom. in m. 1, 6, 17 ; Io 3, 34.

²⁴⁹ 4 Reg 2, 9.

apex non transiet a lege [488] *donec omnia fiant*²⁵⁰, cum exponerem, dixi: *nihil posse aliud intellegi nisi vehementem perfectionis expressionem*²⁵¹. Ubi merito quaeritur, utrum ista perfectio sic possit intellegi, ut tamen verum sit, neminem iam utentem voluntatis arbitrio hic vivere sine peccato. A quo enim usque ad unum apicem lex perfici potest, nisi a quo fiunt universa divina mandata? Sed in eisdem mandatis est etiam quod iubemur dicere: *Dimitte nobis debita nostra sicut et nos dimittimus debitoribus nostris*²⁵², quam orationem usque in finem saeculi tota dicit Ecclesia. Omnia ergo mandata facta deputantur, quando quidquid non fit ignoscitur.

IV. Sane quod ait Dominus: *Quicumque solverit unum de mandatis istis minimis et docuerit sic*²⁵³, et cetera, usque ad eum locum ubi ait: *Nisi abundaverit iustitia vestra plus quam scribarum et pharisaeorum, non intrabitis in regnum caelorum*²⁵⁴; multo melius et convenientius exposui in aliis posterioribus sermonibus meis, quod etiam hic retexere longum est. Ad hoc autem iste ibi perducitur sensus, ut eorum sit iustitia maior quam scribarum et pharisaeorum qui dicunt et faciunt. De scribis quippe et Pharisees alio loco

²⁵⁰ Matth. 5, 18.

²⁵¹ *De serm. Dom. in m.* 1, 8, 20.

²⁵² Matth. 6, 12.

²⁵³ Matth. 5, 19 ss.

²⁵⁴ *De serm. Dom. in m.* 1, 9, 21.

ipse Dominus ait : *Dicunt enim et non faciunt*²⁵⁵. Illud etiam melius intelleximus postea²⁵⁶ quod scriptum est : *Qui irascitur fratri suo*²⁵⁷. Codices enim Greci non habent *sine causa*, sicut hic positum est, quamvis idem ipse sit sensus. Illud enim diximus intuendum, quid sit irasci fratri suo, quoniam non fratri irascitur, qui peccato fratris irascitur. Qui ergo fratri non peccato irascitur, sine causa irascitur.

V. Item quod dixi : *Hoc et de patre et de matre et* [489] *de cæteris vinculis sanguinis intellegendum est, ut in eis oderimus quod genus humanum nascendo et moriendo sortitum est*²⁵⁸, ita sonat, quasi non essent futurae istae necessitudines, si nullo naturae humanae praecedente peccato nemo moreretur, quem sensum iam superius improbavi²⁵⁹. Essent enim profecto cognationes et affinitates, etiamsi originali nullo existente peccato, sine morte cresceret et multiplicaretur genus humanum. Ac per hoc aliter solvenda quaestio est, cur Dominus praeceperit diligendos inimicos²⁶⁰, cum alio loco praecipiat odio habendos et parentes et filios²⁶¹, non sicut hic soluta est, sed sicut eam posterius

²⁵⁵ Matth. 23, 3.

²⁵⁶ Cf. *De civ. Dei* 21, 27.

²⁵⁷ Matth. 5, 22 ; *De serm. Dom. in m.* 1, 9, 25.

²⁵⁸ *De serm. Dom. in m.* 1, 15, 41.

²⁵⁹ *Retract.* 1, 10, 2. 13, 8.

²⁶⁰ Matth. 5, 44 ; Lucas 6, 27.

²⁶¹ Matth. 10, 37 ; Lucas 14, 26.

saepe solvimus²⁶², id est ut diligamus inimicos lucrandos regno Dei, et oderimus in propinquis si impediunt a regno Dei.

VI. Item de praecepto quo prohibetur uxor dimitti, nisi propter fornicationem²⁶³ hic quidem scrupulosissime disputavi²⁶⁴. Sed quam velit Dominus intellegi fornicationem, propter quam liceat dimittere uxorem, utrum eam quae damnatur in stupris an illam de qua dicitur : *Perdidisti omnem qui fornicatur abs te*²⁶⁵, in qua utique et ista est (neque enim non fornicatur a Domino qui *tollens membra Christi facit ea membra meretricis*²⁶⁶), etiam atque etiam cogitandum est atque requirendum. Nec volo in re tanta tamque ad dignoscendum difficili putare lectorem, istam sibi nostram disputationem debere sufficere ; sed legat et alia, sive nostra quae postea scripta sunt, sive aliorum melius considerata atque tractata²⁶⁷ ; vel ipse si potest ea quae hic merito movere possunt vigilantiore atque intellegentiore mente discutiatur. Non quia omne peccatum fornicatio est (neque enim omnem peccantem Deus perdit, qui quotidie sanctos suos exaudit dicentes : *Dimitte nobis debita nostra*²⁶⁸, [490] cum perdat omnem qui

²⁶² *De civ. Dei* 21, 26 ; *De vera rel.* 45, 85 ss.

²⁶³ Matth. 5, 32.

²⁶⁴ *De serm. Dom. in m.* 1, 16, 43.

²⁶⁵ Ps 72, 27.

²⁶⁶ 1 Cor 6, 15.

²⁶⁷ *Quaest. in Hept.* 2, 71 ; cf. *Serm.* 162.

²⁶⁸ Matth. 6, 12.

fornicatur ab eo), sed quatenus intellegenda atque limitanda sit haec fornicatio, et utrum etiam propter hanc liceat dimittere uxorem, latebrosissima quaestio est. Licere tamen propter istam quae in stupris committitur, nulla quaestio est. Et ubi dixi : *hoc permissum esse non iussum*, non attendi aliam Scripturam dicentem : *Qui tenet adulteram stultus et impius est*²⁶⁹. Nec sane dixerim adulteram fuisse deputandam illam mulierem, etiam posteaquam audivit a Domino : *Nec ego te damnabo ; vade deinceps iam noli peccare*²⁷⁰, si hoc oboedienter audivit.

VII. Alio loco peccatum fratris ad mortem, de quo dicit Ioannes apostolus : *Non pro illo dico ut roget quis*²⁷¹, ita definivi ut dicerem : *Peccatum fratris ad mortem puto esse, cum post agnitionem Dei per gratiam Domini nostri Iesu Christi quisque oppugnat fraternitatem et adversus ipsam gratiam, qua reconciliatus est Deo, invidientiae facibus agitur*²⁷². Quod quidem non confirmavi, quoniam hoc putare me dixi ; sed tamen addendum fuit : si in hac tam scelerata mentis perversitate finierit hanc vitam, quoniam de quocumque pessimo in hac vita constituto non est utique desperandum, nec pro illo imprudenter oratur de quo non desperatur.

²⁶⁹ Prov. 18, 22.

²⁷⁰ Io 8, 11.

²⁷¹ 1 Io 5, 16.

²⁷² De serm. Dom. in m. 1, 22, 73.

VIII. In secundo item libro : *Nulli, inquam, licebit ignorare Dei regnum, cum eius Unigenitus non solum intellegibiliter, sed etiam visibiliter in homine dominico de caelo venerit " indicaturus vivos et mortuos "*²⁷³. Sed non video utrum recte dicatur homo dominicus qui est *Mediator Dei et hominum homo Christus Iesus*²⁷⁴, cum sit utique Dominus. Dominicus autem homo quis in eius sancta familia non potest dici? Et hoc quidem ut dicerem apud quosdam legi tractatores [491] catholicos divinorum eloquiorum²⁷⁵. Sed ubicumque hoc dixi, dixisse me nollem²⁷⁶. Postea quippe vidi non esse dicendum, quamvis nonnulla possit ratione defendi. Item quod dixi : *Nullius enim fere conscientia Deum potest odisse*²⁷⁷, non video fuisse dicendum ; multi enim sunt de quibus scriptum est : *Superbia eorum qui oderunt te*²⁷⁸.

IX. Alio loco in eo quod dixi : *Ob hoc dixisse Dominum : " Sufficit diei malitia sua ", quia cibos sumere urgebit ipsa necessitas, quam propterea malitiam nominatam arbitror, quia poenalis est nobis, pertinet enim ad hanc fragilitatem quam peccando meruimus*²⁷⁹, non attendi etiam primis hominibus data fuisse in

²⁷³ *De serm. Dom. in m. 2, 6, 20 ; cf. 2 Tim 4, 1.*

²⁷⁴ 1 Tim 2, 5.

²⁷⁵ Cf. Epiph., *Ancor.* 93 ; Athan., *Exp. fidei* 1. 4 ; *Disp. c. Ar.* 20 ; Cassian., *Coll.* 11, 13.

²⁷⁶ *De serm. Dom. in m. 2, 6, 22 ; cf. Enarr. in Ps 1, 1 ; 8, 13.*

²⁷⁷ *De serm. Dom. in m. 2, 14, 48.*

²⁷⁸ Ps 73, 23.

²⁷⁹ *De serm. Dom. in m. 2, 17, 56 ; cf. Matth. 6, 34.*

paradiso corporis alimenta, antequam istam mortis poenam peccando meruissent. Sic enim erant immortales in corpore nondum spiritali sed animali, ut tamen in eiusmodi immortalitate alimentis corporalibus uterentur. Item quod dixi : *Quam sibi elegit Deus " gloriosam Ecclesiam non habentem maculam neque rugam "*²⁸⁰, non ideo dixi, quia nunc ex omni parte iam talis est, quamvis ad hoc electa non dubitaretur, ut talis sit quando *Christus apparuerit vita*²⁸¹ eius, *tunc* enim et ipsa cum illo apparebit in gloria, propter quam gloriam dicta est *Ecclesia gloriosa*. Item quod Dominus ait : *Petite et accipietis, quaerite et invenietis, pulsate et aperietur vobis*²⁸², operose quidem tria ista quid inter se differant exponendum putavi²⁸³; sed longe melius ad instantissimam petitionem omnia referuntur. Hoc quippe ostendit ubi eodem verbo cuncta conclusit dicens : *Quanto magis Pater vester qui in caelis est [492] dabit bona petentibus se*²⁸⁴, non enim dixit : " petentibus et quaerentibus et pulsantibus ".

Hoc opus sic incipit : *Sermonem quem locutus est Dominus.*

CAPUT XX. PSALMUS CONTRA PARTEM DONATI.

²⁸⁰ *De serm. Dom. in m. 2, 19, 66 ; cf. Eph 5, 27.*

²⁸¹ Col 3, 4.

²⁸² Matth. 7, 7.

²⁸³ *De serm. Dom. in m. 2, 21, 71 s.*

²⁸⁴ Matth. 7, 11.

Volens etiam causam Donatistarum ad ipsius humillimi vulgi et omnino imperitorum atque idiotarum notitiam pervenire, et eorum quantum fieri per nos posset inhaerere memoriae, Psalmum qui eis cantaretur per Latinas litteras feci, sed usque ad V litteram. Tales autem *abecedarios* appellant. Tres vero ultimas omisi ; sed pro eis novissimum quasi epilogum adiunxi, tamquam eos mater alloqueretur Ecclesia. Hypopsalma etiam, quod respondetur, et prooemium causae, quod nihilominus cantaretur, non sunt in ordine litterarum ; earum quippe ordo incipit post prooemium. Ideo autem non aliquo carminis genere id fieri volui, ne me necessitas metrica ad aliqua verba quae vulgo minus sunt usitata compelleret.

Iste Psalmus sic incipit : *Omnes qui gaudetis de pace, modo verum iudicate*, quod eius hypopsalma est. [493]

CAPUT XXI. CONTRA EPISTOLAM DONATI HERETICI, LIBER UNUS.

I. Librum etiam *Contra epistolam Donati*, qui partis Donati secundus post Maiorinum episcopus apud Carthaginem fuit, eodem presbyterii mei tempore scripsi ; in qua epistola ille agit, ut non nisi in eius communione baptismus Christi esse credatur, cui nos contradicimus in hoc libro. In quo dixi quodam loco de apostolo Petro, quod *in illo tamquam in petra fundata sit*

*Ecclesia*²⁸⁵, qui sensus etiam cantatur ore multorum in versibus beatissimi Ambrosii, ubi de gallo gallinacio ait : *Hoc ipse petra Ecclesiae canente, culpam di- luit*²⁸⁶. Sed scio me postea saepissime sic exposuisse²⁸⁷ quod a Domino dictum est : *Tu es Petrus, et super hanc petram aedificabo Ecclesiam meam*²⁸⁸, ut super hunc intellexeretur quem confessus est Petrus dicens : *Tu es Christus filius Dei vivi*²⁸⁹, ac sic Petrus ab hac petra appellatus personam Ecclesiae figuraret, quae *super hanc petram* aedificatur et accepit *claves regni caelorum*²⁹⁰. Non enim dictum illi est : " Tu es petra ", sed : *Tu es Petrus. Petra autem erat Christus*²⁹¹ ; quem confessus Simon, sicut eum tota Ecclesia confitetur, dictus est *Petrus*. Harum autem duarum sententiarum quae sit probabilior, eligat lector.

II. Alio loco dixi : *Nullius mortem Deus quaerit*, quod sic accipiendum est, quia homo sibi adquisivit mortem deserens Deum et acquirit qui non recurrit ad Deum, secundum quod scriptum est : *Deus mortem* [494] *non fecit*²⁹². Sed etiam illud

²⁸⁵ Cf. Optat. Milev., *De schism. Donat.* 1, 19 ; 3, 1.

²⁸⁶ Ambros., *Hymn.* 1 ; cf. *Exam.* 5, 24, 88.

²⁸⁷ Cf. *Serm.* 76, 1, 1.

²⁸⁸ Matth. 16, 18 ; Io 1, 42.

²⁸⁹ Matth. 16, 16 ; Io 6, 69.

²⁹⁰ Matth. 16, 19.

²⁹¹ 1 Cor 10, 4.

²⁹² Sap 1, 13.

non minus verum est : *Vita et mors a Domino Deo est*²⁹³, vita scilicet a donante, mors a vindicante.

III. Item quod dixi : *Donatum*, cuius epistolam refellebam, *rogasse, ut Imperator inter ipsum et Caecilianum transmarinos episcopos iudices daret*²⁹⁴, non ipsum sed alium Donatum, eiusdem tamen schismatis, hoc fecisse probabilius invenitur. Ille autem non erat Carthaginiensis Donatarum episcopus sed a Casis Nigris, qui tamen primus apud Carthaginem ipsum nefarium schisma commisit. Nec sane *Donatus Carthaginiensis ut Christiani rebaptizarentur instituit*, quod ego eum instituisse credideram, quando eius epistolae respondebam. Nec de libro *Ecclesiastici* ipse abstulit de media sententia verba ad rem necessaria, ubi cum scriptum sit : *Qui baptizatur a mortuo, et iterum tangit illum, quid proficit lavatio eius ?*²⁹⁵ Iste sic posuit tamquam scriptum esset : *Qui baptizatur a mortuo, quid proficit lavatio eius ?* Nos autem, et antequam esset pars Donati, sic habuisse codices plurimos, verumtamen Afros, ut non esset in medio : *et iterum tangit illum*, postea didicimus. Quod si tunc scissem, non in istum tamquam in furem divini eloquii vel violatorem tanta dixissem.

Hic liber sic incipit : *Abs te ipso praesente audieram.* [495]

²⁹³ Eccli 11, 14.

²⁹⁴ Cf. *De bapt.* 6, 34, 65 ; *C. Crescon.* 2, 27, 33.

²⁹⁵ Eccli 34, 30 ; cf. *Ep.* 108, 6.

CAPUT XXII. CONTRA ADIMANTUM MANICHAEI DISCIPULUM, LIBER UNUS.

I. Eodem tempore venerunt in manus meas quaedam *Disputationes* Adimanti, qui fuerat Manichaei discipulus, quas conscripsit adversus Legem et Prophetas, velut contraria eis evangelica et apostolica Scripta demonstrare conatus. Huic ergo respondi verba eius ponens eisque reddens responsionem meam. Quod opus uno volumine conclusi, et in eo quibusdam quaestionibus non semel sed iterum respondi, quoniam quod primum responderam perierat et tunc inventum est, cum iam iterum respondissem. Aliquas sane earumdem quaestionum popularibus ecclesiasticis sermonibus solvi²⁹⁶. Adhuc etiam quibusdam non respondi; aliquae remanserunt, quae rebus aliis magis urgentibus praetermissae sunt cumulo quoque oblivionis adiuncto.

II. In hoc ergo dixi: *Certis enim quibusdam umbris et figuris rerum ante Domini adventum, secundum mirabilem atque ordinatissimam distributionem temporum, populus ille tenebatur qui Testamentum Vetus accepit, tamen in eo tanta praedicatio et praenuntiatio Novi Testamenti est, ut nulla in evangelica atque apostolica doctrina repperiantur, quamvis ardua et divina praecepta et promissa, quae illis etiam libris veteribus desint*²⁹⁷. Sed addendum erat: *pene, atque*

²⁹⁶ *Serm.* 1; 50; 142; 153.

²⁹⁷ *C. Adiman.* 3, 4.

dicendum : *Ut pene nulla in evangelica atque apostolica doctrina repperiantur quamvis ardua et divina praecepta et promissa, quae illis etiam Libris veteribus desint.* Quid [496] est enim quod in sermone evangelico in monte Dominus dicit : *Audistis quod dictum est antiquis hoc, ego autem dico vobis hoc*²⁹⁸, si nihil ipse amplius praecepit quam praeceptum est in illis veteribus Libris ? Deinde *regnum caelorum* illi populo fuisse promissum non legimus in his quae promissa sunt Lege data per Moysen in monte Sina²⁹⁹, quod proprie Vetus dicitur Testamentum ; quod praefiguratum dicit Apostolus per ancillam Sarae et filium eius³⁰⁰ ; sed ibi figuratum est et Novum per ipsam Saram et filium eius. Proinde si figurae discutiantur, omnia ibi prophetata repperiuntur quae sunt praesentata vel exspectantur praesentanda per Christum. Verumtamen propter quaedam praecepta non figurata sed propria, quae non in Vetere Testamento sed in Novo inveniuntur, cautius et moderatius diceretur : *pene nulla*, quam *nulla* hic esse quae non sint et illic, quamvis illic sint duo illa praecepta de dilectione Dei et proximi³⁰¹, quo rectissime omnia et legitima et prophetica et evangelica et apostolica referuntur.

²⁹⁸ Matth. 5, 21-22.

²⁹⁹ Cf. Ex 19, 3-4.

³⁰⁰ Gal 4, 22-23.

³⁰¹ Lev 19, 18 ; Deut 6, 5 ; Matth. 5, 43 ; 19, 19 ; 22, 37-39.

III. Item quod dixi : *Tribus modis in Scripturis sanctis filiorum nomen accipitur*³⁰², minus considerate dictum est. Et alios enim quosdam modos sine dubio praetermisimus ; sicut dicitur *filius gehennae*³⁰³, vel *filius adoptivus*³⁰⁴, quae utique nec secundum naturam nec secundum doctrinam nec secundum imitationem dicuntur. Quorum trium modorum, tamquam soli sint, exempla reddidimus : secundum naturam, sicut Iudaei *filius Abrahae*³⁰⁵ ; secundum doctrinam sicut filios suos quos Evangelium docuit, Apostolus vocat³⁰⁶ ; secundum imitationem sicut filii Abrahae nos sumus, cuius imitamur fidem³⁰⁷. Quod autem dixi : *Cum induerit incorruptionem et* [497] *immortalitatem, iam non caro et sanguis erit*³⁰⁸, secundum corruptionem carnalem dictum est carnem non futuram, non secundum substantiam secundum quam Domini corpus, etiam post resurrectionem *caro* appellata est³⁰⁹.

IV. Alio loco : *Nisi quisque, inquam, voluntatem mutaverit, bonum operari non potest, quod in nostra potestate esse positum alio loco docet, ubi ait : " Aut facite arborem bonam et fructum eius bonum, aut*

³⁰² C. Adiman. 5, 1.

³⁰³ Matth. 23, 15.

³⁰⁴ Rom 8, 15 ; Gal 4, 5.

³⁰⁵ Io 8, 37.

³⁰⁶ 1 Cor 4, 14-15.

³⁰⁷ Gal 3, 7.

³⁰⁸ C. Adiman. 12, 5 ; cf. 1 Cor 15, 54.

³⁰⁹ Lucas 24, 39.

facite arborem malam et fructum eius malum ³¹⁰. Quod non est contra gratiam Dei quam praedicamus. In potestate est quippe hominis mutare in melius voluntatem ; sed ea potestas nulla est, nisi a Deo detur, de quo dictum est : *Dedit eis potestatem filios Dei fieri*³¹¹. Cum enim hoc sit in potestate quod cum volumus facimus, nihil tam in potestate quam ipsa voluntas est ; sed *praeparatur voluntas a Domino*³¹². Eo modo ergo dat potestatem. Sic intellegendum est et quod dixi postea : *In nostra potestate esse, ut vel inseri bonitate Dei vel excidi eius severitate mereamur*³¹³, quia in potestate nostra non est nisi quod nostram sequitur voluntatem, quae cum fortis et potens praeparatur a Domino, facile fit opus pietatis etiam quod difficile atque impossibile fuit.

Hic liber sic incipit : *De eo quod scriptum est : " In principio fecit Deus caelum et terram "*. [498]

CAPUT XXIII. EXPOSITIO QUARUMDAM PROPOSITIONUM EX EPISTOLA APOSTOLI AD ROMANOS.

I. Cum presbyter adhuc essem, contigit ut apud Carthaginem inter nos qui simul eramus, *ad Romanos* Apostoli *Epistola* legeretur, et quaedam interrogabar a fratribus ; quibus cum sicut

³¹⁰ C. *Adiman.* 26, 1 ; cf. Matth. 12, 33.

³¹¹ Io 1, 12.

³¹² Prov 8, 35 (sec.LXX).

³¹³ C. *Adiman.* 27, 1.

poteram responderem, voluerunt scribi potius quae dicebam quam sine litteris fundi. Ubi cum eis obtemperarem, liber unus accessit superioribus opusculis meis. In quo libro : *Quod autem ait, inquam, " Scimus quia lex spiritualis est, ego autem carnalis sum "*, satis ostendit non posse impleri legem nisi a spiritualibus, quales facit gratia Dei³¹⁴. Quod utique non ex persona Apostoli accipi volui, qui iam spiritualis erat, sed hominis *sub lege* positi nondum *sub gratia*³¹⁵. Sic enim prius haec verba sapiebam, quae postea lectis quibusdam divinorum tractatoribus eloquiorum, quorum me moveret auctoritas³¹⁶, consideravi diligentius et vidi etiam de ipso Apostolo posse intellegi quod ait : *Scimus quia lex spiritualis est, ego autem carnalis sum*. Quod in eis libris, quos contra Pelagianos nuper scripsi³¹⁷, quantum potui diligenter ostendi. In isto ergo libro et hoc quod dictum est : *Ego autem carnalis sum*, et deinde cetera usque ad eum locum ubi dicit : *Miser ego homo, quis me liberabit de corpore mortis huius ? Gratia Dei per Iesum Christum Dominum nostrum*³¹⁸, dixi hominem describi adhuc sub lege nondum [499] sub gratia constitutum, bene facere volentem, sed victum concupiscentia carnis male facientem. A cuius concupiscentiae

³¹⁴ *Exp. quar. prop. ad Rom.* 41 ; cf. *Rom* 7, 14.

³¹⁵ Cf. *Rom* 1, 11 ; 6, 14-15.

³¹⁶ Cyprian., *De Dom. orat.* 16 ; Ambros., *De paenit.* 1, 3.

³¹⁷ *De grat. Chr.* 43 ; *C. duas epp. Pelag.* 1, 17-25 ; *C. Iul.* 2, 3 ; 6, 23, 70 ; *Opus imp. c. Iul.* 1, 99 ; *Serm.* 154 ; cf. *Exp. ep. ad Gal.* 5 ; *De civ. Dei* 22, 21.

³¹⁸ *Rom* 7, 24-25.

dominatu non liberat nisi *gratia Dei per Iesum Christum Dominum nostrum*³¹⁹, dono Spiritus Sancti, per quem *diffusa caritas in cordibus nostris*³²⁰, vincit carnis concupiscentias, ne consentiamus eis ad male faciendum, sed potius bona faciamus. Unde quidem iam evertitur haeresis Pelagiana, quae vult non ex Deo nobis sed ex nobis esse caritatem qua bene ac pie vivimus. Sed in illis libris³²¹, quos adversus eos edidimus, etiam spiritalis hominis iamque sub gratia constituti melius intellegi verba ista monstravimus propter corpus carnis, quod spiritale nondum est, erit autem in resurrectione mortuorum, et propter ipsam carnis concupiscentiam, cum qua ita confligunt sancti non ei consentientes ad malum, ut tamen eius motibus, quibus repugnantibus resistunt, non careant in hac vita ; non eos autem habebunt in illa, ubi *absorbebitur mors in victoriam*³²². Propter hanc itaque concupiscentiam motusque ipsos, quibus ita resistitur, ut tamen sint in nobis, potest quisque sanctus iam *sub gratia* positus dicere ista omnia, quae hic esse dixi verba hominis nondum *sub gratia* positi sed *sub lege*. Quod hic ostendere longum est, et ubi hoc ostenderim dictum est³²³.

³¹⁹ Rom 7, 25.

³²⁰ Rom 5, 5.

³²¹ *C. duas epp. Pelag.* 1, 10, 17 ; *De perf. inst. hom.* 11, 28 ; *De grat. Chr.* 39, 43-44.

³²² 1 Cor 15, 54.

³²³ Cf. *Retract.* 1, 23, 1.

II. Item disputans quid elegerit Deus in nondum nato, cui dixit servituum esse maiorem, et quid in eodem maiore similiter nondum nato reprobaverit, de quibus propter hoc commemoratur, quamvis longe postea prolatum propheticum testimonium : *Iacob dilexi, Esau autem odio habui*³²⁴, ad hoc perduxit ratiocinationem ut dicerem : *Non ergo elegit Deus opera cuiusquam in praescientia, quae ipse daturus est, sed [500] fidem elegit in praescientia, ut quem sibi crediturum esse praescivit, ipsum elegerit cui Spiritum Sanctum daret, ut bona operando etiam vitam aeternam consequeretur*³²⁵. Nondum diligentius quaesiveram nec adhuc inveneram, qualis sit electio gratiae, de qua idem dicit Apostolus : *Reliquiae per electionem gratiae salvae factae sunt*³²⁶. Quae utique non est gratia, si eam merita ulla praecedant, ne iam quod datur non secundum gratiam sed secundum debitum reddatur potius meritis quam donetur. Proinde quod continuo dixi : *Dicit enim idem Apostolus : "Idem Deus qui operatur omnia in omnibus"*³²⁷, nusquam autem dictum est : *Deus credit omnia in omnibus*, ac deinde subiunxi : *Quod ergo credimus nostrum est, quod autem bonum operamur illius est qui credentibus dat Spiritum Sanctum*³²⁸, profecto non dicerem, si iam

³²⁴ Rom 9, 13 ; cf. Mal 1, 2-3.

³²⁵ *Exp. quar. prop. ad Rom.* 60 ; cf. *De praed. sanct.* 1, 3.

³²⁶ Rom 11, 5.

³²⁷ 1 Cor 12, 6.

³²⁸ *Exp. quar. prop. ad Rom.* 60.

scirem etiam ipsam fidem inter Dei munera repperiri, quae dantur *in eodem Spiritu*³²⁹. Utrumque ergo nostrum est propter arbitrium voluntatis, et utrumque tamen datum est per Spiritum fidei et caritatis. Neque enim sola caritas, sed sicut scriptum est : *Caritas cum fide a Deo Patre et Domino nostro Iesu Christo*³³⁰.

III. Et quod paulo post dixi : *Nostrum est enim credere et velle, illius autem dare credentibus et volentibus facultatem bene operandi per Spiritum Sanctum, per quem " caritas diffunditur in cordibus nostris "*³³¹, verum est quidem ; sed eadem regula et utrumque ipsius est, quia ipse praeparat voluntatem, et utrumque nostrum, quia non fit nisi volentibus nobis. Ac per hoc quod etiam postea dixi : *Quia neque velle possumus nisi vocemur ; et cum post vocationem voluerimus, non sufficit voluntas nostra et cursus noster, nisi Deus et vires [501] currentibus praebeat et perducatur quo vocat*³³², ac deinde subiunxi : *Manifestum est ergo " non volentis neque currentis sed miserentis Dei esse "*³³³ quod bene operamur, omnino verissimum est. Sed parum de ipsa vocatione disserui, quae fit secundum propositum Dei. Non enim omnium qui vocantur talis est sed tantum electorum. Itaque quod paulo post dixi : *Sicut enim in his quos*

³²⁹ Cf. 1 Cor 12, 9.

³³⁰ Eph 6, 23.

³³¹ *Exp. quar. prop. ad Rom.* 61 ; cf. Rom 5, 5.

³³² *Exp. quar. prop. ad Rom.* 62.

³³³ Rom 9, 16.

*eligit Deus non opera sed fides inchoat meritum, ut per munus Dei bene operentur, sic in his quos damnat infidelitas et impietas inchoat poenae meritum, ut per ipsam poenam etiam male operentur*³³⁴, verissime dixi. Sed fidei meritum etiam ipsum esse donum Dei nec putavi quaerendum esse nec dixi.

IV. Et alio loco : *Cuius enim miseretur, inquam, facit eum bene operari, et quem obdurat, relinquit eum ut male operetur. Sed et illa misericordia praecedenti merito fidei tribuitur, et ista obduratio praecedenti impietati*³³⁵, quod quidem verum est. Sed adhuc quaerendum erat, utrum et meritum fidei de misericordia Dei veniat, id est utrum ista misericordia ideo tantummodo fiat in homine, quia fidelis est, an etiam facta fuerit, ut fidelis esset. Legimus enim dicente Apostolo : *Misericordiam consecutus sum ut fidelis essem*³³⁶ ; non ait : Quia fidelis eram. Fideli ergo datur quidem, sed data est etiam ut esset fidelis. Rectissime itaque alio loco in eodem libro dixi : *Quoniam si non ex operibus sed misericordia Dei et vocamur ut credamus, et credentibus praestatur ut bene operemur, non est gentibus ista invidenda misericordia*³³⁷, quamvis minus ibi diligenter de illa, quae per Dei propositum fit, vocatione tractaverim.

Hic liber sic incipit : *Sensus hi sunt in Epistola Pauli ad Romanos.*

³³⁴ *Exp. quar. prop. ad Rom. 62.*

³³⁵ *Exp. quar. prop. ad Rom. 62 ; cf. Rom 9, 18.*

³³⁶ 1 Cor 7, 25.

³³⁷ *Exp. quar. prop. ad Rom. 64.*

CAPUT XXIV. EXPOSITIO EPISTOLÆ AD
GALATAS, LIBER UNUS.

I. Post hunc librum exposui eiusdem Apostoli *Epistolam ad Galatas* non carptim, id est aliqua praetermittens, sed continuanter et totam. Hanc autem expositionem uno volumine comprehendi. In quo illud quod dictum est : *Priores ergo Apostoli veraces, qui non ab hominibus sed a Deo per hominem missi sunt, per Iesum Christum scilicet adhuc mortalem. Verax etiam novissimus Apostolus, qui per Iesum Christum totum iam Deum post resurrectionem eius missus est*³³⁸, propter immortalitatem dictum est *totum iam Deum*, quam post resurrectionem habere coepit, non propter divinitatem semper immortalem, a qua numquam recessit, in qua totus Deus erat, et cum moriturus adhuc erat. Hunc autem sensum sequentia manifestant ; adiunxi enim dicens : *Priores sunt ceteri Apostoli per Christum adhuc ex parte hominem, id est mortalem, novissimus est apostolus Paulus per Christum iam totum Deum, id est omni ex parte immortalem*³³⁹. Hoc enim dixi exponens quod ait Apostolus : *Non ab hominibus neque per hominem, sed per Iesum Christum et Deum Patrem*³⁴⁰, quasi iam Iesus Christus non sit homo. Sequitur enim : *Qui suscitavit illum a mortuis*, ut hinc appareret cur dixerit : *neque per hominem*. Proinde propter immortalitatem iam nunc non

³³⁸ Exp. ep. ad Gal. 2, 3.

³³⁹ Exp. ep. ad Gal. 2, 4.

³⁴⁰ Gall, 1.

homo Christus Deus, propter substantiam vero naturae humanae, in qua *ascendit in caelum*, [503] etiam nunc *Mediator Dei et hominum homo Christus Iesus*³⁴¹, quoniam sic veniet, quomodo eum viderunt qui viderunt euntem in caelum³⁴².

II. Item quod dixi : *Gratia Dei est qua nobis donantur peccata ut reconciliemur Deo, pax autem qua reconciliamur Deo*³⁴³, sic accipiendum est, ut tamen sciamus etiam utrumque ad generalem Dei gratiam pertinere, quomodo in populo Dei aliud specialiter Israel aliud Iudas, et tamen utrumque generaliter Israel. Item cum exponerem : *Quid ergo ? Lex transgressionis gratia proposita est*, ita distinguendum putavi, ut interrogatio esset : *Quid ergo ?* ac deinde responsio : *Lex transgressionis gratia proposita est*³⁴⁴. Quod quidem non abhorret a vero ; sed melior mihi videtur ista distinctio, ut interrogatio sit : *Quid ergo lex ?* Et inferatur responsio : *Transgressionis gratia proposita est*³⁴⁵. Quod autem dixi : *Ordinatissime itaque subiungit : "Quod si spiritu ducimini, non adhuc estis sub lege"*³⁴⁶, ut intellegamus eos esse sub lege, quorum spiritus ita concupiscit adversus carnem, ut non ea quae volunt faciant, id est non se teneant invictos in caritate iustitiae,

³⁴¹ I Tim 2, 5.

³⁴² Act 1, 11.

³⁴³ *Exp. ep. ad Gal.* 3.

³⁴⁴ *Exp. ep. ad Gal.* 24 ; cf. Gal 3, 19.

³⁴⁵ *Epist.* 82, 20.

³⁴⁶ Gal 5, 18.

*sed a concupiscente adversum se carne vincantur*³⁴⁷, hoc ex illo sensu est, quo sentiebam id quod dictum est : "*Caro concupiscit adversus spiritum, et spiritus adversus carnem, haec enim invicem adversantur, ut non ea quae vultis faciatis*"³⁴⁸, ad eos pertinere qui *sub lege* sunt nondum *sub gratia*. Adhuc enim non intellexeram haec verba et illis qui *sub gratia* sunt non *sub lege*, propterea convenire, quia et ipsi concupiscentias carnis, contra quas spiritu concupiscunt, quamvis eis non consentiant, nollent tamen ullas habere si possent. Et ideo non quaecumque volunt [504] faciunt, quia volunt eis carere nec possunt. Tunc enim eas non habebunt, quando nec corruptibilem carnem.

Hic liber sic incipit : *Causa propter quam scribit Apostolus ad Galatas haec est.*

CAPUT XXV. EPISTOLÆ AD ROMANOS INCHOATA EXPOSITIO, LIBER UNUS.

Epistolae quoque ad Romanos sicut ad Galatas expositionem suscepam. Sed huius operis si perficeretur plures libri erant futuri. Quorum unum in sola disputatione ipsius salutationis absolvi, ab initio scilicet usque ad illud ubi ait : *Gratia vobis et pax a Deo Patre nostro et Domino Iesu Christo*³⁴⁹. Factum est quippe ut immoraremur, cum vellemus solvere incidentem

³⁴⁷ *Exp. ep. ad Gal.* 47.

³⁴⁸ Gal 5, 17.

³⁴⁹ Rom 1, 7.

sermoni nostro difficillimam quaestionem de peccato in Spiritum Sanctum, *quod non remittatur neque in hoc saeculo neque in futuro*³⁵⁰. Sed deinde cessavi alia volumina adiungere exponendo Epistolam totam, ipsius operis magnitudine ac labore deterritus, et in alia faciliora deflexus sum. Ita factum est ut librum quem feceram primum relinquerem solum, cuius esse titulum volui : *Epistolae ad Romanos inchoata expositio*. Ubi quod dixi : *gratiam esse in dimissione peccatorum, pacem vero in reconciliatione Dei*³⁵¹, ubicumque hoc dixi, non sic accipiendum est, ac si pax ipsa et reconciliatio non pertineat ad gratiam generalem, sed quod specialiter gratiae nomine remissionem significaverit peccatorum, sicut legem et specialiter dicimus, secundum quod dictum est : *Lex et Prophetiae*³⁵², et [505] generaliter, ut in ea sint et Prophetiae³⁵³.

Hic liber sic incipit : *In Epistola quam Paulus apostolus scripsit ad Romanos*.

CAPUT XXVI. DE DIVERSIS QUÆSTIONIBUS OCTOGINTA TRIBUS, LIBER UNUS.

Est etiam inter illa quae scripsimus quoddam prolixum opus, qui tamen unus deputatur liber, cuius titulus est : *De diversis quaestionibus octoginta*

³⁵⁰ *Serm.* 71 ; *Ep. ad Rom. inchoata expositio*. 14 ss. ; cf. Matth. 12, 32.

³⁵¹ *Ep. ad Rom. inchoata expositio*. 23.

³⁵² Matth. 22, 40 ; Rom 3, 21.

³⁵³ Cf. Rom 6, 14 ; 1 Cor 9, 21.

tribus. Cum autem dispersae fuissent per chartulas multas, quoniam ab ipso primo tempore conversionis meae, posteaquam in Africam venimus, sicut interrogabar a fratribus, quando me vacantem videbant, nulla a me servata ordinatione dictatae sunt ; iussi eas iam episcopus colligi et unum ex eis librum fieri, adhibitis numeris, ut quod quisque legere voluerit, facile inveniat. Harum quaestionum est :

prima : *Utrum anima a se ipsa sit.*

Secunda : *De libero arbitrio.*

Tertia : *Utrum Deo auctore sit homo deterior.*

Quarta : *Quae sit causa ut sit homo deterior.*

Quinta : *Utrum animal irrationale beatum esse possit.*

Sexta : *De malo.*

Septima : *Quae proprie in animante anima dicatur.*

Octava : *Utrum per se anima moveatur.*

Nona : *Utrum corporis sensibus percipi veritas possit.* In qua illud quod dixi : *Omne quod corporeus sensus attingit, quod et sensibile dicitur, sine ulla intermissione temporis commutatur*³⁵⁴, sine dubio verum [506] quidem non est in corporibus resurrectionis incorruptilibus ; sed nunc ea nullus nostri corporis sensus attingit, nisi forte divinitus tale aliquid reveletur.

Decima : *Utrum corpus a Deo sit.*

Undecima : *Quare Christus de femina natus sit.*

³⁵⁴ *De div. qq.* 83, 9.

Duodecima, loco ubi titulus est : *Sententia cuiusdam sapientis*, non est mea. Sed quia per me innotuit quibusdam fratribus, qui tunc a me ista diligentissime colligebant, et placuit eis, inter nostra eam scribere voluerunt. Est autem cuiusdam Fonte Carthaginensis *De mente mundanda ad videndum Deum*, quod paganus quidem scripsit, sed christianus baptizatus est mortuus.

Decima tertia est : *Quo documento constet homines bestiis excellere.*

Decima quarta : *Non fuisse corpus Domini nostri Iesu Christi phantasma.*

Decima quinta : *De intellectu.*

Decima sexta : *De Filio Dei.*

Decima septima : *De scientia Dei.*

Decima octava : *De Trinitate.*

Decima nona : *De Deo et creatura.*

Vicesima : *De loco Dei.*

Vicesima prima : *Utrum Deus mali auctor non sit.* Ubi videndum est, ne male intellegatur quod dixi : *Mali auctor non est qui omnium quae sunt auctor est, quia in quantum sunt, in tantum bona sunt*³⁵⁵, et ne hinc putetur non ab illo esse poenam malorum, quae utique malum est his qui puniuntur. Sed hoc ita dixi, quemadmodum dictum est : *Deus mortem non fecit*³⁵⁶, cum alibi scriptum sit : *Mors et vita a Domino Deo est*³⁵⁷. Malorum ergo poena, quae a

³⁵⁵ *De divv. qq. 83, 21.*

³⁵⁶ Sap 1, 13.

³⁵⁷ Eccli 11, 14.

Deo est, malum est quidem malis, sed in bonis Dei operibus est, quoniam iustum [507] est ut mali puniantur, et utique bonum est omne quod iustum est.

Vicesima secunda est *Deum non pati necessitatem.*

Vicesima tertia est : *De Patre et Filio.* Ubi dixi : *Quod eam ipse genuerit, qua sapiens dicitur, sapientiam*³⁵⁸; sed melius istam quaestionem in libro postea *De Trinitate* tractavimus³⁵⁹.

Vicesima quarta est : *Utrum et peccatum et recte factum in libero sit voluntatis arbitrio.* Quod ita esse omnino verissimum est; sed ut ad recte faciendum liberum sit, Dei gratia liberatur.

Vicesima quinta est : *De cruce Christi.*

Vicesima sexta : *De differentia peccatorum.*

Vicesima septima : *De providentia.*

Vicesima octava : *Quare Deus mundum facere voluerit.*

Vicesima nona : *Utrum aliquid sit sursum aut deorsum universo.*

Tricesima : *Utrum omnia in utilitatem hominis creata sint.*

Tricesima prima nec ipsa mea est sed Ciceronis³⁶⁰. Verum quia et haec per me innotuit fratribus, inter ista quae colligebant scripserunt

³⁵⁸ *De divv. qq.* 83, 23.

³⁵⁹ *De Trin.* 6, 2, 3.

³⁶⁰ Cicer., *De invent.* 2, 53, 159-160.

eam, volentes nosse quemadmodum virtutes animi ab illo divisae ac definitae sint.

Tricesima secunda est : *Utrum rem ullam alius alio magis intellegat, atque ita eiusdem rei per infinitum eat intellegentia.*

Tricesima tertia : *De metu.*

Tricesima quarta : *Utrum non aliud amandum sit quam metu carere.*

Tricesima quinta : *Quid amandum sit.* In qua illud quod dixi : *Id esse amandum quod nihil est aliud habere quam nosse*³⁶¹, non satis approbo. Neque enim Deum non habebant quibus dictum est : *Nescitis quia templum Dei estis, et Spiritus Dei habitat in vobis ?*³⁶² nec tamen eum noverant, vel non sicut noscendus est [508] noverant. Item quod dixi : *Nemo igitur beatam vitam novit et miser est*³⁶³ ; novit dixi, quomodo noscenda est. Nam quis eam penitus nescit, eorum dumtaxat qui iam ratione utuntur, quandoquidem beatos se esse velle noverunt³⁶⁴ ?

Tricesima sexta est : *De nutrienda caritate.* Ubi dixi : *Deus igitur et animus cum amantur caritas proprie dicitur purgatissima et consummata, si nihil aliud amatur*³⁶⁵. Quod si verum est, quomodo ergo Apostolus ait : *Nemo umquam carnem suam odio*

³⁶¹ *De divv. qq.* 83, 35, 1.

³⁶² 1 Cor 3, 16.

³⁶³ *De divv. qq.* 83, 35, 1.

³⁶⁴ Cf. Cicer., *Tuscul.* 5, 10, 28 ; *Retract.* 1, 14, 4.

³⁶⁵ *De divv. qq.* 83, 36, 1.

*habuit*³⁶⁶, et ex hoc admonet ut diligantur uxores ? Sed ideo dictum est : *proprie dilectio dicitur*, quoniam caro diligitur quidem, nec tamen proprie sed propter animam cui subiacet ad usum. Nam et si propter se ipsam videtur diligi, cum eam nolumus esse deformem, ad aliud referendum est decus eius, ad illud scilicet a quo decora sunt omnia.

Tricesima septima est : *De semper nato*.

Tricesima octava : *De conformatione animae*.

Tricesima nona : *De alimentis*.

Quadragesima : *Cum animarum natura una sit, unde hominum diversae voluntates ?*

Quadragesima prima : *Cum omnia Deus fecerit, quare non aequaliter fecit ?*

Quadragesima secunda : *Quemadmodum Dei Sapientia Dominus Iesus Christus et in utero matris fuerit et in caelis*.

Quadragesima tertia : *Quare Filius Dei in homine apparuit, et Spiritus Sanctus in columba ?*³⁶⁷

Quadragesima quarta : *Quare tanto post venit Dominus Iesus Christus ?* Ubi cum generis humani tamquam unius hominis aetates commemorarem, dixi : *Nec oportuit venire divinitus Magistrum, cuius imitatione in mores optimos formaretur, nisi tempore iuventutis*³⁶⁸. Et adiunxi ad hoc valere quod Apostolus dicit, *sub lege tamquam sub* [509]

³⁶⁶ Eph 5, 29.

³⁶⁷ Matth. 3, 16.

³⁶⁸ *De div. qq.* 83, 44.

*paedagogo parvulos custoditos*³⁶⁹. Sed potest movere, cur alibi dixerimus, Christum in generis humani sexta aetate tamquam in senectute venisse³⁷⁰. Hoc ergo quod de iuventute dictum est ad vigorem feruoremque fidei refertur, *quae per dilectionem operatur*³⁷¹; illud autem de senectute ad temporum numerum. Potest enim intellegi utrumque in universitate hominum, quod non potest in aetatibus singulorum; sicut in corpore non potest simul et iuventus esse et senectus, in animo autem potest, illa propter alacritatem, ista propter gravitatem.

Quadragesima quinta est : *Adversus mathematicos*.

Quadragesima sexta : *De ideis*.

Quadragesima septima : *Utrum aliquando cogitationes nostras videre possimus*. Ubi quod dixi : *Angelica corpora, qualia nos speramus habituros, lucidissima atque aetherea esse credendum est*³⁷², si hoc sine membris quae nunc habemus et sine substantia quamvis incorruptibilis tamen carnis accipiat, erratur. Multo autem melius in opere *De civitate Dei* quaestio ista tractata est³⁷³, de videndis cogitationibus nostris.

Quadragesima octava est : *De credibilibus*.

³⁶⁹ Gal 3,24-25.

³⁷⁰ *De Gen c. Man.* 1, 23, 40.

³⁷¹ Gal 5, 6.

³⁷² *De divv. qq.* 83, 47.

³⁷³ *De civ. Dei* 22, 29.

Quadragesima nona : *Quare filii Israel sacrificabant visibiliter pecorum victimas.*

Quinquagesima : *De aequalitate Filii.*

Quinquagesima prima : *De homine facto ad imaginem et similitudinem Dei*³⁷⁴. Ubi quid est quod dixi : *Homo sine vita non recte appellatur*, cum dicatur homo etiam cadaver hominis ? Ergo saltem dicere debui : " non proprie dicitur ", ubi dixi : *Non recte dicitur*. Item dixi : *Neque inscite distinguitur, quod aliud sit imago et similitudo Dei, aliud ad imaginem et similitudinem Dei, sicut [510] hominem factum accipimus*³⁷⁵. Quod non ita est intellegendum, quasi homo non dicatur imago Dei, cum dicat Apostolus : *Vir quidem non debet velare caput, cum sit imago et gloria Dei*³⁷⁶, sed dicitur etiam ad imaginem Dei, quod Unigenitus non dicitur, qui tantummodo imago est, non ad imaginem.

Quinquagesima secunda : *De eo quod dictum est : " Paenitet me fecisse hominem "*³⁷⁷.

Quinquagesima tertia : *De auro et argento quod ab Aegyptiis Israelitae acceperunt*³⁷⁸.

Quinquagesima quarta : *De eo quod scriptum est : " Mihi autem adhaerere Deo, bonum est "*³⁷⁹. Ubi quod dixi : *Quod autem est omni anima melius, id*

³⁷⁴ Gen 1, 26 ; 5, 3.

³⁷⁵ *De divv. qq.* 83, 51, 4 ; Cf. *De Trin.* 7, 6, 12.

³⁷⁶ 1 Cor 11, 7.

³⁷⁷ Gen 6, 6-7.

³⁷⁸ Ex 3, 22 ; 12, 35.

³⁷⁹ Ps 72, 28.

*Deum dicimus*³⁸⁰, magis dici debuit : *Omni creato spiritu melius.*

Quinquagesima quinta : *De eo quod scriptum est : " Sexaginta sunt reginae, octoginta concubinae, et adulescentulae quarum non est numerus "*³⁸¹.

Quinquagesima sexta : *De annis quadraginta sex aedificati templi*³⁸².

Quinquagesima septima : *De centum quinquaginta tribus piscibus*³⁸³.

Quinquagesima octava : *De Ioanne Baptista.*

Quinquagesima nona : *De decem virginibus*³⁸⁴.

Sexagesima : *De die autem et hora nemo scit, neque angeli caelorum neque Filius hominis nisi Pater solus*³⁸⁵.

Sexagesima prima : *De eo quod scriptum est in Evangelio, turbas Dominum in monte pavisse de quinque panibus*³⁸⁶. Ubi quod dixi : *Duos pisces duas illas significare personas, regiam scilicet et sacerdotalem, ad quas etiam sacrosancta illa unctio pertinebat*³⁸⁷, dicendum potius fuit : maxime *pertinebat*, quoniam unctos aliquando legimus et Prophetas³⁸⁸. Item quod dixi : *Lucas, qui tamquam [511] ascendentem*

³⁸⁰ *De divv. qq.* 83, 54.

³⁸¹ *Cant. Cantic.* 6, 7.

³⁸² Io 2, 20.

³⁸³ Io 21, 11.

³⁸⁴ Matth. 25, 1.

³⁸⁵ Matth. 24, 36.

³⁸⁶ Matth. 14, 15-21.

³⁸⁷ *De divv. qq.* 83, 61, 2.

³⁸⁸ 3 Reg 19, 16 ; Isa 61, 1.

*post abolitionem peccatorum sacerdotem Christum insinuavit, per Nathan ascendit ad David, quia Nathan propheta missus erat, cuius correptione David ipsius peccati abolitionem paenitendo impetravit*³⁸⁹, non sic accipiendum est, tamquam ipse fuerit Nathan propheta³⁹⁰, qui filius David, quia nec hic dictum est: quia ipse Propheta missus erat, sed dictum est: *quia Nathan propheta missus erat*³⁹¹, ut mysterium non in eodem homine sed in eodem nomine intellegatur.

Sexagesima secunda est: *De eo quod scriptum est in Evangelio: "Quod baptizabat Iesus plures quam Ioannes, quamvis ipse non baptizaret sed discipuli eius"*³⁹². Ubi quod dixi: *Latro ille cui dictum est: "Amen dico tibi, hodie mecum eris in paradiso"*³⁹³, qui nec ipsum baptismum acceperat³⁹⁴, hoc quidem et alios ante nos rectores sanctae Ecclesiae posuisse in suis litteris invenimus³⁹⁵; sed quibus documentis satis possit ostendi, quod non fuerit ille latro baptizatus, ignoro. De qua re in posterioribus quibusdam opusculis nostris diligentius disputatum est,

³⁸⁹ *De divv. qq.* 83, 61, 2.

³⁹⁰ Lucas 3, 31; cf. *Retract.* 2, 16.

³⁹¹ 4 Regg 12, 1-2.

³⁹² Io 4, 1-2.

³⁹³ Lucas 23, 43.

³⁹⁴ *De divv. qq.* 83, 62.

³⁹⁵ Cypr., *Ep.* 73, 22; Ambros., *De paenit.* 11; Hilar., *Tr. in Ps.* 66, 26; cf. Hilar., *De Trin.* 10, 34.

maxime in eo quod ad Vincentium Victorem *De animae origine* scripsimus³⁹⁶.

Sexagesima tertia : *De Verbo*.

Sexagesima quarta : *De muliere Samaritana*³⁹⁷.

Sexagesima quinta : *De resurrectione Lazari*³⁹⁸.

Sexagesima sexta : *De eo quod scriptum est* : "*An ignoratis fratres (scientibus enim legem loquor), quia Lex dominatur homini in quantum tempus vivit ?*"³⁹⁹ usque ad eum locum in quo scriptum est : *Vivificabit et mortalia corpora vestra per inhabitantem Spiritum eius in [512] vobis*⁴⁰⁰. Ubi illud quod ait Apostolus : *Scimus autem quia lex spiritalis est, ego autem carnalis sum*⁴⁰¹, exponere volens dixi : *Id est carni consentio nondum spiritali gratia liberatus*⁴⁰². Quod non sic accipiendum est, quasi spiritalis homo iam sub gratia constitutus, etiam de seipso non possit hoc dicere, et cetera usque ad eum locum ubi dictum est : *Miser ego homo, quis me liberabit de corpore mortis huius ?*⁴⁰³ quod postea didici, sicut sum iam ante confessus⁴⁰⁴. Rursus exponens quod ait Apostolus : *Corpus quidem mortuum est propter*

³⁹⁶ *De orig. an.* 3, 9, 12.

³⁹⁷ Io 4, 9.

³⁹⁸ Io 11, 44.

³⁹⁹ Rom 7, 1.

⁴⁰⁰ Rom 8, 11.

⁴⁰¹ Rom 7, 14.

⁴⁰² *De divv. qq.* 83, 66, 5.

⁴⁰³ Rom 7, 24.

⁴⁰⁴ *Retract.* 1, 23, 1.

*peccatum*⁴⁰⁵. *Mortuum, inquam, corpus dicit, quamdiu tale est ut indigentia rerum temporalium molestet animam*⁴⁰⁶. Sed multo melius mihi postea visum est⁴⁰⁷, ideo mortuum corpus dictum, quod habeat iam moriendi necessitatem, quam non habuit ante peccatum.

Sexagesima septima : *De eo quod scriptum est : " Existimo enim quod indignae sint passionis huius temporis ad futuram gloriam, quae revelabitur in nobis "*⁴⁰⁸ *usque ad id quod dictum est : " Spe enim salvi facti sumus "*⁴⁰⁹. Ubi cum exponerem quod scriptum est : *Et ipsa creatura liberabitur a servitute interitus*⁴¹⁰, dixi : *" Et ipsa creatura "*, id est ipse homo, cum iam *signaculo imaginis propter peccatum amisso remansit tantummodo creatura*⁴¹¹. Quod non ita est accipiendum, quasi totum amiserit homo quod habebat imaginis Dei. Nam si omnino non amisisset, non esset propter quod diceretur : *Reformamini in novitate mentis vestrae*⁴¹², et : *In eandem imaginem transformamur*⁴¹³ ; sed rursum, si totum amisisset, nihil maneret unde diceretur : *Quamquam in imagine ambulet homo, tamen vane*

⁴⁰⁵ Rom 8, 10.

⁴⁰⁶ *De divv. qq.* 83, 66, 6.

⁴⁰⁷ *De peccat. mer.* 1, 7, 7 ; cf. *De Trin.* 4, 3 ; *Enarr. in Ps* 45, 17.

⁴⁰⁸ Rom 8, 18.

⁴⁰⁹ Rom 8, 24.

⁴¹⁰ Rom 8, 21.

⁴¹¹ *De divv. qq.* 83, 67, 4.

⁴¹² Rom 12, 2.

⁴¹³ 2 Cor 3, 18.

conturbatur⁴¹⁴. [513] Item quod dixi : *Spiritualiter summos angelos vivere, infimos vero animaliter*⁴¹⁵, audacius dictum est de infimis quam ut possit vel Scripturis sanctis vel ipsis rebus ostendi, quia etsi forsitan potest, difficillime potest.

Sexagesima octava : *De eo quod scriptum est : " O homo, tu quis es qui respondeas Deo ? "*⁴¹⁶ Ubi dixi : *Quia etiamsi levioribus quisque peccatis, aut certe quamvis gravioribus et multis, tamen magno gemitu et dolore paenitendi misericordia Dei dignus fuerit, non ipsius est, qui si relinqueretur interiret, sed miserentis Dei, qui eius precibus doloribusque subvenit. Parum est enim velle, nisi Deus misereatur, sed Deus non misereatur, qui ad pacem vocat, nisi voluntas praecesserit ad pacem*⁴¹⁷. Hoc dictum est post paenitentiam. Nam est misericordia Dei etiam ipsam praeveniens voluntatem, quae si non esset, *non praepareretur voluntas a Domino*⁴¹⁸. Ad eam misericordiam pertinet et ipsa vocatio, quae etiam fidem praevenit⁴¹⁹. De qua paulo post cum agerem dixi⁴²⁰ : *Haec autem vocatio, quae sive in singulis hominibus sive in populis atque in ipso genere humano per temporum opportunitates operatur, altae et profundae ordinationis est. Quo pertinet etiam illud : " In utero*

⁴¹⁴ Ps 38, 7.

⁴¹⁵ *De divv. qq.* 83, 67, 5.

⁴¹⁶ Rom 9, 20.

⁴¹⁷ *De divv. qq.* 83, 68, 5.

⁴¹⁸ Prov 8, 35.

⁴¹⁹ Cf. *Retract.* 1, 23, 2-3.

⁴²⁰ *De divv. qq.* 83, 68, 6.

sanctificavi te ^{"421}, et : " *Cum esses in renibus patris tui vidi te* ^{"422} ; et : " *Iacob dilexi, Esau autem odio habui* ^{"423}, et cetera ; quamvis testimonium illud : *Cum esses in renibus patris tui vidi te*, unde mihi tamquam scriptum sit occurrerit, nescio.

Sexagesima nona : *De eo quod scriptum est : "Tunc et ipse Filius subiectus erit ei qui illi subiecit omnia"* ^{"424}.

Septuagesima : *De eo quod Apostolus dicit : "Absorpta est mors in victoriam. Ubi est, mors, contentio tua ? Ubi [514] est, mors, aculeus tuus ? Aculeus autem mortis peccatum, virtus autem peccati lex* ^{"425}.
Septuagesima prima : *De eo quod scriptum est : "Invicem onera vestra portate, et sic adimplebitis legem Christi"* ^{"426}.

Septuagesima secunda : *De temporibus aeternis.*

Septuagesima tertia : *De eo quod scriptum est : "Et habitu inventus ut homo* ^{"427}.

Septuagesima quarta : *De eo quod scriptum est in Epistola Pauli ad Colossenses : " In quo habemus redemptionem remissionem peccatorum, qui est imago Dei invisibilis* ^{"428}.

Septuagesima quinta : *De haereditate Dei.*

⁴²¹ Jer 1, 5.

⁴²² Hebr 7, 10 ?

⁴²³ Mal 1, 3 ; Rom 9, 13.

⁴²⁴ 1 Cor 15, 28.

⁴²⁵ 1 Cor 15, 54-55.

⁴²⁶ Gal 6, 2.

⁴²⁷ Phil 2, 7.

⁴²⁸ Col 1, 14-15.

Septuagesima sexta : *De eo quod Iacobus apostolus dicit : " Vis autem scire, o homo inanis, quia fides sine operibus otiosa est ? "*⁴²⁹

Septuagesima septima : *De timore, utrum peccatum sit.*

Septuagesima octava : *De pulchritudine simulacrorum.*

Septuagesima nona : *Quare Magi Pharaonis fecerunt quaedam miracula sicut Moyses famulus Dei ?*⁴³⁰

Octogesima : *Adversus Apollinaristas.*

Octogesima prima : *De Quadragesima et Quinquagesima.*

Octogesima secunda : *De eo quod scriptum est : " Quem enim diligit Dominus, corripit ; flagellat autem omnem filium quem recipit "*⁴³¹.

Octogesima tertia : *De coniugio*⁴³², in eo quod Dominus ait : *Si quis dimiserit uxorem suam, excepta causa fornicationis*⁴³³.

Hoc opus sic incipit : *Utrum anima a se ipsa sit.*
515]

CAPUT XXVII. DE MENDACIO, LIBER UNUS.

Item *De mendacio* scripsi librum, qui etsi cum aliquo labore intellegitur, habet tamen non inutilem ingenii et mentis exercitationem,

⁴²⁹ Iac 2, 20.

⁴³⁰ Cf. Ex 7, 11. 22 ; 8, 1. 7.

⁴³¹ Hebr 12, 6.

⁴³² Cf. *De bono con.* 3, 3 ; *De coniug. adult.* 1, 8, 8ss.

⁴³³ Matth. 19, 9.

magisque moribus ad veriloquium diligendum proficit. Hunc quoque auferre statueram de opusculis meis, quia et obscurus et anfractuosus et omnino molestus mihi videbatur, propter quod eum nec edideram. Deinde cum postea scripsissem alterum, cuius titulus est *Contra mendacium*⁴³⁴, multo magis istum non esse decreveram et iusseram, sed non est factum. Itaque in ista retractatione opusculorum meorum, cum eum incolumem repperissem, etiam ipsum retractatum manere praecepi, maxime quia in eo nonnulla sunt necessaria, quae in illo altero non sunt. Propterea vero illius inscriptio est: *Contra mendacium*; istius autem: *De mendacio*, quoniam per illum totum oppugnatio est aperta mendacii; istius autem magna pars in inquisitionis disputatione versatur. Ad eundem tamen finem uterque dirigitur.

Hic liber sic incipit: *Magna quaestio est de mendacio*. [516]

LIBER SECUNDUS

In quo retractantur libri quos scripsit episcopus.

CAPUT I. AD SIMPLICIANUM, LIBRI DUO.

I. Librorum quos episcopus elaboravi primi duo sunt ad Simplicianum, Ecclesiae Mediolanensis antistitem, qui beatissimo successit Ambrosio, de diversis quaestionibus, quarum duas ex *Epistola* Pauli apostoli *ad Romanos* in primum librum contuli. Harum prior est : *de eo quod scriptum est : Quid ergo dicemus ? Lex peccatum est ? Absit !*⁴³⁵ usque ad illud ubi ait : *Quis me liberabit de corpore mortis huius ? Gratia Dei per Iesum Christum Dominum nostrum*⁴³⁶. In qua⁴³⁷ illa Apostoli verba : *Lex spiritalis est, ego autem carnalis sum*⁴³⁸, et cetera, quibus caro contra spiritum configere ostenditur, eo modo exposui, tamquam homo describatur adhuc *sub lege* nondum *sub gratia* constitutus⁴³⁹. Longe enim postea etiam spiritalis hominis (et hoc probabilius) esse posse illa verba cognovi⁴⁴⁰. Posterior in hoc libro quaestio est ab eo loco ubi ait : *Non solum autem, sed et Rebecca ex uno concubitu habens Isaac patris nostri*⁴⁴¹, usque ad

⁴³⁵ Rom 7, 7.

⁴³⁶ Rom 7, 24-25.

⁴³⁷ *De divv. qq. ad Simplic.* 1, 1, 9.

⁴³⁸ Rom 7, 14.

⁴³⁹ Rom 6, 14.

⁴⁴⁰ Cf. *Retract.* 1, 23, 1.

⁴⁴¹ Rom 9, 19.

illud ubi ait : *Nisi Dominus Sabaoth* [517] *reliquisset nobis semen, sicut Sodoma facti essemus, et sicut Gomorra similes fuissetus*⁴⁴². In cuius quaestionis solutione⁴⁴³ laboratum est quidem pro libero arbitrio voluntatis humanae, sed vicit Dei gratia ; nec nisi ad illud potuit perveniri, ut liquidissima veritate dixisse intellegatur Apostolus : *Quis enim te discernit ? Quid autem habes quod non accepisti ? Si autem accepisti, quid gloriaris quasi non acceperis ?*⁴⁴⁴ Quod volens etiam martyr Cyprianus ostendere, hoc totum ipso titulo definivit dicens : *In nullo gloriandum, quando nostrum nihil est*⁴⁴⁵.

II. In secundo libro tractantur ceterae quaestiones, et pro nostra quantulumcumque facultate solvuntur, quae sunt omnes de Scriptura quae *Regnorum* appellatur.

Harum prima est : *De eo quod scriptum est : " Et insilivit spiritus Domini in Saul "*⁴⁴⁶, cum alibi dicatur : *" Et spiritus Domini malus in Saul "*⁴⁴⁷. Quam cum exponerem dixi : *Quamvis sit in cuiusque potestate quid velit, non est tamen in cuiusquam potestate quid possit*⁴⁴⁸. Quod ideo dictum est, quia non dicimus esse in potestate nostra, nisi quod cum volumus fit ; ubi prius et maxime est ipsum

⁴⁴² Rom 9, 29.

⁴⁴³ Cf. *De civ. Dei* 16, 35.

⁴⁴⁴ 1 Cor 4, 7.

⁴⁴⁵ Cyprian., *Testim.* 3, 4.

⁴⁴⁶ 3 Regg 10, 10.

⁴⁴⁷ 3 Regg 16, 14.

⁴⁴⁸ *De div. qq. ad Simplic.* 2, 1, 4.

velle. Sine ullo quippe intervallo temporis praesto est voluntas ipsa cum volumus. Sed hanc quoque ad bene vivendum desuper accipimus potestatem, cum *praeparatur voluntas a Domino*⁴⁴⁹.

Secunda quaestio est : *Quomodo dictum sit : " Penitet me quod constituerim regem Saul "*⁴⁵⁰.

Tertia : *Utrum spiritus immundus qui erat in phitonissa potuerit agere, ut Samuel a Saule videretur et loqueretur cum eo*⁴⁵¹.

Quarta : *De eo quod scriptum est : " Intravit rex David et sedit [518] ante Dominum "*⁴⁵².

Quinta : *De eo quod dixit Helias : " O Domine, testis huius viduae cum qua ego inhabito apud ipsam, tu male fecisti occidere filium eius "*⁴⁵³.

Hoc opus sic incipit : *Gratissimam plane atque suavissimam.*

CAPUT II. CONTRA EPISTOLAM MANICHAEI QUAM VOCANT FUNDAMENTI, LIBER UNUS.

Liber *Contra epistolam Manichaei quam vocant fundamenti* principia eius sola redarguit ; sed in ceteris illius partibus annotationes ubi videbatur affixae sunt, quibus tota subvertitur et quibus commonerer, si quando contra totam scribere vacavisset.

⁴⁴⁹ Prov 8, 35 (*sec. LXX*).

⁴⁵⁰ 3 Regg 15, 11.

⁴⁵¹ 3 Regg 28, 7-20.

⁴⁵² 4 Regg 7, 18.

⁴⁵³ 3 Reg 17, 20.

Hic liber sic incipit : *Unum verum Deum omnipotentem.*

CAPUT III. DE AGONE CHRISTIANO, LIBER UNUS.

Liber *De agone christiano* fratribus in eloquio Latino ineruditis humili sermone conscriptus est, fidei regulam continens et praecepta vivendi. In quo illud quod positum est : *Nec eos audiamus qui carnis resurrectionem futuram negant et commemorant quod ait apostolus Paulus : " Caro et sanguis regnum Dei non possidebunt "*⁴⁵⁴, *non intellegentes quod ipse dicit Apostolus : " Oportet corruptibile hoc induere incorruptionem, et mortale hoc induere immortalitatem "*⁴⁵⁵, [519] *cum enim hoc factum fuerit, iam non erit caro et sanguis sed caeleste corpus*⁴⁵⁶, non sic accipiendum est, quasi carnis non sit futura substantia, sed *carnis et sanguinis* nomine ipsam corruptionem carnis et sanguinis intellegendus est Apostolus nuncupasse⁴⁵⁷, quae utique in regno illo non erit, ubi caro incorruptibilis erit ; quamvis et aliter possit intellegi, ut carnem et sanguinem opera *carnis et sanguinis* dixisse accipiamus Apostolum, et eos *Regnum Dei* non possessuros qui perseveranter ista dilexerint.

Hic liber sic incipit : *Corona victoriae.*

⁴⁵⁴ 1 Cor 15, 50.

⁴⁵⁵ 1 Cor 15, 53.

⁴⁵⁶ *De agone chr.* 32, 34.

⁴⁵⁷ Cf. *Retract.* 1, 16, 2 ; *De civ. Dei* 22, 5, 21.

CAPUT IV. DE DOCTRINA CHRISTIANA, LIBRI QUATTUOR.

I. Libros *De doctrina christiana*, cum imperfectos comperissem, perficere malui quam eis sic relictis ad alia retractanda transire. Complevi ergo tertium, qui scriptus fuerat usque ad eum locum⁴⁵⁸, ubi commemoratum est ex Evangelio testimonium *de muliere quae abscondit fermentum in tribus mensuris farinae, donec totum fermentaretur*⁴⁵⁹. Addidi etiam novissimum librum, et quattuor libris opus illud implevi, quorum primi tres adiuvant ut Scripturae intellegantur, quartus autem quomodo quae intellegimus proferenda sint.

II. In secundo sane libro⁴⁶⁰ de auctore libri quem plures vocant *Sapientiam Salomonis*, quod etiam ipsum sicut *Ecclesiasticum* Iesus Sirach scripserit, non ita [520] constare sicut a me dictum est, postea didici, et omnino probabilius comperi non esse hunc eius libri auctorem. Ubi autem dixi : *His quadraginta quattuor libris Testamenti Veteris terminatur auctoritas*⁴⁶¹, ex consuetudine qua iam loquitur Ecclesia, Vetus Testamentum appellavi. Apostolus autem non videtur appellare Testamentum Vetus nisi quod datum est in

⁴⁵⁸ *De doctr. chr.* 3, 25, 35.

⁴⁵⁹ Lucas 13, 21.

⁴⁶⁰ *De doctr. chr.* 2, 8, 13.

⁴⁶¹ *Ibidem.*

monte Sina⁴⁶². Et in eo quod dixi : *De temporum historia sanctum Ambrosium solvisse quaestionem*, tamquam coetanei fuerint Plato et Hieremias, me fefellit memoria. Nam quid ille de hac re episcopus dixerit, in libro eius legitur quem de sacramentis sive de philosophia scripsit⁴⁶³.

Hoc opus sic incipit : *Sunt praecepta quaedam*.

CAPUT V. CONTRA PARTEM DONATI, LIBRI DUO.

Sunt duo libri mei quorum titulus est : *Contra partem Donati*⁴⁶⁴. Quorum in libro primo dixi *non mihi placere ullius saecularis potestatis impetu schismaticos ad communionem violenter arctari*⁴⁶⁵. Et vere mihi tunc non placebat, quoniam nondum expertus eram, vel quantum mali eorum auderet impunitas, vel quantum eis in melius mutandis conferre posset diligentia disciplinae.

Hoc opus sic incipit : *Quoniam Donatistae nobis*. [521]

CAPUT VI. CONFSSIONUM, LIBRI TREDECIM.

I. *Confessionum* mearum libri tredecim, et de malis et de bonis meis Deum laudant iustum et bonum, atque in eum excitant humanum intellectum et affectum. Interim quod ad me attinet, hoc in me egerunt cum scriberentur et

⁴⁶² Gal 4, 24.

⁴⁶³ *De doct. chr.* 2, 28, 43 ; cf. *De civ. Dei* 8, 11 ; Ambros., *Exp. in Ps.* 118, 18 ; *De Noe et arca* 8, 24 ; *De sacram. regen. ac philos.* ; cf. *C. Iul.* 2, 5, 14. 7, 20.

⁴⁶⁴ Cf. *Ep.* 93.

⁴⁶⁵ Cf. *Ep.* 93, 5, 17.

agunt cum leguntur. Quid de illis alii sentiant, ipsi viderint ; multis tamen fratribus eos multum placuisse et placere scio. A primo usque ad decimum de me scripti sunt, in tribus ceteris de Scripturis sanctis, ab eo quod scriptum est : *In principio fecit Deus caelum et terram*⁴⁶⁶, usque *ad sabbati requiem*⁴⁶⁷.

II. In quarto libro, cum de amici morte animi mei miseriam confiterer, dicens quod anima nostra una quodammodo facta fuerat ex duabus : *Et ideo, inquam, forte mori metuebam, ne totus ille moreretur, quem multum amaveram*⁴⁶⁸. Quae mihi quasi declamatio levis quam gravis confessio videtur, quamvis utcumque temperata sit haec ineptia in eo quod additum est : *forte*. Et in libro tertio decimo quod *dixi firmamentum factum inter spirituales aquas superiores et corporales inferiores*⁴⁶⁹, non satis considerate dictum est ; res autem in abdito est valde.

Hoc opus sic incipit : *Magnus es, Domine*. [522]

CAPUT VII. CONTRA FAUSTUM MANICHAEUM, LIBRI TRIGINTA TRES.

I. *Contra Faustum Manichaeum* blasphemantem Legem et Prophetas et eorum Deum et incarnationem Christi ; Scripturas autem novi

⁴⁶⁶ Gen 1, 1.

⁴⁶⁷ Gen 2, 2.

⁴⁶⁸ *Confess.* 4, 6, 11.

⁴⁶⁹ *Confess.* 13, 32, 47.

Testamenti, quibus convincitur, falsatas esse dicentem, scripsi grande opus, verbis eius propositis reddens responsiones meas. Triginta et tres disputationes sunt, quos etiam libros cur non dixerim? Nam etsi sunt in eis aliqui perbreves, tamen libri sunt. Unus vero eorum, ubi a nobis adversus eius criminationes Patriarcharum vita defenditur, tantae prolixitatis est, quantae nullus fere librorum meorum⁴⁷⁰.

II. In libro ergo tertio cum solverem quaestionem, quomodo potuerit duos patres habere Ioseph⁴⁷¹, dixi quidem *quod ex alio natus ab alio fuerit adoptatus*⁴⁷²; sed genus quoque adoptionis dicere debui. Sic enim sonat quod dixi, tamquam eum vivus adoptaverit alius pater. Lex autem filios etiam mortuis adoptabat, iubens ut fratris sine filiis mortui duceret frater uxorem et fratri defuncto semen ex eadem suscicaret. Quae profecto de duobus unius hominis patribus expeditior ibi redditur ratio. Uterini autem fratres fuerunt in quibus hoc contigit, ut unius defuncti qui vocabatur Heli duceret alter uxorem, id est Iacob, a quo Matthaeus narrat genitum esse Ioseph⁴⁷³. Sed uterino fratri suo eum genuit, cuius filium Lucas dicit fuisse Ioseph⁴⁷⁴, non utique

⁴⁷⁰ C. Faustum 22.

⁴⁷¹ Matth. 1, 16; Lucas 3, 23.

⁴⁷² C. Faustum 3, 3.

⁴⁷³ Matth. 1, 16.

⁴⁷⁴ Lucas 3, 23.

genitum, sed ex lege adoptivum. Hoc in eorum litteris [523] inventum est, qui recenti memoria post ascensionem Domini de hac re scripserunt. Nam etiam nomen eiusdem mulieris quae peperit Iacob patrem Ioseph de priore marito Mathan, qui fuit pater Iacob avus Ioseph secundum Matthaeum, et de marito posteriore Melchi peperit Heli, cuius erat adoptivus Ioseph, non tacuit Africanus⁴⁷⁵. Quod quidem, cum Fausto responderem, nondum legeram ; sed tamen per adoptionem potuisse contingere, ut unus homo duos haberet patres, dubitare non poteram.

III. In duodecimo et in tertio decimo⁴⁷⁶, de filio Noe secundo, qui est appellatus Cham, ita disputatum est, tamquam non in filio suo Chanaan, sicut Scriptura demonstrat, sed in seipso fuerit a patre maledictus⁴⁷⁷. In quarto decimo de sole et luna talia dicta sunt, tamquam sentiant et ideo tolerant vanos adoratores suos⁴⁷⁸, quamvis verba ibi accipi possint ab animali ad inanimale translata, modo locutionis qui vocatur Grece *metaphora* ; sicut de mari scriptum est : *Quod fremat in utero matris suae volens progredi*⁴⁷⁹, cum utique non habeat voluntatem. In undetricesimo : *Absit, inquam, ut sit in membris sanctorum etiam*

⁴⁷⁵ African., *Ep. ad Arist.* 3, 9-15.

⁴⁷⁶ *C. Faustum* 12, 23 ; 13, 10.

⁴⁷⁷ Cf. Gen 9, 25.

⁴⁷⁸ *C. Faustum* 14, 12.

⁴⁷⁹ Iob 38, 8.

*genitalibus aliqua turpitudine. Dicuntur quidem inhonesta, quia non habent eam speciem decoris quam membra quae in promptu locata sunt*⁴⁸⁰. Sed probabilior in aliis postea scriptis nostris⁴⁸¹ reddita ratio est, cur ea dixerit etiam Apostolus *inhonesta*, propter *legem* scilicet *in membris repugnantem legi mentis*⁴⁸², quae de peccato accidit, non de prima nostrae institutione naturae.

Hoc opus sic incipit : *Faustus quidam fuit.* [524]

CAPUT VIII. CONTRA FELICEM MANICHAEUM, LIBRI DUO.

Contra Manichaeum quemdam nomine Felicem, praesente populo, in ecclesia biduo disputavi. Hipponem quippe venerat, eumdem seminaturus errorem; unus enim erat ex doctoribus eorum, quamvis ineruditus liberalibus litteris, sed tamen versutior Fortunato⁴⁸³. Gesta sunt ecclesiastica, sed inter meos libros computantur. Duo ergo libri sunt, in quorum secundo disputatum est de libero arbitrio voluntatis, sive ad malum operandum sive ad bonum. Sed de gratia, qua vere liberi fiunt, de quibus scriptum est : *Si vos Filius liberaverit, tunc vere liberi eritis*⁴⁸⁴, diligentius disputare, quoniam

⁴⁸⁰ C. *Faustum* 29, 4.

⁴⁸¹ *De civ. Dei* 22, 19.

⁴⁸² 1 Cor 12, 23; Rom 7, 23.

⁴⁸³ Cf. *Confess.* 5, 6, 11.

⁴⁸⁴ Io 8, 36.

talís erat cum quo agebamus, nulla sumus necessitate compulsi.

Hoc opus sic incipit : *Honorio Augusto sextum consule, septimo idus Decembris.*

CAPUT IX. DE NATURA BONI, LIBER UNUS.

Liber *De natura boni* adversus Manichaeos est, ubi ostenditur naturam incommutabilem Deum esse ac summum bonum, atque ab illo esse ceteras naturas sive spirituales sive corporales, atque omnes, in quantum naturae sunt, bonas esse ; et quid vel unde sit malum, et [525] quanta mala Manichaei ponant in natura boni et quanta bona in natura mali, quas naturas finxit error ipsorum.

Hic liber sic incipit : *Summum bonum quo superius non est, Deus est.*

CAPUT X. CONTRA SECUNDINUM MANICHAEUM, LIBER UNUS.

Secundinus quidam, non ex eis quos Manichaei electos, sed ex eis quos "auditores" vocant⁴⁸⁵, quem ne facie quidem noveram, scripsit ad me velut amicus, honorifice obiurgans quod oppugnarem litteris illam haeresim, et admonens ne facerem atque ad eam sectandam potius exhortans, cum eius defensione et fidei reprehensione catholicae. Huic respondi ; sed quia in eiusdem opusculi capite non posui quis

⁴⁸⁵ *De haeres.* 46 ; *Confess.* 3, 10, 18.

cui scriberet, non in epistolis meis sed in libris habetur. Illic ab exordio conscripta est etiam eius epistola. Huius autem mei voluminis titulus est : *Contra Secundinum Manichaeum*, quod mea sententia omnibus quae adversus illam pestem scribere potui, facile praepono.

Hic liber sic incipit : *Tua in me benevolentia quae apparet in litteris tuis.*

CAPUT XI. CONTRA HILARUM, LIBER UNUS.

Inter haec Hilarus quidam vir tribunitius, laicus catholicus, nescio unde adversus Dei ministros - ut fieri [526] assolet - irritatus morem, qui tunc esse apud Carthaginem coeperat⁴⁸⁶, ut hymni ad altare dicerentur de *Psalmorum* libro, sive ante oblationem sive cum distribueretur populo quod fuisset oblatum, maledica reprehensione ubicumque poterat lacerabat, asserens fieri non oportere⁴⁸⁷. Huic respondi, iubentibus fratribus, et vocatur liber ipse : *Contra Hilarum.*

Hic liber sic incipit : *Qui dicunt mentionem Veteris Testamenti.*

CAPUT XII. QUÆSTIONES EVANGELIORUM, LIBRI DUO.

Sunt quaedam expositiones quorumdam locorum ex Evangelio secundum Matthaeum et aliae similiter secundum Lucam ; in unum librum

⁴⁸⁶ Cf. *Confess.* 9, 7, 15.

⁴⁸⁷ *Ibidem.*

illae in alterum istae redactae sunt. Titulus operis huius est : *Quaestiones Evangeliorum*. Sed quare illa sola de supra dictis evangelicis Libris exposita fuerint, quae his libris meis continentur, et quae ista sint, prologus meus adiunctis atque annumeratis eisdem quaestionibus, ita ut quisque legere quod voluerit, numeros secutus inveniatur, satis indicat. In primo ergo libro in eo quod positum est : *Dominum seorsum duobus discipulis suam retulisse passionem*⁴⁸⁸, mendositas codicis nos fefellit ; nam *duodecim* scriptum est, non : *duobus*⁴⁸⁹. In secundo libro⁴⁹⁰, volens exponere, quo modo duos patres potuerit habere Ioseph, cuius coniux dicta est Virgo Maria, *illud quod perhibetur fratrem duxisse defuncti fratris uxorem, ut ei semen secundum legem suscitaret*⁴⁹¹, ideo dixi esse [527] *infirmitas, quoniam qui nasceretur nomen defuncti lex eum iubeat accipere*. Non est verum ; nomen enim defuncti quod dictum est ad hoc lex valere praecepit, ut eius filius diceretur, non ut hoc quod ille vocaretur.

Hoc opus sic incipit : *Hoc opus non ita scriptum est*.

CAPUT XIII. ANNOTATIONES IN JOB, LIBER UNUS.

⁴⁸⁸ *Quaest. Evang.* 1, 27.

⁴⁸⁹ Matth. 20, 17 ; Lucas 18, 31.

⁴⁹⁰ *Quaest. Evang.* 2, 5.

⁴⁹¹ Deut 25, 5-6 ; Matth. 22, 24 ; Marcus 12, 19 ; Lucas 20, 28.

Liber cuius est titulus : *Annotationes in Iob*, utrum meus habendus sit, an potius eorum qui eas, sicut potuerunt vel voluerunt, redegerunt in unum corpus descriptas de frontibus codicis, non facile dixerim. Suaves enim paucissimis intelligentibus sunt, qui tamen necesse est offendantur multa non intelligentes, quia nec ipsa verba quae exponuntur ita sunt descripta in multis locis, ut appareat quid exponatur. Deinde brevitatem sententiarum tanta secuta est obscuritas, ut eam lector ferre vix possit, quem necesse est plurima non intellecta transire. Postremo tam mendosum comperi opus ipsum in codicibus nostris, ut emendare non possem, nec editum a me dici vellem, nisi quia scio fratres id habere, quorum studio non potuit denegari.

Hic liber sic incipit : *Et opera magna erant ei super terram.* [528]

CAPUT XIV. DE CATECHIZANDIS RUDIBUS, LIBER UNUS.

Est etiam liber noster *De catechizandis rudibus* hoc ipso titulo prae-notatus. In quo libro ubi dixi : *Nec angelus qui cum spiritibus aliis satellitibus suis superbiendo deseruit oboedientiam Dei et diabolus factus est aliquid nocuit Deo sed sibi, novit enim Deus ordinare deserentes se animas*⁴⁹², convenientius diceretur : *deserentes se spiritus*, quoniam de angelis agebatur.

⁴⁹² *De catech. rud.* 18, 30.

Hic liber sic incipit: *Petisti a me, frater Deo gratias.*

CAPUT XV. DE TRINITATE, LIBRI QUINDECIM.

I. Libros *De Trinitate*, quae Deus est, quindecim scripsi per aliquot annos. Sed cum eorum duodecimum nondum perfecissem, et eos diutius tenerem quam possent sustinere qui vehementer illos habere cupiebant, subtracti sunt mihi minus emendati quam deberent ac possent, quando eos edere voluissem. Quod posteaquam comperi, quia et alia eorum apud nos exemplaria remanserant, statueram eos iam ipse non edere sed sic habere, ut in alio aliquo opusculo meo quid mihi de his eveniret dicerem. Urgentibus tamen fratribus, quibus resistere non valui, emendavi eos, quantum emendandos putavi et [529] complevi et edidi, adiungens eis a capite epistolam quam scripsi ad venerabilem Aurelium episcopum Carthaginensis Ecclesiae, quo tamquam prologo exposui et quid accidisset, et quid facere mea cogitatione voluissem, et quid fratrum caritate compellente fecissem.

II. In quorum libro undecimo, cum de corpore visibili agerem, dixi: *Quocirca id amare alienari est*⁴⁹³. Quod secundum eum amorem dictum est, quo aliquid sic amatur, ut eo fruendo existimet beatum se esse qui hoc amat. Nam non est alienari in laudem Creatoris amare speciem

⁴⁹³ *De Trin.* 11, 5, 9.

corporalem, ut ipso Creatore fruens quisque vere beatus sit. Itemque in eodem ubi dixi : *Nec avem quadrupedem memini, quia non vidi, sed phantasiam talem facillime intueor, dum alicui formae volatili qualem vidi adiungo alios duos pedes, quales itidem vidi*⁴⁹⁴, haec dicens non potui recolere volatilia quadrupedia quae lex commemorat⁴⁹⁵. Neque enim computat in pedibus duo posteriora crura quibus locustae saliunt, quas dicit mundas et ideo discernit ab immundis talibus volatilibus, quae non saliunt illis cruribus, sicut sunt scarabaei. Omnia quippe huiusmodi volatilia quadrupedia vocantur in lege.

III. In duodecimo⁴⁹⁶, velut *expositio verborum Apostoli, ubi ait : " Omne peccatum quodcumque fecerit homo extra corpus est "*⁴⁹⁷, non mihi satisfacit ; nec sic puto intellegendum quod dictum est : *Qui autem fornicatur in corpus proprium peccat*, tamquam ille hoc faciat, qui propter adipiscenda ea quae per corpus sentiuntur, ut in his finem boni sui ponat, aliquid agit. Hoc enim longe plura peccata complectitur, quam illa fornicatio quae concubitu perpetratur illicito⁴⁹⁸, de qua locutum, cum hoc diceret, Apostolum apparet.

⁴⁹⁴ *De Trin.* 11, 10, 17.

⁴⁹⁵ *Lev* 11, 20.

⁴⁹⁶ *De Trin.* 12, 10, 15.

⁴⁹⁷ *1 Cor* 6, 18.

⁴⁹⁸ Cf. *Retract.* 1, 19, 6 ; *Serm.* 162.

Hoc [530] opus, excepta epistola quae postmodum ad eius caput adiuncta est, sic incipit : *Lecturus haec quae de Trinitate disserimus.*

CAPUT XVI. DE CONSENSU EVANGELISTARUM,
LIBRI QUATTUOR.

Per eosdem annos, quibus paulatim libros *De Trinitate* dictabam, scripsi et alios labore continuo interponens eos illorum temporibus, in quibus sunt libri quattuor *De consensu Evangelistarum* propter eos qui tamquam dissentientibus calumniantur. Quorum primus liber adversus illos conscriptus est, qui tamquam maxime sapientem Christum vel honorant vel honorare se fingunt, et ideo nolunt Evangelio credere, quia non ab ipso illa conscripta sunt sed ab eius discipulis, quos existimant ei divinitatem qua crederetur Deus errore tribuisse. In quo libro quod dixi : *Ex Abraham coepisse gentem Hebraeorum*⁴⁹⁹, est quidem et hoc credibile, ut Hebraei velut Abrahei dicti esse videantur. Sed ex illo verius intelleguntur appellati qui vocabatur Heber, tamquam Heberaei⁵⁰⁰, de qua re in libro sexto decimo *De civitate Dei* satis disserui⁵⁰¹. In secundo *cum agerem de duobus patribus Ioseph, ab altero dixi genitum ab altero adoptatum*. Sed dicendum fuit : "alteri adoptatum"⁵⁰² ; defuncto

⁴⁹⁹ *De cons. Evang.* 1, 14, 21.

⁵⁰⁰ *Quaest. in Hept.* 1, 24.

⁵⁰¹ *De civ. Dei* 16, 3. 11.

⁵⁰² *De cons. Evang.* 2, 3, 5.

enim⁵⁰³, quod magis credendum est, secundum legem⁵⁰⁴ fuerat adoptatus, quoniam qui eum genuit eius matrem, fratris defuncti coniugem, duxerat. Item ubi dixi : *Lucas vero ad ipsum David per Nathan ascendit, per quem Prophetam Deus peccatum [531] illius expiavit*⁵⁰⁵, per cuius nominis Prophetam dicere debui, ne putaretur idem fuisse homo cum alter fuerit, quamvis et ipse hoc vocaretur⁵⁰⁶.

Hoc opus sic incipit : *Inter omnes divinas auctoritates.*

CAPUT XVII. CONTRA EPISTOLAM PARMENIANI, LIBRI TRES.

In tribus libris *Contra epistolam Parmeniani* Donatistarum Carthaginensis episcopi successorisque Donati, quaestio magna versatur et solvitur, utrum in unitate et eorundem communione sacramentorum mali contaminent bonos, et quemadmodum non contaminent disputatur propter Ecclesiam toto orbe diffusam, cui calumniando scisma fecerunt. In quorum libro tertio⁵⁰⁷, *cum dissereretur quomodo sit accipiendum quod ait Apostolus : " Auferte malum ex vobis ipsis "*⁵⁰⁸, illud quod dixi *ut ex se ipso quisque auferat malum*, non sic esse intellegendum, sed sic potius ut homo malus

⁵⁰³ Cf. *Retract.* 2, 7, 2.

⁵⁰⁴ Deut 25, 5-6.

⁵⁰⁵ *De cons. Evang.* 2, 4, 12 ; cf. Lucas 3, 31.

⁵⁰⁶ Cf. *Retract.* 1, 26 ; (*quaest.* 61).

⁵⁰⁷ *C. ep. Parmen.* 3, 1, 2.

⁵⁰⁸ 1 Cor 5, 13.

auferatur ex hominibus bonis, quod fit per ecclesiasticam disciplinam, satis Greca lingua indicat, ubi sine ambiguitate scriptum est, ut intellegatur: *hunc malum*, non: hoc malum, quamvis et secundum istum intellectum responderim Parmeniano.

Hoc opus sic incipit: *Multa quidem alias adversus Donatistas*. [532]

CAPUT XVIII. DE BAPTISMO, LIBRI SEPTEM.

Contra Donatistas, auctoritate beatissimi episcopi et martyris Cypriani se defendere molientes, septem libros *De baptismo* scripsi. In quibus docui nihil sic valere ad refellendos Donatistas et ad eorum prorsus ora claudenda, ne adversus Catholicam suum scisma defendant, quomodo litteras factumque Cypriani. Ubicumque autem in his libris commemoravi⁵⁰⁹ *Ecclesiam non habentem maculam aut rugam*⁵¹⁰, non sic accipiendum est quasi iam sit, sed quae praeparatur ut sit, quando apparebit etiam gloriosa. Nunc enim propter quasdam ignorantias et infirmitates membrorum suorum habet unde quotidie tota dicat: *Dimitte nobis debita nostra*⁵¹¹. In quarto libro, cum dicerem *vicem baptismi posse habere passionem*⁵¹², non satis idoneum posui illius

⁵⁰⁹ *De bapt.* 1, 17, 26 ; 3, 18, 23 ; 4, 3, 5 ; 7, 10, 19.

⁵¹⁰ Eph 5, 27.

⁵¹¹ Matth. 6, 12. Cf. *De haeres.* 88 ; *De gesta Pel.* 12, 27.

⁵¹² *De bapt.* 4, 22, 29.

latronis exemplum, quia utrum non fuerit baptizatus, incertum est⁵¹³. In libro septimo de vasis aureis et argenteis in domo magna constitutis sensum Cypriani secutus sum, qui haec accepit in bonis, in malis autem lignea et fictilia, ad illa referens quod dictum est : *Alia quidem in honorem*, ad haec autem quod dictum est : *Alia vero in contumeliam*⁵¹⁴. Sed magis approbo quod apud Tyconium postea repperi vel adverti, in utrisque intellegendum quaedam *in honorem*, non sola scilicet [533] aurea et argentea, et rursus in utrisque quaedam *in contumeliam*, non utique sola lignea et fictilia⁵¹⁵.

Hoc opus sic incipit : *In eis libris quos adversus epistolam Parmeniani.*

CAPUT XIX. CONTRA QUOD ATTULIT CENTURIUS A DONATISTIS, LIBER UNUS.

Cum *adversus partem Donati* multa crebris disputationibus ageremus, attulit ad Ecclesiam quidam laicus tunc eorum nonnulla contra nos dictata vel scripta in paucis velut testimoniis, quae suae causae suffragari putant ; his brevissime respondi. Huius libelli titulus est : *Contra quod attulit Centurius a Donatistis*⁵¹⁶.

⁵¹³ *Retract.* 1, 26 (*quaest.* 62).

⁵¹⁴ Cyprian., *Ep.* 54, 3 ; cf. 2 Tim 2, 20.

⁵¹⁵ Tycon., *De sept. regul.*, 7 ; cf. *Ep.* 41, 2. *Quaest. in Hept.* 2, 102.

⁵¹⁶ Possid. *Indic.* 6, 12.

Et incipit sic : *Dicis eo quod scriptum est a Salomone : " Ab aqua aliena abstine te "*⁵¹⁷.

CAPUT XX. AD INQUISITIONES IANUARIi LIBRI DUO.

Libri duo quorum est titulus : *Ad inquisitiones Ianuarii* multa de sacramentis continent disputata, sive quae universaliter sive quae partiliter, id est non peraeque in omnibus locis, observat Ecclesia ; nec tamen commemorari omnia potuerunt, sed satis ad inquisita responsum est. Quorum librorum prior epistola est ; [534] habet quippe in capite, quis ad quem scribat. Sed ideo inter libros adnumeratur hoc opus, quoniam sequens qui nomina nostra non habet multo est prolixior, et in eo multo plura tractantur. In primo ergo quod de manna dixi : *Quia unicuique secundum propriam voluntatem in ore sapiebat*⁵¹⁸, non mihi occurrit, unde possit probari, nisi ex libro *Sapientiae*⁵¹⁹, quem Iudaei non recipiunt in auctoritatem canonicam. Quod tamen fidelibus potuit provenire, non illis adversus Deum murmuratoribus, qui profecto alias escas non desiderarent, si hoc eis saperet manna quod vellent.

Hoc opus sic incipit : *Ad ea quae me interrogasti.*

⁵¹⁷ Prov 9, 18 (*sec. LXX*).

⁵¹⁸ *Ep.* 54, 3, 4.

⁵¹⁹ *Sap* 16, 21.

CAPUT XXI. DE OPERE MONACHORUM, LIBER UNUS.

Ut *De opere monachorum* librum scriberem, illa necessitas compulit quod, cum apud Carthaginem monasteria esse coepissent, alii se suis manibus transigebant obtemperantes Apostolo⁵²⁰, alii vero ita ex oblationibus religiosorum vivere volebant, ut nihil operantes, unde necessaria vel haberent vel supplerent, se potius implere praeceptum evangelicum existimarent atque iactarent, ubi Dominus ait: *Respicite volatilia caeli et lilia agri*⁵²¹. Unde etiam inter laicos inferioris propositi sed tamen studio ferventes existere coeperant tumultuosa certamina, quibus Ecclesia turbaretur, aliis hoc aliis aliud defendentibus. Huc accedebat quod criniti erant quidam eorum qui operandum non esse dicebant. Unde [535] contentiones hinc reprehendentium inde quasi purgantium pro partium studiis augebantur. Propter haec venerabilis senex Aurelius, Ecclesiae ipsius civitatis episcopus, ut hinc aliquid scriberem iussit, et feci.

Hic liber sic incipit: *Iussioni tuae, sancte frater Aureli.*

CAPUT XXII. DE BONO CONIUGALI, LIBER UNUS.

⁵²⁰ 1 Thess 4, 11.

⁵²¹ Matth. 6, 26, 28.

I. Ioviniani haeresis sacrarum virginum meritum aequando pudicitiae coniugali tantum valuit in urbe Roma, ut nonnullas etiam sanctimoniales, de quarum pudicitia suspicio nulla praecesserat, deiecisse in nuptias diceretur, hoc maxime argumento cum eas urgeret dicens : Tu ergo melior quam Sara, melior quam Susanna sive Anna ? Et ceteras commemorando testimonio sanctae Scripturae commendatissimas feminas, quibus se illae meliores, vel etiam pares cogitare non possent. Hoc modo etiam virorum sanctorum sanctum caelibatum commemoratione patrum coniugatorum et comparatione frangebat. Huic monstro sancta Ecclesia quae ibi est, fidelissime ac fortissime restitit. Remanserant autem istae disputationes eius in quorundam sermunculis ac susurris, quas palam suadere nullus audebat. Sed etiam occulte venenis repentibus facultate quam donabat Dominus occurrendum fuit, maxime quoniam iactabatur Ioviniano responderi non potuisse cum laude, sed cum vituperatione nuptiarum. Propter hoc librum edidi, cuius inscriptio est : *De bono coniugali*. Ubi de propagatione filiorum priusquam homines mortem [536] peccando mererentur, quoniam concubitus mortalium corporum res videtur, quaestio magna dilata est ; sed in aliis postea litteris nostris, satis quantum arbitror, explicatur⁵²².

⁵²² *De civ. Dei* 14, 21-22.

II. Dixi etiam quodam loco : *Quod enim est cibus ad salutem hominis, hoc est concubitus ad salutem generis, et utrumque non est sine delectatione carnali, quae tamen modificata et temperantia refrenante in usum naturalem redacta, libido esse non potest*⁵²³. Quod ideo dictum est, quoniam libido non est bonus et rectus usus libidinis. Sicut enim malum est male uti bonis, ita bonum bene uti malis. De qua re alias, maxime contra novos haereticos Pelagianos, diligentius disputavi⁵²⁴. De Abraham quod dixi : *Ex hac oboedientia pater ille Abraham, qui sine uxore non fuit, esse sine unico filio et a se occiso paratus fuit*⁵²⁵, non satis approbo. Magis enim filium, si esset occisus, resurrectione sibi mox fuisse reddendum credidisse credendus est⁵²⁶, sicut in *Epistola* legitur quae est *ad Hebreos*⁵²⁷.

Hic liber sic incipit : *Quoniam unusquisque homo, humani generis pars est.*

CAPUT XXIII. DE SANCTA VIRGINITATE, LIBER UNUS.

Posteaquam scripsi *De bono coniugali*, expectabatur ut scriberem *de sancta virginitate* ; nec distuli atque id Dei munus et quam magnum et

⁵²³ *De bono coniug.* 16, 18.

⁵²⁴ *De nupt. et concup.* 2, 21, 36 ; *C. Iul.* 3, 7, 16 ; 5, 16, 60.

⁵²⁵ *De bono coniug.* 23, 31.

⁵²⁶ Cf. *Serm.* 2, 1, 1.

⁵²⁷ Hebr 11, 19.

quanta [537] humilitate custodiendum esset uno sicut potui volumine ostendi.

Hic liber sic incipit : *Librum de bono coniugali nuper edidimus.*

CAPUT XXIV. DE GENESI AD LITTERAM, LIBRI DUODECIM.

I. Per idem tempus *De Genesi* libros duodecim scripsi, ab exordio donec de paradiso dimissus est Adam, et *flammea romphaea posita est custodire viam ligni vitae*⁵²⁸. Cum autem ad hoc usque undecim libri peracti essent, duodecimum addidi, in quo diligentius de paradiso disputatum est. Titulus eorum librorum inscribitur : *De Genesi ad litteram*, id est non secundum allegoricas significationes⁵²⁹, sed secundum rerum gestarum proprietatem. In quo opere plura quaesita quam inventa sunt, et eorum quae inventa sunt pauciora firmata, cetera vero ita posita, velut adhuc requirenda sint. Hos sane libros posterius coepi, sed prius terminavi quam *De Trinitate*. Ideo eos nunc ordine quo coepi recolui.

II. In quinto libro et ubicumque in eis libris posui : *De semine cui repromissum est, quod dispositum sit " per angelos in manu Mediatoris "*⁵³⁰, non sic habet Apostolus, sicut veriores codices post inspexi, maxime Grecos. De lege enim dictum est, quod

⁵²⁸ Gen 3, 24.

⁵²⁹ Cf. *Retract.* 1, 10. 18.

⁵³⁰ *De Gen ad litt.* 5, 19, 38 ; 9, 16 ; cf. Gal 3, 19.

tamquam de semine dictum multi Latini codices habent per interpretantis errorem. In sexto libro quod dixi : *Adam imaginem Dei, secundum quam factus est, perdidisse peccato*⁵³¹, non sic accipiendum est, tamquam in eo nulla remanserit, sed [538] quod tam deformis, ut reformatione opus haberet. In duodecimo de inferis magis mihi videor docere debuisse quod sub terris sint, quam rationem reddere cur sub terris esse credantur sive dicantur, quasi non ita sit⁵³².

Hoc opus sic incipit : *Omnis divina Scriptura bipertita est.*

CAPUT XXV. CONTRA LITTERAS PETILIANI, LIBRI TRES.

Antequam finirem libros *De Trinitate* et libros *De Genesi ad litteram*, irruit causa respondendi litteris Petiliani Donatistae quas adversus Catholicam scripsit, quam differre non potui. Et scripsi in hanc rem tria volumina, quorum primo primae parti epistolae ipsius quam scripsit ad suos, quia non tota in nostras manus venerat sed prior parva pars eius, quanta potui celeritate et veritate respondi. Etiam ipsa epistola est ad nostros, sed ideo inter libros habetur, quia ceteri duo in eadem causa libri sunt. Postea quippe invenimus totam, eique tanta diligentia respondi, quanta Fausto Manichaeo ; verba scilicet eius sub

⁵³¹ *De Gen ad litt.* 6, 27, 28.

⁵³² *De Gen ad litt.* 12, 33.

ipsius nomine prius ponens particulatim et sub meo per singula responsionem meam. Sed prius quod scripseram, antequam totam repperiremus, pervenit ad Petilianum, et iratus respondere conatus est, in me potius dicens quidquid eum libuit, in causa vero omnino deficiens. Quod cum posset collatis utriusque nostrum scriptis facillime adverti, tamen propter tardiores hoc ipse respondendo demonstrare curavi. Sic est additus eidem nostro operi liber tertius.

Hoc opus in primo libro sic [539] incipit : *Nostis nos saepe voluisse ;* in secundo autem sic : *Primis partibus epistolae Petiliani ;* in tertio autem sic : *Legi, Petiliane, litteras tuas.*

CAPUT XXVI. AD CRESCONIUM GRAMMATICUM PARTIS DONATI, LIBRI QUATTUOR.

Grammaticus etiam quidam Donatista Cresconius, cum invenisset epistolam meam, qua primas partes quae in manus nostras tunc venerant epistolae Petiliani redargui⁵³³, putavit mihi esse respondendum et hoc ipsum scripsit ad me. Cui operi eius libris quattuor respondi, ita sane ut tribus peragerem quod universa responsio flagitabat. Sed cum viderem de sola Maximianensium causa, quos suos schismaticos damnaverunt, et eorum aliquos rursus in suis honoribus receperunt, baptismumque ab eis extra suam communionem datum non repetiverunt,

⁵³³ *Retract.* 2, 25.

responderi posse ad cuncta quae scripsit, etiam quartum librum addidi, in quo id ipsum, quantum potui, diligenter atque evidenter ostendi. Hos autem quattuor libros quando scripsi, iam contra Donatistas leges dederat Honorius imperator⁵³⁴.

Hoc opus sic incipit : *Quando ad te, Cresconi, mea scripta pervenire possent ignorans.* [540]

CAPUT XXVII. PROBATIONUM ET TESTIMONIORUM CONTRA DONATISTAS, LIBER UNUS.

Post haec ut ad Donatistas pervenirent contra eorum errorem et pro catholica veritate necessaria documenta curavi, sive de ecclesiasticis sive de publicis gestis sive de Scripturis canonicis. Et primo ad illos eadem promissa direxi, ut ipsi ea, si fieri posset, exposcerent. Quae cum venissent in eorum quorundam manus, nescio quis extitit qui suo nomine tacito contra haec scriberet, ita se confitens Donatistam, tamquam hoc vocaretur. Cui ego respondens alium librum scripsi. Illa vero documenta quae promiseram eidem libello quo ea promiseram iunxi et ex utroque unum esse volui, eumque sic edidi ut in parietibus basilicae quae Donatistarum fuerat prius propositus legeretur ; cuius est titulus ; *Probatiorum et testimoniorum contra Donatistas*. In quo libro absolutionem Felicis Aptungensis⁵³⁵, ordinatoris Caeciliani non hoc ordine posuimus,

⁵³⁴ C. Crescon. 3, 43, 47 ; Ep. 105, 2, 9. Cod. Theod. 16, 5, 38-43. 52. 54.

quo postea nobis claruit, consulibus diligenter inspectis, sed tamquam post Caecilianum fuerit absolutus, cum ante sit factum. Illud etiam quod commemorato Iudae apostoli testimonio, ubi ait : *Hi sunt qui segregant semetipsos animales spiritum non habentes*⁵³⁶, adiunxi etiam dicens : *De quibus et Paulus apostolus dicit : " Animalis autem homo non percipit ea quae sunt Spiritus Dei "*⁵³⁷, non sunt isti illis coequandi, quos omnino ab Ecclesia schisma praecidit. Istos quippe [541] idem apostolus Paulus *parvulos* dicit esse *in Christo*, quos nondum escam valentes capere lacte nutrit tamen ; illi autem non in filiis parvulis sed in mortuis et perditis computandi sunt, ut si quis eorum correctus Ecclesiae fuerit copulatus, recte de illo dici possit : *Mortuus erat et revixit, perierat et inventus est*⁵³⁸.

Hic liber sic incipit : *Qui timetis consentire Ecclesiae catholicae.*

CAPUT XXVIII. CONTRA DONATISTAM NESCIO QUEM, LIBER UNUS.

Alterius libri quem supra commemoravi, titulum esse volui ; *Contra nescio quem Donatistam.* Ubi similiter de absolutione ordinatoris Caeciliani verus ordo temporis non est. Illud etiam quod

⁵³⁵ Optat. Milev., *De schism. Donat.* 1, 18, 27 ; cf. Aug., *Brev. collat.* 3, 24, 42 ; *Post collat. c. Donat.* 33, 56 ; *Ep.* 43, 2, 3 ; 88, 3 ; 105, 8 ; *C. Crescon.* 3, 61, 67.

⁵³⁶ Iud 19.

⁵³⁷ 1 Cor 2, 14.

⁵³⁸ Lucas 15, 32 ; cf. 1 Cor 3, 1-2.

dixi : *Ad multitudinem zizaniorum*⁵³⁹, *ubi intelleguntur omnes haereses*, minus habet unam necessariam coniunctionem ; dicendum enim fuit : *Ubi intelleguntur et omnes haereses*, aut : *Ubi intelleguntur etiam omnes haereses*. Nunc vero ita dictum est, quasi praeter Ecclesiam tantummodo sint zizania non etiam in Ecclesia, cum ipsa sit regnum Christi, de quo collecturi sunt angeli eius messis tempore omnia scandala⁵⁴⁰. Unde et Cyprianus martyr : *Etsi videntur, inquit, in Ecclesia esse zizania, non tamen impediri debet aut fides aut caritas nostra, ut quoniam zizania esse in Ecclesia cernimus, ipsi de Ecclesia recedamus*⁵⁴¹. Quem sensum etiam nos alias⁵⁴², et maxime adversus [542] eosdem praesentes Donatistas, in collatione defendimus.

Hic liber sic incipit : *Probationes rerum necessariarum quodam breviculo collectas promisimus.*

CAPUT XXIX. ADMONITIO DONATISTARUM DE MAXIMIANISTIS, LIBER UNUS.

Cum viderem multos legendi labore impediri a discendo, quam nihil rationis atque veritatis habeat pars Donati, libellum brevissimum feci, quo eos de solis Maximianistis admonendos putavi, ut posset facilitate describendi in manus plurium pervenire, et ipsa sui brevitate facilius

⁵³⁹ Cf. Matth. 13, 36.

⁵⁴⁰ Cf. Matth.. 13, 41.

⁵⁴¹ Cyprian., *Ep.* 54, 3.

⁵⁴² *C. Crescon.* 3, 31, 35 ; 4, 56, 67 ; *C. Gauden.* 2, 3, 3 ; *Post collat. c. Donat.* 6, 9, 20. 28.

commendari memoriae. Cui titulum imposui ;
Admonitio Donatistarum de Maximianistis.

Hic liber sic incipit : *Quicumque calumniis
hominum et criminationibus movemini.*

CAPUT XXX. DE DIVINATIONE DÆMONUM,
LIBER UNUS.

Per idem tempus accidit mihi ex quadam
disputatione necessitas ut *De divinatione daemonum*
libellum scriberem, cuius titulus iste ipse est. In
eius autem quodam loco ubi dixi : *Daemones
aliquando et hominum dispositiones non solum voce
prolatas verum etiam cogitatione conceptas, cum signa
quaedam ex animo exprimuntur in corpore, tota facilitate
perdiscere*⁵⁴³, [543] rem dixi occultissimam audaciore
asseveratione quam debui. Nam pervenire ista ad
notitiam daemonum per nonnulla etiam
experimenta compertum est. Sed utrum signa
quaedam dentur ex corpore cogitantium, illis
sensibilia nos autem latentia, an alia vi et ea
spiritali ista cognoscant, aut difficillime potest ab
hominibus aut omnino non potest inveniri.

Hic liber sic incipit : *Quodam die, in diebus
sanctis octavarum.*

CAPUT XXXI. QUÆSTIONES EXPOSITÆ CONTRA
PAGANOS, NUMERO SEX.

Inter haec missae sunt mihi a Carthagine
quaestiones sex, quas proposuit amicus quidam

⁵⁴³ *De divin. daemon.* 5, 9.

quem cupiebam fieri Christianum, ut contra paganos solverentur, praesertim quia nonnullas earum a Porphyrio philosopho propositas dixit. Sed non eum esse arbitror Porphyrium illum Siculum, cuius celeberrima est fama. Harum quaestionum disputationes in unum librum contuli non prolixum, cuius est titulus : *Sex quaestiones contra paganos expositae*.⁵⁴⁴

Earum autem prima est : *De resurrectione* ;

secunda : *De tempore christianae religionis* ;

tertia : *De sacrificiorum distinctione* ;

quarta : *De eo quod scriptum est : " In qua mensura mensi fueritis, remetietur vobis "*⁵⁴⁵ ;

quinta : *De Filio Dei secundum Salomonem* ;

sexta : *De Iona propheta*.

In quarum secunda quod dixi : *Salus religionis huius, per quam solam veram salus vera veraciterque promittitur, nulli umquam defuit, qui dignus fuit ; et cui defuit, dignus non fuit*⁵⁴⁶, non ita dixi, [544] tamquam ex meritis suis quisque dignus fuerit, sed quemadmodum ait Apostolus : *Non ex operibus sed ex vocante* dictum esse : *" Maior serviet minori "*⁵⁴⁷, quam vocationem ad Dei propositum asserit pertinere. Unde dicit : *Non secundum opera nostra, sed secundum suum propositum et gratiam*⁵⁴⁸ ; et unde

⁵⁴⁴ Ep. 102.

⁵⁴⁵ Matth. 7, 2.

⁵⁴⁶ Ep. 102, 2, 15.

⁵⁴⁷ Rom 9, 12-13.

⁵⁴⁸ 2 Tim 1, 9.

item dicit : *Scimus quia diligentibus Deum omnia cooperantur in bonum, his qui secundum propositum vocati sunt*⁵⁴⁹. De qua vocatione ait : *Ut dignos vos habeat vocatione sua sancta*⁵⁵⁰.

Hic liber, post epistolam quae postmodum a capite addita est⁵⁵¹, sic incipit : *Movet quosdam et requirunt.*

CAPUT XXXII. EXPOSITIO EPISTOLÆ JACOBI AD DUODECIM TRIBUS.

32. Inter opuscula mea reperi *Expositionem Epistolae Iacobi*, quam retractans adverti annotationes potius expositorum quorundam eius locorum in librum redactas fratrum diligentia, qui eas in frontibus codicis esse noluerunt. Adiuvant ergo aliquid, nisi quod ipsam epistolam, quam legebamus quando ista dictavi, non diligenter ex graeco habebamus interpretatam.

Hic liber sic incipit : *Duodecim tribubus quae sunt in dispersione, salutem.* [545]

CAPUT XXXIII. DE PECCATORUM MERITIS ET REMISSIONE, ET DE BAPTISMO PARVULORUM, AD MARCELLINUM, LIBRI TRES.

Venit etiam necessitas, quae me cogeret adversus novam Pelagianam haeresim scribere, contra quam prius, cum opus erat, non scriptis

⁵⁴⁹ Rom 8, 28.

⁵⁵⁰ 2 Thess 1, 11.

⁵⁵¹ *Ep.* 102.

sed sermonibus et collocutionibus agebamus⁵⁵², ut quisque nostrum poterat aut debebat. Missis ergo mihi a Carthagine quaestionibus eorum quas rescribendo dissolverem, scripsi primum tres libros, quorum titulus est : *De peccatorum meritis et remissione*. Ubi maxime disputatur de baptismo parvulorum propter originale peccatum et de gratia Dei qua iustificamur, hoc est iusti efficimur ; quamvis in hac vita nemo ita *servet mandata*⁵⁵³ iustitiae, ut non sit ei necessarium pro suis peccatis orando dicere : *Dimitte nobis debita nostra*⁵⁵⁴. Contra quae omnia sentientes illi novam haeresim condiderunt. In his autem libris tacenda adhuc arbitratus sum nomina eorum⁵⁵⁵, sic eos facilius posse corrigi sperans, immo etiam in tertio libro, quae est epistola sed in libris habita propter duos quibus eam connectendam putavi⁵⁵⁶, Pelagii ipsius nomen non sine aliqua laude posui, quia vita eius a multis praedicabatur, et eius illa redargui, quae in suis scriptis non ex persona sua posuit, sed quid ab aliis diceretur exposuit, quae tamen postea iam haereticus pertinacissima animositate defendit. Caelestius vero discipulus eius iam propter tales assertiones apud Carthaginem in episcopali [546] iudicio, ubi ego

⁵⁵² *Serm.* 26-27 ; 131 ; 153 ; 155-156 ; 158 ; 165 ; 169 ; 174 ; 176 ; 181.

⁵⁵³ 1 Io 3, 24.

⁵⁵⁴ Matth. 6, 12.

⁵⁵⁵ *De gestis Pel.* 23, 47.

⁵⁵⁶ *De pecc. mer. et rem.* 3, 3, 5.

non interfui, excommunicationem meruerat⁵⁵⁷. In secundo libro quodam loco : *Hoc quibusdam, inquam, in fine largietur, ut mortem repentina commutatione non sentiant*⁵⁵⁸, servans locum diligentiori de hac re inquisitioni. Aut enim non morientur, aut de ista vita in mortem et de morte in aeternam vitam celerrima commutatione tamquam *in ictu oculi*⁵⁵⁹ transeundo mortem non sentient.

Hoc opus sic incipit : *Quamvis in mediis et magnis curarum aestibus.*

CAPUT XXXIV. DE UNICO BAPTISMO CONTRA PETILIANUM, AD CONSTANTINUM, LIBER UNUS.

Eodem tempore librum *De unico baptismo* amicus quidam meus a nescio quo Donatista presbytero accepit, indicante quod Petilianus episcopus eorum Constantinensis eum scripserit. Hunc ad me ille attulit ac vehementer ut ei responderem rogavit ; et factum est. Librum autem etiam meum in quo respondi eundem titulum habere volui, hoc est : *De unico baptismo*. In quo libro illud quod dixi : *Constantinum imperatorem Donatistis criminantibus ordinatorem Caeciliani Felicem Aptungensem non negasse accusationis locum, quamvis eos in Caeciliani fictis criminibus calumniosos fuisset*

⁵⁵⁷ *De haeres.* 88.

⁵⁵⁸ *De pecc. mer. et rem.* 2, 31, 50.

⁵⁵⁹ 1 Cor 15, 52.

*expertus*⁵⁶⁰, in ordine temporum postea consideratum, aliter inventum est⁵⁶¹. Nam prius memoratus Imperator causam Felicis fecit audiri a proconsule, ubi legitur absolutus ; et postea ipse Caecilianum cum accusatoribus eius auditum comperit innocentem, ubi eos [547] *expertus* est in eius criminibus calumniosos. Qui ordo temporum per consules declaratus, multo vehementius in ea causa calumnias Donatistarum convincit penitusque subvertit, quod alibi ostendimus⁵⁶².

Hic liber sic incipit : *Respondere diversa sentientibus.*

CAPUT XXXV. DE MAXIMIANISTIS CONTRA DONATISTAS, LIBER UNUS.

Scripti etiam librum inter cetera contra Donatistas, non brevissimum sicut antea sed grandem, multo diligentius. In quo apparet quemadmodum eorum adversus Ecclesiam catholicam impium ac superbissimum errorem sola funditus Maximianistarum causa subvertat, quod schisma factum est ex ipsa parte Donati.

Hic liber sic incipit : *Multa iam diximus, multa iam scripsimus.*

CAPUT XXXVI. DE GRATIA TESTAMENTI NOVI, AD HONORATUM, LIBER UNUS.

⁵⁶⁰ *De un. bapt.* 16, 28.

⁵⁶¹ *De fide et oper.* 4, 6 ; cf. *Ep.* 43, 2, 5.

⁵⁶² *Retract.* 2, 27.

Eo ipso tempore, quo contra Donatistas vehementer exercebamur et contra Pelagianos exerceri iam coeperamus, amicus quidam misit mihi quinque a Carthagine quaestiones, et rogavit ut eas illi scribendo exponerem. Quae sunt :

*Quid sibi velit vox illa Domini : " Deus meus [548] Deus meus, ut quid me dereliquisti ? "*⁵⁶³ ; Et : *Quid sit quod ait Apostolus : " Ut in caritate radicati et fundati, praevaleatis comprehendere cum omnibus sanctis, quae sit latitudo et longitudo, et altitudo et profundum "*⁵⁶⁴.

Et : *Quae sint quinque virgines stultae quaeve sapientes*⁵⁶⁵.

Et : *Quae sint tenebrae exteriores*⁵⁶⁶.

Et : *Quomodo intellegendum sit : " Verbum caro factum est "*⁵⁶⁷.

Ego autem intuens supra dictam haeresim novam inimicam gratiae Dei, sextam mihi proposui quaestionem *De gratia Testamenti Novi*. De qua disputans interposita expositione Psalmi vicesimi primi, in cuius capite scriptum est quod Dominus exclamavit in cruce, quod ille amicus in primis mihi proposuit exponendum, omnia illa quinque dissolvi, non hoc ordine quo erant proposita, sed sicut mihi disserenti *De gratia*

⁵⁶³ Ps 21, 1 ; cf. Matth. 27, 46.

⁵⁶⁴ Eph 3, 17-18.

⁵⁶⁵ Matth. 25, 1 ss.

⁵⁶⁶ Matth. 22, 13.

⁵⁶⁷ Io 1, 14.

Testamenti Novi tamquam suis locis congruenter occurrere potuerunt⁵⁶⁸.

Hic liber sic incipit : *Quinque mihi proposuisti tractandas quaestiones.*

CAPUT XXXVII. DE SPIRITU ET LITTERA, AD MARCELLINUM, LIBER UNUS.

Ad quem scripseram tres libros, quorum titulus est : *De peccatorum meritis et remissione*, ubi diligenter disputatur etiam de baptismo parvulorum⁵⁶⁹, rescripsit mihi se fuisse permotum quod dixerim fieri posse ut sit homo sine peccato, si voluntas eius non desit ope adiuvante divina, quamvis nemo tam perfectae iustitiae in [549] hac vita vel fuerit vel sit vel futurus sit. Quaesivit enim quomodo dixerim posse fieri, cuius rei desit exemplum. Propter hanc eius inquisitionem scripsi librum cuius est titulus : *De spiritu et littera*, pertractans apostolicam sententiam ubi ait : *Littera occidit, Spiritus autem vivificat*⁵⁷⁰. In quo libro quantum Deus adiuvit acriter disputavi contra inimicos gratiae Dei, qua iustificatur impius. Cum autem agerem de observationibus Iudaeorum, a quibusdam escis secundum veterem legem abstinentium, dixi : *Quarumdam escarum cerimoniae*⁵⁷¹, quod nomen non est in usu

⁵⁶⁸ *Ep.* 140.

⁵⁶⁹ *Retract.* 2, 33.

⁵⁷⁰ 2 Cor 3, 6.

⁵⁷¹ *De spir. et litt.* 21, 36 ; *Ep.* 82, 18. Crte istud nimen quaesitum diligenter in versione LXX, nusquam nobis occurrit ; sed quibus locis Vulgata habet

Litterarum sanctarum. Ideo tamen mihi congruens visum est, quod a carendo appellatas *cerimonias*⁵⁷², quasi *carimonias* memoria tenebam, eo quod observantes careant his rebus a quibus se abstinent. Quod si est origo alia huius nominis, quae abhorret a vera religione, secundum hanc ego non sum locutus, sed secundum istam quam supra memoravi.

Hic liber sic incipit : *Lectis opusculis quae ad te nuper elaboravi, fili carissime Marcelline.*

CAPUT XXXVIII. DE FIDE ET OPERIBUS LIBER UNUS.

Interea missa sunt mihi a quibusdam fratribus laicis quidem sed divinorum eloquiorum studiosis scripta nonnulla, quae ita distinguerent a bonis operibus [550] christianam fidem, ut sine hac non posse, sine illis autem posse perveniri suaderetur ad aeternam vitam. Quibus respondens librum scripsi cuius nomen est : *De Fide et operibus*. In quo disputavi non solum quemadmodum vivere debeant gratia Christi regenerati, verum etiam quales *ad lavacrum regenerationis*⁵⁷³ admitti.

Hic liber sic incipit : *Quibusdam videtur.*

Ceremonias, in illa reperimus δικασιώματα *justificationes*, vel προσάγματα *praecepta*, vel φυλακάς *custodias*, vel λατρείαν *servitutem, νόμον*, etc.

⁵⁷² Aul. Gell., *Noct. Atticae* 4, 9, 8.

⁵⁷³ Tit 3, 5.

CAPUT XXXIX. BREVICULUS COLLATIONIS CUM
DONATISTIS, LIBRI TRES.

Posteaquam facta est cum Donatistis nostra collatio, breviter commemoravi quae gesta sint, litterisque comprehendi secundum tres dies quibus cum eis contulimus. Idque opus utile existimavi, quo quisque commonitus vel sciat sine labore quid actum sit, vel consultis numeris, quos rebus singulis annotavi, legat in eisdem gestis ad locum quodcumque voluerit, quoniam fatigant illa nimia prolixitate lectorem. Huius autem operis titulus est : *Breviculus collationis*.

Hoc opus sic incipit : *Cum catholici episcopi et partis Donati*.

CAPUT XL. POST COLLATIONEM CONTRA
DONATISTAS, LIBER UNUS.

Librum etiam scripsi grandem satis quantum existimo, diligenter ad ipsos Donatistas post collationem quam [551] cum episcopis eorum habuimus, ne ab eis seducerentur ulterius ; ubi respondi etiam quibusdam vanitatibus eorum, quae ad nos pervenire potuerunt, quas victi ubi poterant et quomodo poterant iactitabant, praeter illa quae dixi de gestis collationis, unde quid actum sit breviter nosceretur. Multo autem brevius id egi in quadam ad eosdem rursus epistola ; sed quia in concilio Numidiaë omnibus qui ibi eramus hoc fieri placuit, non est in epistolis meis. Sic quippe incipit : *Silvanus senex*,

*Valentinus, Innocentius, Maximinus, Optatus, Augustinus, Donatus et ceteri episcopi de concilio Zertensi ad Donatistas*⁵⁷⁴.

Hic liber sic incipit : *Quid adhuc, Donatistae, seducimini ?*

CAPUT XLI. DE VIDENDO DEO, LIBER UNUS.

De videndo Deo scripsi librum⁵⁷⁵, ubi de spiritali corpore, quod erit in resurrectione sanctorum, inquisitionem diligentiolem distuli, utrum vel quomodo *Deus, qui spiritus est*⁵⁷⁶, etiam per corpus tale videatur ; sed eam postea quaestionem sane difficillimam in novissimo, id est in vicesimo et secundo libro *De civitate Dei* satis, quantum arbitror, explicavi⁵⁷⁷. Inveni etiam in quodam nostro codice, in quo et iste liber est, quoddam commonitorium a me factum de hac re ad episcopum Siccensem Fortunatianum, quod in opusculorum meorum indiculo nec inter libros nec inter epistolas est notatum.

Hic liber sic incipit : *Memor debiti ;*

illud autem : *Sicut praesens rogavi et nunc commoneo.* [552]

CAPUT XLII. DE NATURA ET GRATIA, LIBER UNUS.

⁵⁷⁴ *Ep.* 141.

⁵⁷⁵ *Ep.* 147.

⁵⁷⁶ *Io* 4, 24.

⁵⁷⁷ *De civ. Dei* 22, 29.

Venit etiam tunc in manus meas quidam liber Pelagii, ubi hominis naturam contra Dei gratiam, qua iustificatur impius et qua christiani sumus, quanta potuit argumentatione defendit. Librum ergo quo huic respondi, defendens gratiam non contra naturam sed per quam natura liberatur et regitur, *De natura et gratia* nuncupavi. In quo verba quaedam quae velut Xysti Romani episcopi et martyris Pelagius posuit ita defendi, tamquam re vera eiusdem Xysti essent⁵⁷⁸ ; id enim putaveram. Sed postea legi Sexti philosophi esse non Xysti christiani.

Hic liber sic incipit : *Librum quem misistis.*

CAPUT XLIII. DE CIVITATE DEI, LIBRI VIGINTI DUO.

I. Interea Roma Gothorum irruptione agentium sub rege Alarico atque impetu magnae cladis eversa est. Cuius eversionem deorum falsorum multorumque cultores, quos usitato nomine paganos vocamus, in christianam religionem referre conantes solito acerbius et amarius Deum verum blasphemare coeperunt. Unde ego exardescens zelo domus Dei⁵⁷⁹ adversus eorum [553] blasphemias vel errores libros *De civitate Dei* scribere institui. Quod opus per aliquot annos me tenuit, eo quod alia multa

⁵⁷⁸ *De nat. et grat.* 64, 77 ; cf. Hieron., *Ep.* 133, 3 ; *Comm. in Ier* 22 ; *Comm. in Ezech* 18.

⁵⁷⁹ Ps 68, 10 ; Io 2, 17.

intercurrebant, quae differre non oporteret et me prius ad solvendum occupabant. Hoc autem *De civitate Dei* grande opus tandem viginti duobus libris est terminatum. Quorum quinque primi eos refellunt, qui res humanas ita prosperari volunt, ut ad hoc multorum deorum cultum, quos pagani colere consueverunt, necessarium esse arbitrentur, et quia prohibetur, mala ista exoriri atque abundare contendunt. Sequentes autem quinque adversus eos loquuntur, qui fatentur haec mala nec defuisse umquam nec defutura mortalibus et ea nunc magna nunc parva, locis, temporibus personisque variari, sed deorum multorum cultum, quo eis sacrificatur, propter vitam post mortem futuram esse utilem disputant. His ergo decem libris duae istae vanae opiniones christianae religioni adversariae refelluntur.

II. Sed ne quisquam nos aliena tantum redarguisse, non autem nostra asseruisse reprehenderet, id agit pars altera operis huius, quae libris duodecim continetur, quamquam, ubi opus est, et in prioribus decem quae nostra sunt asseramus, et in duodecim posterioribus redarguamus adversa. Duodecim ergo librorum sequentium primi quattuor continent exortum duarum civitatum, quarum est una Dei altera huius mundi ; secundi quattuor excursum earum sive procursum ; tertii vero qui et postremi, debitos fines. Ita omnes viginti et duo libri, cum sint de utraque civitate conscripti, titulum tamen a

meliore acceperunt, ut *De civitate Dei* potius vocaretur. In quorum decimo libro non debuit pro miraculo poni in Abrahae sacrificio flammam caelitus factam inter divisas victimas cucurrisse⁵⁸⁰, quoniam hoc illi in visione monstratum est. In septimo decimo libro, [554] quod dictum est de Samuele : *Non erat de filiis Aaron*⁵⁸¹, dicendum potius fuit : "Non erat filius sacerdotis". Filios quippe sacerdotum defunctis sacerdotibus succedere magis legitimi moris fuit. Nam in filiis Aaron reperitur pater Samuelis ; sed sacerdos non fuit, nec ita in filiis ut eum ipse genuerit Aaron, sed sicut omnes illius populi dicuntur filii Israel.

Hoc opus sic incipit : *Gloriosissimam civitatem Dei.*

CAPUT XLIV. AD OROSIUM PRESBYTERUM,
CONTRA PRISCILLIANISTAS ET ORIGENISTAS,
LIBER UNUS.

Inter haec Orosii cuiusdam Hispani presbyteri consultationi de Priscillianistis et de quibusdam Origenis sensibus, quos catholica fides improbat, quanta potui brevitate ac perspicuitate respondi. Cuius opusculi titulus est : *Ad Orosium contra Priscillianistas et Origenistas*. Et ipsa enim consultatio responsioni meae a capite adiuncta est.

⁵⁸⁰ *De civ. Dei* 10, 8 ; Gen 15, 17.

⁵⁸¹ *De civ. Dei* 17, 5 ; cf. *Retract.* 2, 55, 2.

Hic liber sic incipit : *Respondere tibi quaerenti, dilectissime fili Orosi.*

CAPUT XLV. AD HIERONIMUM PRESBYTERUM,
LIBRI DUO, UNUS DE ORIGINE ANIMAE ET ALIUS
DE SENTENTIA JACOBI.

Scrpsi etiam duos libros ad Hieronimum [555] presbyterum⁵⁸² sedentem in Bethleem, unum *De origine animae* hominis, alterum *De sententia apostoli Iacobi*, ubi ait : *Quicumque totam legem servaverit, offendat autem in uno factus est omnium reus*⁵⁸³, de utroque consulens eum. Sed in illo priore quaestionem quam proposui ipse non solvi, in posteriore autem quid mihi de illa solvenda videretur ipse non tacui, sed utrum hoc approbaret etiam ille consului. Rescripsit autem laudans eandem consultationem meam, sibi tamen ad respondendum otium non esse respondit. Ego vero quousque esset in corpore hos libros edere nolui, ne forte responderet aliquando, et cum ipsa responsione eius potius ederentur. Illo autem defuncto ad hoc edidi priorem, ut qui legit admoneatur aut non quaerere omnino, quomodo detur anima nascentibus, aut certe de re obscurissima eam solutionem quaestionis huius admittere⁵⁸⁴, quae contraria non sit apertissimis rebus, quas de originali peccato

⁵⁸² *Ep.* 166 ; 167.

⁵⁸³ *Iac* 2, 10.

⁵⁸⁴ *Cf. Retract.* 1, 1, 3 ; 2, 56.

fides catholica novit in parvulis, nisi regenerentur in Christo, sine dubitatione damnandis ; posteriorem vero ad hoc ut quaestionis de qua ibi agitur etiam quae nobis visa est solutio ipsa noscatur.

Hoc opus sic incipit : *Deum nostrum qui nos vocavit.*

CAPUT XLVI. AD EMERITUM DONATISTARUM EPISCOPUM, POST COLLATIONEM, LIBER UNUS.

Ad Emeritum Donatistarum episcopum, qui in collatione nostra quam cum illis habuimus eorum causam maxime agere videbatur, aliquanto post eandem collationem scripsi librum satis utilem, quoniam res quibus [556] vincuntur vel victi esse monstrantur commoda brevitate complectitur.

Hic liber sic incipit : *Si vel nunc, frater Emerite.*

CAPUT XLVII. DE GESTIS PELAGII, LIBER UNUS.

47. Per idem tempus in Oriente, hoc est in Syria Palaestina, Pelagius a quibusdam catholicis fratribus ad episcopalia gesta perductus, eisque absentibus qui de illo libellum dederant, quoniam ad diem synodi non potuerunt occurrere, ab episcopis quattuordecim auditus est⁵⁸⁵, ubi eum dogmata ipsa damnantem, quae inimica gratiae Christi adversus eum de libello legebantur, catholicum pronuntiarunt. Sed cum in manus

⁵⁸⁵ Cf. *Contra Iul.* 1, 5, 19. 7, 32 ; *Opus imp. c. Iul.* 2, 66 ; *Ep.* 186, 31.

nostras eadem gesta venissent, scripsi de his librum, ne illo velut absoluto eadem quoque dogmata putarentur iudices approbasse, quae ille nisi damnasset, nullo modo ab eis nisi damnatus exisset.

Hic liber sic incipit : *Posteaquam in manus nostras.*

CAPUT XLVIII. DE CORRECTIONE
DONATISTARUM, LIBER UNUS.

Eodem tempore scripsi etiam librum *De correctione Donatistarum* propter eos qui nolebant illos legibus imperialibus corrigi⁵⁸⁶.

Hic liber sic incipit : *Laudo et gratulor et admiror.* [557]

CAPUT XLIX. DE PRÆSENTIA DEI, AD
DARDANUM, LIBER UNUS.

49. *De praesentia Dei* scripsi librum, ubi nostra intentio contra haeresim Pelagianam maxime vigilat, non expresse nominatam. Sed in eo etiam de praesentia naturae quem Deum summum et verum dicimus, et de templo eius operose ac subtiliter disputatur⁵⁸⁷. Hic liber sic incipit : *Fateor me, frater dilectissime Dardane.*

⁵⁸⁶ *Ep.* 185.

⁵⁸⁷ Cf. *De grat. Chr.* 1, 30, 32 ; 2, 17, 19, 21, 24.

CAPUT L. CONTRA PELAGIUM ET CÆLESTIUM
DE GRATIA CHRISTI, ET DE PECCATO ORIGINALI
AD ALBINAM, PINIANUM ET MELANIAM, LIBRI
DUO.

Posteaquam Pelagiana haeresis cum suis auctoribus ab episcopis Ecclesiae Romanae, prius Innocentio deinde Zosimo⁵⁸⁸, cooperantibus conciliorum Africanorum litteris, convicta atque damnata est, scripsi duos libros adversus eos, unum : *De gratia Christi*, alterum : *De peccato originali*.

Hoc opus sic incipit : *Quantum de vestra et corporali et maxime spiritali salute gaudeamus*. [558]

CAPUT LI. GESTA CUM EMERITO
DONATISTARUM EPISCOPO, LIBER UNUS.

Aliquanto post collationem quam cum haereticis Donatistis habuimus, orta est nobis necessitas pergendi in Mauritaniam Caesariensem. Ibi apud ipsam Caesaream Emeritum Donatistarum episcopum vidimus, unum scilicet eorum septem quos pro suae causae defensione delegerant, et qui in eadem causa maxime laboraverat. Quae cum illo egerimus praesentibus episcopis eiusdem provinciae et plebe Caesariensis Ecclesiae, in qua civitate et civis et memoratorum haereticorum episcopus fuit, ecclesiastica gesta testantur, quae in meis

⁵⁸⁸ *Opus imp. c. Iul. 1, 16 ; 4, 3.*

habentur opusculis. Ubi non inveniens quid responderet, totum sermonem meum, quem de solis Maximianistis in auribus eius et omnium qui aderant explicavi, tamquam mutus audivit.

Hic liber vel haec gesta sic incipiunt : *Gloriosissimis imperatoribus Honorio XII et Theodosio VIII consulibus* duodecimo Kalendas Octobres Cesareae in ecclesia maiore.

CAPUT LII. CONTRA SERMONEM ARIANORUM, LIBER UNUS.

Inter haec venit in manus meas quidam sermo Arianorum, sine nomine auctoris sui. Huic, petente atque instante qui eum mihi miserat, quanta potui etiam [559] brevitate et celeritate respondi ; adiuncto eodem sermone a capite responsionis meae, et adhibitis ad singula numeris, quibus inspectis quid cui loco responderim, facile possit adverti.

Hic liber post eorum sermonem, qui a capite adiunctus est, sic incipit : *Eorum praecedenti disputationi hac disputatione respondeo.*

CAPUT LIII. DE NUPTIIS ET CONCUPISCENTIA, AD VALERIUM, LIBRI DUO.

Scripsi duos libros ad illustrem virum comitem Valerium, cum audissem Pelagianos ei nescio quid scripsisse de nobis, quod scilicet nuptias damnares asserendo originale peccatum. Quorum librorum titulus est : *De*

nuptiis et concupiscentia. Bonitatem quippe defendimus nuptiarum, ne putaretur earum esse vitium *concupiscentia carnis et lex in membris repugnans legi mentis*⁵⁸⁹, quo malo libidinis bene utitur ad filios procreandos pudicitia coniugalis. Ut autem duo libri essent, primus venit in Iuliani pelagiani manus, et scripsit adversus eum libros quattuor⁵⁹⁰, ex quibus quidam nonnulla decerpit et comiti Valerio misit, ille vero ad nos. Quae cum accepissem, alio libro ad eadem ipsa respondi⁵⁹¹.

Huius operis primus liber sic incipit : *Haeretici novi, dilectissime fili Valeri* ; secundus autem sic : *Inter militiae tuae curas.* [560]

CAPUT LIV. LOCUTIONUM, LIBRI SEPTEM.

Septem libros de septem libris divinarum Scripturarum, id est Moysi quinque et uno Iesu Nave et altero Iudicum, feci notatis locutionibus singulorum quae minus usitatae sunt linguae nostrae, quas parum advertendo sensum quaerunt qui legunt divinorum eloquiorum, cum sit locutionis genus, et nonnumquam exculpunt aliquid quod a veritate quidem non abhorreat, non tamen id sensisse auctor a quo id scriptum est invenitur, sed genere locutionis hoc dixisse credibilius apparet. Multa autem in Scripturis sanctis obscura cognito locutionis genere

⁵⁸⁹ *Ep.* 200 ; 207.

⁵⁹⁰ *Op. Imp. c. Iul.* 1, 16 ; 4, 3.

⁵⁹¹ *Ep.* 200 ; 207 ; *De nupt. et concup.* 2, 2, 2.

dilucescunt. Propter quod cognoscenda sunt eadem genera locutionum ubi sententiae patent, ut etiam ubi latent cognitio ipsa succurrat easque intentioni legentis aperiatur. Huius operis titulus est ; *Locutiones de Genesi*, atque ita de singulis libris. Quod autem in primo libro posui⁵⁹² scriptum esse : *Et fecit Noe omnia verba quaecumque praecepit illi Dominus, sic fecit*⁵⁹³, eamque locutionem dixi esse similem ei quod in conditione creaturae, posteaquam dicitur : *Et sic est factum*, additur : *et fecit Deus*⁵⁹⁴, non omni modo simile hoc eidem mihi videtur. Denique ibi etiam sensus latet, hic sola locutio est.

Hoc opus sic incipit : *Locutiones Scripturarum.*
[561]

CAPUT LV. QUÆSTIONUM, LIBRI SEPTEM.

I. Eodem tempore scripsi etiam libros *Quæstionum* de libris eisdem divinis septem, quos ideo appellare sic volui, quia ea quae ibi disputantur magis quaerenda proposui quam quaesita dissolvi, quamvis multo plura in eis mihi videantur ita pertractata, ut possint etiam soluta et exposita non immerito iudicari. *Regnorum* quoque *libros* eodem modo iam considerare coeperamus ; sed non multum progressi in alia, quae magis urgebant, animum intendimus. In primo autem

⁵⁹² *Locut.* 1, 18.

⁵⁹³ Gen 6, 22 ; 7, 5.

⁵⁹⁴ Gen 1, 15. 24.

libro, ubi agitur de virgis variatis quas ponebat Iacob in aqua, ut in conceptu positae oves eas viderent cum biberent et varios fetus parerent⁵⁹⁵, non bene a nobis exposita est causa, cur iterum concipientibus non ponebat, id est cum alios fetus conciperent, sed in priore conceptu⁵⁹⁶. Nam quaestionis alterius expositio⁵⁹⁷, ubi quaeritur cur dixerit socero suo Iacob : *Et decepisti mercedem meam decem agnabus*⁵⁹⁸, satis veraciter enodata demonstrat istam, sicut solvi debuit, non solutam.

II. In tertio quoque libro, ubi de summo agitur sacerdote⁵⁹⁹, quomodo creabat filios, cum haberet necessitatem bis in die ingredi in Sancta Sanctorum, ubi erat altare incensi, ad offerendum incensum mane et vespera⁶⁰⁰, quo non posset, sicut lex dicit, immundus intrare, et eadem lex dicat immundum fieri hominem etiam ex [562] concubitu coniugali⁶⁰¹, quem iubet quidem lavari aqua sed et lotum dicit *immundum esse usque ad vesperam*, unde dixi : *Consequens fuisse ut aut continens esset aut diebus aliquibus intermitteretur incensum*, non vidi non fuisse consequens. Potest enim sic intellegi quod scriptum est : *Immundus erit usque ad vesperam*, ut per ipsam vesperam iam non esset

⁵⁹⁵ *Quaest. in Hept.* 1, 93.

⁵⁹⁶ Gen 30, 37 ss.

⁵⁹⁷ *Quaest. in Hept.* 1, 95.

⁵⁹⁸ Gen 31, 41.

⁵⁹⁹ *Quaest. in Hept.* 3, 82. 85.

⁶⁰⁰ Ex 30, 7-8.

⁶⁰¹ Lev 15, 16.

immundus, sed usque ad ipsam, ut vespertino iam tempore incensum mundus offerret, cum propter creandos filios post matutinum incensum mixtus esset uxori. Itemque ubi quaesitum est, quomodo prohibitus esset super funus patris summus sacerdos intrare⁶⁰², cum eum fieri sacerdotem, quando unus erat, nisi post mortem sacerdotis patris non oporteret, dixi : *Propter hoc necesse fuisse nondum sepulto patre statim post eius mortem filium eius constitui, qui succederet patri, propter etiam continuationis incensum, quod bis in die necesse erat offerri*⁶⁰³, qui sacerdos super mortem nondum sepulti patris prohibetur intrare. Sed parum attendi potuisse hoc praecipi magis propter illos qui futuri fuerant summi sacerdotes non patribus summis sacerdotibus succedentes, sed tamen ex filiis, id est ex posteris Aaron, si forte summus sacerdos aut filios non haberet, aut ita reprobos haberet ut nullus eorum patri deberet succedere, sicut Samuel summo sacerdoti Heli successit⁶⁰⁴, cum sacerdotis filius ipse non esset, sed tamen ex filiis, hoc est ex posteris esset Aaron.

III. De latrone etiam cui dictum est : *Hodie mecum eris in paradiso*⁶⁰⁵, quod non fuerit visibiliter baptizatus, quasi certum posui, cum sit incertum magisque illum baptizatum fuisse credendum sit,

⁶⁰² Lev 21, 11.

⁶⁰³ *Quaest. in Hept.* 3, 83.

⁶⁰⁴ 3 Regg 1, 3 ss. ; 3, 1 ss.

⁶⁰⁵ Lucas 23, 43.

sicut ego quoque alibi postea disputavi⁶⁰⁶. Item quod in quinto libro dixi, [563] commemorantur matres in generationibus Evangelicis, *non eas positas nisi cum patribus*⁶⁰⁷, verum est quidem, sed ad rem de qua agebatur non pertinet. Agebatur autem de his qui ducebant fratrum vel propinquorum coniuges, eorum qui sine filiis defuncti essent, propter duos patres Ioseph, quorum alterum Matthaeus commemorat, alterum Lucas. De qua quaestione diligenter in hoc opere disserui, cum retractaremus opus nostrum *Contra Faustum Manichaeum*⁶⁰⁸.

Hoc opus sic incipit : *Cum Scripturas sanctas, quae appellantur Canonicae.*

CAPUT LVI. DE ANIMA ET EIUS ORIGINE, LIBRI QUATTUOR.

Eodem tempore quidam Vincentius Victor in Mauritania Caesariensi invenit apud Hispanum quemdam presbyterum Petrum, nonnullum opusculum meum, ubi quodam loco de origine animae hominum singulorum, utrum ex illa una primi hominis ac deinde ex parentibus propagentur, an sicut illi uni sine ulla propagatione singulae singulis dentur⁶⁰⁹, me nescire confessus sum, verumtamen scire animam

⁶⁰⁶ Cf. *Quaest. in Hept.* 3, 84.

⁶⁰⁷ Cf. Matth. 1, 16 ; Lucas 3, 23.

⁶⁰⁸ *Quaest. in Hept.* 5, 46.

⁶⁰⁹ *Retract.* 1, 1, 3 ; 2, 45.

non corpus esse sed spiritum ; et contra ista mea ad eundem Petrum scripsit ille duos libros, quos mihi de Caesarea Renatus monachus misit. Quibus ego lectis responsione mea quattuor reddidi : unum ad Renatum monachum, alterum ad presbyterum Petrum et duos ad eundem Victorem. Sed ad Petrum, quamvis habeat libri prolixitatem, tamen epistola est, quam nolui a tribus ceteris separari. In his autem omnibus, in quibus multa necessaria disseruntur, defendi de [564] origine animarum, quae singulis hominibus dantur, cunctationem meam, et multos errores atque pravitates praesumptionis eius ostendi. Quem tamen iuvenem non praepropere detestandum, sed adhuc docendum quanta potui lenitate tractavi, et ab eo rescripta correctionis eius accepi.

Huius operis liber ad Renatum sic incipit :
Sinceritatem tuam erga nos ;

ad Petrum autem sic : *Domino dilectissimo fratri et compresbytero Petro ;* duorum vero novissimorum ad Vincentium Victorem primus sic incipit : *Quod mihi ad te scribendum putavi.*

CAPUT LVII. AD POLLENTIUM, DE ADULTERINIS CONIUGIIS, LIBRI DUO.

Scripsi duos libros *De coniugiis adulterinis* quantum potui secundum Scripturas, cupiens solvere difficillimam quaestionem. Quod utrum enodatissime fecerim nescio ; immo vero non me

pervenisse ad huius rei perfectionem sentio, quamvis multos sinus eius aperuerim, quod iudicare poterit quisquis intellegenter legit.

Huius operis primus liber sic incipit : *Prima quaestio est, frater dilectissime Pollenti.*

Secundus autem sic : *Ad ea quae mihi scripseras.*
[565]

CAPUT LVIII. CONTRA ADVERSARIUM LEGIS ET PROPHETARUM, LIBRI DUO.

Interea liber quidam cuiusdam haeretici sive Marcionistae sive cuiuslibet eorum quorum error opinatur, quod istum mundum non Deus fecerit, nec Deus Legis quae data est per Moysen et Prophetarum ad eandem Legem pertinentium verus sit Deus sed pessimus daemon, cum apud Carthaginem multis confluentibus et attentissime audientibus, in platea maritima legeretur, pervenerunt ad eum fratres studiosissime christiani eumque mihi redarguendum sine ulla dilatione miserunt, multum rogantes ut nec ego respondere differrem. Refelli eum libris duobus, quos ideo praenotavi, *Contra adversarium Legis et Prophetarum*, quia codex ipse qui missus est, nomen non habebat auctoris.

Hoc opus sic incipit : *Libro quem misistis, fratres dilectissimi.*

CAPUT LIX. CONTRA GAUDENTIUM, DONATISTARUM EPISCOPUM, LIBRI DUO.

Per idem tempus Dulcitus tribunus et notarius hic erat in Africa exsecutor imperialium iussionum contra Donatistas datarum. Qui cum dedisset litteras ad Gaudentium Tamugadensem Donatistarum episcopum, unum illorum septem quos in nostra collatione auctores suae defensionis elegerant, exhortans eum ad unitatem [566] catholicam, et dissuadens incendium quo se ac suos cum ipsa in qua erat Ecclesia consumere minabatur, addens etiam ut, si se iustos putarent, fugerent potius secundum praeceptum Domini Christi⁶¹⁰ quam nefandis se ignibus concremarent, ille rescripsit epistolas duas, unam brevem festinante ut asseruit perlatore, aliam prolixam quasi plenius diligentiusque respondens. Has mihi supra memoratus tribunus existimavit esse mittendas, ut eas potius ipse refellerem; quas ambas uno libro redargui. Qui cum in eiusdem Gaudentii pervenisset manus, rescripsit quod ei visum est ad me ipsum, nulla ratione respondens, sed magis se nec respondere nec tacere potuisse declarans. Quod cum satis posset intellegenter legentibus, et nostra atque ipsius dicta conferentibus apparere, nolui tamen sine rescripto relinquere quidquid illud fuit. Hinc factum est ut hi nostri ad illum duo libri essent.

Hoc opus sic incipit : *Gaudentius Donatistarum Tamugadensis episcopus.*

⁶¹⁰ Cf. Matth. 10, 23.

CAPUT LX. CONTRA MENDACIUM, LIBER UNUS.

Tunc et *Contra mendacium* scripsi librum, cuius operis ea causa exstitit, quod ad Priscillianistas haereticos vestigandos, qui haeresim suam non solum negando atque mentiendo⁶¹¹, verum etiam peierando existimant occultandam, visum est quibusdam catholicis Priscillianistas se debere simulare⁶¹², ut eorum latebras penetrarent. Quod ego fieri prohibens, hunc librum condidi.

Hic liber sic incipit : *Multa mihi legenda misisti.*
[567]

CAPUT LXI. CONTRA DUAS EPISTOLAS PELAGIANORUM, LIBRI QUATTUOR.

Sequuntur libri quattuor, quos *Contra duas epistolas Pelagianorum* ad episcopum Romanae Ecclesiae Bonifatium scripsi, quia, cum in manus eius venissent, ipse mihi eas miserat, inveniens in illis calumniose interpositum nomen meum.

Hoc opus sic incipit : *Noveram te quidem, fama celeberrima praedicante.*

CAPUT LXII. CONTRA JULIANUM, LIBRI SEX.

Interea libri quattuor Iuliani pelagiani⁶¹³, quos supra commemoravi, venerunt etiam in manus nostras. In quibus comperi illa, quae ex eis decerpserat qui ea comiti Valerio miserat, non

⁶¹¹ *C. mendacium* 11, 25 ; 21, 41.

⁶¹² *C. mendacium* 7, 18.

⁶¹³ *Retract.* 2, 53.

omnia eo modo quo a Iuliano dicta sunt ad eundem comitem scripta, sed nonnulla eorum aliquantum fuisse mutata. Scripsi ergo sex libros adversus illos quattuor⁶¹⁴; sed meorum duo primi testimoniis sanctorum, qui fidem catholicam post Apostolos defenderunt, Iuliani impudentiam redarguunt, qui tamquam Manichaeorum dogma nobis obiciendum putavit, quia ex Adam trahi dicimus originale peccatum, quod *per lavacrum regenerationis*⁶¹⁵, non solum in maioribus, verum etiam in parvulis solvitur. Quantum autem ipse Iulianus [568] quibusdam sententiis suis adiuvet Manichaeos, in primi libri mei parte posteriore monstravi. Ceteri autem nostri quattuor redduntur illis singulis singuli. Verum in huius tanti tamque elaborati operis quinto volumine, ubi commemoravi deformem maritum coniugi suae, ne deformes pareret, proponere in concubitu formosam solere picturam⁶¹⁶, nomen hominis qui hoc facere solebat, quasi certum posui, cum sit incertum, quia memoria me fefellit. Hoc autem Soranus auctor medicinae scripsit regem Cyprium facere solere, sed nomen eius proprium non expressit.

Hoc opus sic incipit : *Contumelias tuas et verba maledica, Iuliane.*

⁶¹⁴ *Opus imp. c. Iul. 4, 5.*

⁶¹⁵ Tit 3, 5.

⁶¹⁶ *C. Iul. 5, 14, 51.*

LXIII. AD LAURENTIUM, DE FIDE, SPE ET
CARITATE, LIBER UNUS.

Scripti etiam librum *De fide, spe et caritate*, cum a me, ad quem scriptus est, postulasset ut aliquod opusculum haberet meum de suis manibus non recessurum, quod genus Graeci *enchiridion* vocant. Ibi⁶¹⁷ satis diligenter mihi videor esse complexus, quomodo sit colendus Deus, quam sapientiam esse hominis utique veram divina Scriptura definit⁶¹⁸.

Hic liber sic incipit : *Dici non potest, dilectissime fili Laurenti, quantum tua eruditione delecter.* [569]

CAPUT LXIV. DE CURA PRO MORTUIS
GERENDA, AD PAULINUM EPISCOPUM, LIBER
UNUS.

Librum *De cura pro mortuis gerenda* scripsi, cum interrogatus litteris fuisset, utrum prosit cuique post mortem quod corpus eius apud sancti alicuius memoriam sepelitur.

Hic liber sic incipit : *Diu Sanctitati tuae, coepiscope venerande Pauline.*

CAPUT LXV. DE OCTO DULCITII
QUAESTIONIBUS, LIBER UNUS.

Libor quem praenotavi : *De octo Dulciti quaestionibus*, non esset in hoc opere

⁶¹⁷ *Enchirid.* 2, 1.

⁶¹⁸ *De Trin.* 12, 14, 22 ; 14, 1, 1 ; *De spir. et litt.* 11, 18 ; *Ep.* 140, 18, 45 ; 167, 3, 11.

commemorandus inter libros meos, cum sit confectus ex his quae a me in aliis antea conscripta sunt, nisi et disputationis aliquid a nobis interpositum repperiretur in eo, et uni earum quaestionum non ex opusculo aliquo alio meo responsionem, sed tunc quae potuit occurrere reddidissem.

Hic liber sic incipit : *Quantum mihi videtur, dilectissime fili Dulciti.* [570]

CAPUT LXVI. AD VALENTINUM ET CUM ILLO
MONACHOS, DE GRATIA ET LIBERO ARBITRIO,
LIBER UNUS.

Propter eos qui, cum defenditur Dei gratia⁶¹⁹, putantes negari liberum arbitrium, sic ipsi defendunt liberum arbitrium, ut negent Dei gratiam⁶²⁰, asserentes eam secundum merita nostra dari, scripsi librum cuius est titulus : *De gratia et libero arbitrio.* Ad eos autem scripsi monachos Adrumetinos, in quorum monasterio de hac re coeperat esse contentio, ita ut me consulere eorum aliqui cogerentur.

Hic liber sic incipit : *Propter eos qui hominis liberum arbitrium.*

CAPUT LXVII. AD QUOS SUPRA DE
CORREPTIONE ET GRATIA, LIBER UNUS.

⁶¹⁹ C. I, 1

⁶²⁰ Ibid.

Rursus ad eosdem scripsi alterum librum quem : *De correptione et gratia* praenotavi, cum mihi nuntiatum esset dixisse ibi quemdam, neminem corripiendum, si Dei praecepta non facit, sed pro illo ut faciat tantummodo orandum.

Hic liber sic incipit : *Lectis litteris vestris, Valentine frater dilectissime.*

EPILOGUS.

Haec opera nonaginta tria in libris ducentis triginta duobus me dictasse recolui, quando haec retractavi, [571] utrum adhuc essem aliquos dictaturus ignorans ; atque ipsam eorum retractationem in libris duobus edidi, urgentibus fratribus, antequam epistolas ac sermones ad populum, alios dictatos, alios a me dictos retractare cœpissem.